

Narodna in univerzitetna knjižnica  
v Ljubljani

153162

VI  
ioi.

03



~~VI~~ E.g. 821.

554. B. h. 36.



030048424

MANUDUCTIO  
AD COELUM  
MEDULLAM CONTINENS  
*coines* SS. PATRUM *vercellon.*  
AUTHORE  
JOANNE BONA  
S. R. E. CARDINALE  
Ex S. Cisterciensium Ordine,  
Opusculum  
*Titulo, & Authore suo dignissimum*  
OBLATUM IN XENIUM  
DOMINIS, DOMINIS  
SODALIBUS  
*Sub titulo Beatissima Virginis*  
IN COELOS ASSUMPTÆ  
Ab eadem Inclita Sodalitate  
Labacensi. Anno M. DCC. XII.

---

L A B A C I.  
Typis Joan. Georgij Mayr, Inc.  
Prov. Carniol. Typogr.

153162

153162

153162

153162

153162


153162

153162


153162

153162

153162



N 884 / 1977



## AD SODALES MARIANOS.

**N**on est è terris mollis  
ad astra via; Insuper &  
angustissima hæc est, &  
à dextra, & sinistra præcipitijs  
horrida, multorumque lapsibus  
intamis. Omnis in ea passus,  
úsque ad limen Paradysi suo  
non caret periculo; in ea om-  
nis qui stat, videat ne cadat.  
Sed nil metuite Sodales Maria-  
ni. En vobis in pia hac AD  
COELUM MANUDUCTIO-  
NE, sublevantem manum; hanc  
apprehendite, erit hæc vobis

Ari-

Ariadnæ longè fidelior. Hæc  
MANUDUCTIO AD COE-  
LUM medullā simul Ss. Patrum  
offert , animæ scilicet vestræ  
nutrimentum exquisitissimum,  
ne deficere possitis in via spi-  
ritūs ; quin potius ut in forti-  
tudine cibi hujus Mystici am-  
bulletis usque ad Montem DEI  
Horeb. Opusculum hoc pijssi-  
mum, ut auro cedróque est di-  
gnius , ita vobis auro cedró-  
que sit pretiosius. Aurum ad  
multa , pietas ad omnia utilis  
est. Hanc, Opusculum hoc ve-  
num proponit. Inspicite, vo-  
luite, & lectione diligente re-  
voluite ; nec dubitate quin vo-  
bis secura futurum sit MANU-  
DUCTIO AD COELUM.

MA-

XI

# MANUDUCTIO AD COELUM.

Medullam continens Sanctorum  
Patrum, & veterum Philoso-  
phorum.

## C A P U T I.

*De fine ultimo hominis. Quām ma-*  
*lum sit, ab eo deflectere. Quibus*  
*mediis, & quo ordine ad ipsum*  
*perveniantur.*

¶. **A**D Cœlum te manuducere  
propositum mihi est, qui-  
cumque hæc legis; ad illud,  
scilicet, bonum, quo adepto, nihil pos-  
sis ulterius desiderare. Hic est scopus,  
hæc meta, ad quam omnium vota na-  
turali propensione suspirant. Omnes  
beati esse volunt. Sed ob culpam pri-  
mi parentis plerique obcæcati, relicto  
vero, & summo bono, ad falsa & fu-  
cata quærenda se inutiliter applicave-  
runt, Et hi quidem, summum bo-

A

num

## MANUDUCTIO

num existimantes, nullâ re indigere ;  
divitiis hoc nomen imponunt. Alii,  
summum bonum in summa poten-  
tia constituentes, vel regnare ipsi vo-  
lunt, vel regnantibus adhærere. Qui-  
dam verò usque ad fordida descen-  
dentes, felicissimum putant, volup-  
tatibus diffluere , qui summi boni  
possessionem carne, & gulâ metiun-  
tur. Tanta apud istos beatitudinis vi-  
litas est. Sic laborantes sine fructu, ac  
veluti errantes in labyrintho, quò ve-  
locius ad bonum properant, eò lon-  
gius abscedunt : ideo infelices , quia  
suam non agnoscunt infelicitatem.

2. Hæc res est quæ magnis te malis  
involvit , miserabilis homo , quòd  
beatè quidem vivere, & beatè mori  
desideras ; sed ad videndum, quid sit  
beatitudo , & quomodò ad eam per-  
veniatur , stultus & cæcus es , devio  
errore per varios anfractus incedens.  
Quicquid agis, quicquid cupis, quic-  
quid moliris, contra te est. Non enim  
respicis illud bonum immensum, in  
quo

quo sistere debet voluntas tua ; quia ultra suum non est locus : sed vagaris sineproposito, instar formicarum per arbusta repetium, quae in suum cacumē, deinde in imū inanes aguntur. Deus omnium conditor è nihilo te creavit ut ipsum solum ames ; ipsi soli servias totā mente, toto affectu. Sicut necessariū est illū esse, ita & esse ultimum finem. Seriò cogita, quantā tuæ vitæ partem illi tribuas, cui te totum impendere debes. Errant studia & consilia tua, si ad ipsum non diriguntur. Sicut finis viæ tuæ locus est, quod tendis ; quod cum perveneris, quiesces : sic finis vitæ tuæ Deus est , ad quem referre debes quicquid cogitas, quicquid loqueris, quicquid agis, donec ipso adepto omnia vota compleantur. Ad æternū ducit interitum, quicquid ab ultimo fine abducit.

3. Quemadmodum in navigatione subducto navilio si aquatum exieris, obiter in littore aut cochleā colliges, aut bulbum ; animo autem in navim

semper intento solicitus eris, ne gubernator vocet; ac tunc relictis omnibus ad navim properabis; sic tibi in vita agendum est. Mente semper in Deum fixâ, ita rebus externis utere, ut cordi minimè inhæreant, nec te à proposito fine dimoveant. Serviunt illæ tibi, ut tu servias Deo, alioquin à divina deficiens unitate, ad plura non necessaria dispergeris; totque colis idola quot sunt creaturæ, quas inordinato affectu prosequeris. Hi sunt Dii tui, quibus non bovem, non hircum, sed te ipsum, tuamque salutem turpi sacrilegio immolas. Non patitur lex amoris quidpiam cum Deo amari, nisi in Deo, & propter Deum. Summa perditio est à summo bono deflectere, & converti ad creaturas.

4. Quod Princeps Medicorum de impuris corporibus ait? quod magis aluntur, eò amplius laedi; id etiam de animis dicendum est. Nam qui à prava consuetudine ad meliorem statum transfire incipiunt, malæ vitæ

venenum priùs evomere debent; ac tum, animo expurgato, solida virtutum percipere alimenta. Ipsa autem purgatio sic perficienda est, ut quotquot admisisti peccata exipientur, tum omnis ergà illa affectus exuatur: Vitiōsi habitus eradicentur: malæ propensiones, & appetitus immoderati sub rationis imperio coercentur; caro castigetur: quæ corpori sunt necessaria ad justū moderamen redigantur: frænum linguæ ac sensibus imponatur: quæcumque ad arcem virtutis properanti moram injicere possunt, penitùs exterminentur. Quid trepidas, viamque tibi ad beatitudinem difficultem fingis? Tu te ipsum facere beatum potes, eò vires suppeditante, qui principium tuum, & finis est. A te autem debes exire, ut ad eum pervenias. Eò vicinior illi fies, quo à te ipso remotior fueris.

§ Proponendum est itaque primò, quid appetas, quò properes: tum, via circumspicienda, quà summum illud

bonum adipiscaris, intellecturus in  
ipso itinere, quantum quotidiè pro-  
ficias. Perlustra sedulò conscientiam  
tuam, & caligantes oculos aperiens  
solerter adverte, qualis debeas esse,  
dum aliis fieri potes. Seriò fraudem  
agnosces, cùm vitare nequibis. Disce,  
quo remedio cupiditatum mansue-  
scat insania, quo fræno timorum sæ-  
vitia compescatur. Disce terrena de-  
spicere, & ab his spontè discede, quæ  
diu tecum esse non possunt. Omnia  
relinque, antequàm relinquaris, ut  
cùm venerit mors, nihil in te reperiat  
quod possit abolere. Curam autem  
præcipuam animæ impende; ut quæ  
excellentià prior est, non sit cultu  
posterior. Quid prodest homini, si  
mundum universum lucretur, ani-  
mæ verò suæ detrimentum patiatur;  
Nullum est lucrum, ubi salutis  
est damnum.



## CAPUT II.

*Cupienti benè vivere, morum instru-  
ctor eligendus est. Qualis hic esse  
debeat. Officia discipuli.*

**N**ihil magis necessarium incipienti servire Deo, quam ut se regi, & institui ab optimo præceptore sinat. Quis enim iter ignotum sine duce aggrediatur? Quis difficillimā artē ediscat sine magistro? Paucos numerabis, qui seipso protulerint, qui sine ullius adjutorio ad virtutem exierint. Quid universim fieri oporteat, & mandari absentibus potest, & posteris scribi. Quādo autē, & quemadmodū quidpiā fieri debeat, ex lōginquo nemo suadebit: cum rebus ipsis deliberandum est. Non potest Medicus per epistolā cibi aut pharmaci tempus præscribere: vena tangenda est. Ita etiā in curandis animi morbis quædā sunt, quæ non nisi à præsente monstrantur. Paulus futurus Doctor gentium, postquam conversus à Christo fuit, missus est ad

Ananiam , ut ab eo disceret viam vi-  
tæ. Durum & laboriosum negotium  
aggressus es , malignitatem naturæ  
vincere , cum spiritualibus nequitiis  
colluctari & ad virtutem te ipsum  
perducere, inter tot obstantia & im-  
pedientia. Quare aliquem invocare  
oportet, qui manum porrigat adjutri-  
cem , qui ostendat pericula , insidias  
detegat , & in ancipiti pugna instruat  
ad victoriam. Sed dicas mihi : Quem  
invocabo ? virum fidelem & sapien-  
tem , qui velit & possit tibi prodesse :  
cujus reverearis occursum, non refor-  
mides : cuius vita plus oculis , quam  
auribus probetur. Malè imperat, qui  
præcipit , & non facit.

2. Eum elige adjutorem, qui nemini  
aduletur , qui se vulgi congressibus  
non inferat , qui nec divitum convi-  
via , nec Principum ædes frequentet ;  
qui tale aliquid habeat in vita , qua-  
le argentarius in pecunia ; qui possit  
dicere : Affer quamvis drachmam, ego  
eam discernam ; affer quamvis affe-  
tio-

ctionem, ego eam dijudicabo: qui, tanquam probatus Medicus, internas ægritudines dignoscat, qui apta præscribat remedia ad omnes animi morbos depellendos. Talis sit, qui subtili examine omnium spirituum instinctus discernere, inter virtutes, & vitia discrimen ponere, omnium moribus servire sciat; qui omnes recessus & secreta mentis tuæ soleitatem consideratione perscrutetur: qui ab omni vitioso affectu immunis, lucro dumtaxat spirituali intentus sit: qui in spiritu lenitatis errantem doceat atque alliciat: qui omnes diaboli versutias detegere & eludere didicerit: cui denique non erubescas omnia mala tua pandere, omnia pectoris penetralia reserare. Pars magna felicitatis tuæ erit, talem posse reperire.

3. Cum eo libenter sermonem habeas; quicquid pravæ propensionis, quicquid morbosæ qualitatis in te est, quicquid delinquis, quicquid etiam boni facis, quicquid cælitus immis-

sum tibi existimas, prudenti ejus discussioni comitte. Sæpè illum deprecare, ut, si quem tibi notayerit turbulentū inhærere affectum, indicare ne gravetur; idq; frequenter faciat, nec redarguendi verecundiâ impeditus vitia tua dissimulet. Quod si negaverit se aliquid in te deprehendere censurâ dignum, ne te protinus credas inculpabilem evasisse. Tacet enim aut timens odium tuum, aut desperans emendationem. Tunc verò urge, & insta vehementius, & factis ostende, quantū proficere cupias. Incipe vitia apud illum deponere, ad ejus præscriptū mores exigere. Gaude fieri ab eo convitum tuæ pravitati, semperq; ab ipso vel sanior redeas, vel sanabilior. Inter tot mala aliquid est, velle sanari.

4. Hæc sunt docentis & discentis mutua officia; ut ille prodeesse velit, hic proficere. Ne ille profit, vix quidpiam impedit, nisi discipuli refractarium ingenium, doctrinæ impatiens, & curationis incapax. Quidam enim

innixi prudentiæ suæ , alterius sequi  
ducatum detrectant. Hæc omnia, in-  
quiunt, quæ tu doces, jam scio. Quid  
prodest aperta monstrare? plurimùm.  
Interdum enim scis, & non attendis.  
Non docet admonitio, sed excitat me-  
moriā, nec patitur elabi. Sæpè ani-  
mus etiam aperta dissimulat : inge-  
renda itaque illi rerum notissimarum  
notitia. Nam virtus erigitur cùm ta-  
cta est, & impulsa. Alios retrahit ma-  
lus pudor vitium puerile, & viro in-  
dignum. Alii, quasi phrenetici, perti-  
naci silentio mala intus premunt , &  
Medico curationi intento indignan-  
tur. Suadet nimirum hanc noxiam  
taciturnitatem tartareus hostis , spe-  
rans perniciē afferre , quamdiu latet.  
Et corporis quidē ulcera, tametsi pu-  
dibunda , omnium oculis exponere,  
ut curentur , non erubescis ; animæ  
verò carcinomata studiose tegis, ac si  
ea celare tollere sit ; cùm vix tamen  
fieri possit , quin vel te repugnantē  
ipsa sē prodant. Qui vulnus tegit,  
nunquam sanabitur.       S. Nun-

5. Nunquid Medicus injuriam tibi facit, si tuum tibi morbum demonstrat, si periclitanti dicit: Malè habes, febricitas: hodie tibi abstinentia à cibo est, hodie aqua potanda? Imò pro beneficio laudatur, gratiæ ei aguntur, & referuntur. Si quis autem dixerit; Appetitiones tuæ æstuant, opiniones vanæ sunt, affetus immoderati; protinus exclamas: O facinus ferro & sanguine vindicandum! ô contumeliam nullo modo ferendam! Infelix! Quid tibi danni aut mali infert tuæ salutis studiosus monitor & instrutor? Id scilicet, quod speculum deformi. Te talem tibi ostendit, qualis es. Corrige ergo quod ille arguit; compone mores, ablue frides. Facile potes, si volueris omnium te oculis irreprehensibilem exhibere.

—S( O )S—

## C A P U T III.

*De purgatione à peccatis. Exuendus  
erga illa affectus, & vitia extir-  
panda. Nullum efficacius vitio-  
rum remedium, quam mortis, &  
eternitatis consideratio.*

1. **A**B ultimo fine deviat homo, cùm  
peccatum committit, quod est  
omnium malorum causa. Ab hoc  
semine nascitur quidquid cruciat:  
hoc veneno totus Orbis inficitur. La-  
tet illud, dum fit, sed cùm patratum  
fuerit, tunc intelliges quam malum  
sit. Fuere, qui mortuorum corpora  
vivis jungerent, ut fætore torque-  
rentur. Similis est in peccantes ani-  
madversio: alligatum est eis suppli-  
cium; non inveniunt quò evadant.  
Nisi aliquid patiaris, ne malum facias;  
plurimum patieris, quia fecisti. Vix  
concipitur prava actio, & jam puer-  
pera est suæ pœnæ. Indè nata mors  
est, hinc succensa gehenna. Ab  
omnibus itaque flagitiis expianda

con-

conscientia, dolore, confessione, & satisfactione. Nec graviora duntaxat evitanda, sed minima quæq; & leviora ; quæ tametsi mortem non afferrant , vires tamen sensim dissolvunt, & ad mortiferam labem disponunt. Quid autem interest ad naufragium, utrum navis uno fluctu operiatur : an guttatum subrepens aqua , & per incuriam spreta , ipsam impleat & submerget ? Tantò majorem maculam ista inferunt moribus, quantò facilius poterant evitari. Quò hostis debilior est , eò gravior tibi ignomonia erit, si ab illo vincaris.

2. Nunquam virtutes animo inferrere poteris, & te in pristinum libertatis statū asserere, nisi exuas omnem affectum erga peccata , quantumvis minima ; ne corpore in deserto, animo sis in Ægypto. Male tecum agitur, si post dimissam injuriam , post relatos turpes amores ; adhuc malignis collocutionibus præstas auditum, adhuc terrenâ specie delectaris. Vitia

autem

autem & pravi habitus , qui deletâ  
culpâ in te remanent, tanquam pessi-  
ma peccati soboles, radicitùs extirpa-  
ri debent. Si solos ramos præcideris,  
servata radix emerget , & novi ex ea  
succrescent ramusculi iniquitatis. Di-  
cis, te velle vitia excindere. Falso  
est : non enim claudis vitiis ostium,  
sed opponis. Dicis, te offendit turpitu-  
dine vitæ tuæ. Hoc credo : quis enim  
non offenditur ? Homines mali vitia  
sua oderunt simul & amant, atq; etiā,  
dum perpetrant, detestantur. Quid  
prodest verbis mala rejicere , factis  
amplecti ? Nemo est tam profligatæ  
conscientiæ , cui aliquando vitia sua  
nauseam non faciant ; sed citò cum  
illis in gratiam redit. Qui autem ve-  
rè conversus ad Deum est , ponit se-  
curim ad radicem, & ipsas minutissi-  
mas vitiorum fibras eradicat. Tum  
memor fragilitatis suæ omnes pec-  
candi occasiones studiosissime vitat :  
& ad quodlibet malæ rei objectum  
timore concussus resilit , & exhorre-  
scit.

a. Quid

3. Quid fruſtrà tergiversaris, & præcipienti Deo vitiorum extermi-  
nationem, opponis naturæ infirmitatem? Nemo magis virium tuarum  
mensuram novit, quam qui ipsas lar-  
gitus est. Quare ergò non statim ob-  
temperas? cum non commodum  
quæratur jubentis, sed tua utilitas?  
O cæcam & sceleratam temeritatē!  
Servili nequitiā in os Domini re-  
clamare audes, & dicere, durum  
esse quod ille jubet; ac si mandata  
tibi imposuerit, quæ ferre non possis:  
ut videatur præcipiendo non tam  
salutem tuam quæsivisse, quam pæ-  
nam. Hæc est nimirūm, humana per-  
versitas, & malè de Deo mereri, &  
laborem sibi fingere in præcepto, Sed  
si volueris vires tuas experiri, vide-  
bis multò plura te posse, quam puta-  
bas. Non quia difficultis est lucta, non  
audes; sed quia non audes, difficultis  
illa videtur. Multa priùs terrori ha-  
bita, usus vertit in risum. Incipe, nec  
te ipsum contemnas. Non deserit

Deus milites suos. Tantum virium habebis, quantum volueris.

4. Omnia vitia facile vinces, si omnem tibi diem supremum diluxisse credideris. Quid est quod te alligat terrae? Quia nunquam cogitas, citò ab ea exeundum esse. Transeunt quotidiè præter oculos tuos elata cadata, quæ mortalitatis oblitum respicere cogunt ad mortem. Tu autem in media strage morientium, nihil minus quam mortem cogitas: & cum nihil frequentius videoas, nihil citius oblivisceris. Veniet tamen qui te revulet dies, & ex contubernio olidi ventris educat. Discutietur ista caligo, & tunc in tenebris te vixisse cognosces, cum lucem aspiceris. Produc si potes ex tot elapsis annis vel unicum diem, integræ virtutis testem, qui non fuerit aliqua labe pollutus. Defloruit rudior ætas inter talos & nuces, inter ineptias & libidines adolescentia, inter scelera & flagitia præceps juvenitus. Post omnes annos, qui à cunis ad canos

canos defluxerunt, nihil jam supereft  
nisi dolor, & pravi fructus iniquitatis.  
Heu quales te apprehendēt angustiæ,  
cūm præterita pudori erūt, formidini  
futura! Quid tunc proderunt divitiæ,  
tot partæ sudoribus, tot curis quæfi-  
tæ? Quid carnis delitiæ, & probrosæ  
voluptates? quid inania dignitatū no-  
mina; quid purpura, quid coronæ? O si  
daretur reverti ad crepundia, & telā  
de novo exordiri; quām meliori textu  
omnia conciñares! sed intempestiva,  
illo fatali momento, hæc vota erunt.  
Si vis tempore uti, nunc incipe: & ea  
desere, quæ tunc velles deseruisse.  
Minima res est, momentaneis re-  
nunciare, ut æterna consequaris.

s. Quære, si lubet, ex morituro, de  
anteacta vita quid sentiat? vix unum  
reperies, qui non longè diversam pro-  
ferat de opibus, dignitatibus, mun-  
dique vanitatibus sententiam, quām  
vivens habuerit. Tunc res omnes  
æquiori lance pensantur, suísque mo-  
mentis æstimantur. Et illis quidem  
sera

sera sapientia in exitu est: tibi verò plurimùm proderit, si ex alieno errore tuum corrigere didiceris. Potes nunc tutò navigare: quid exspectas tempestatem? Potes te, rebus integris, subducere calamitati: cur te reservas extremo periculo? Sera, dū mergeris, cautio est; sera prudentia, cùm jā pérīsti. Tòt maximi & sanctissimi viri, relictis omnibus impedimentis, cùm sibi & mundo valedixissent, hoc unū in extremam usq; ætatem egerunt, ut vivere & mori scirent: plures tamen, nondum se scire professi, è vita abierunt. Adeò difficile est, hanc artem ediscere. Tu autem in senectutem sana differs consilia; & inde vitam vis inchoare, quò pauci perduxerunt: Stultitia magna est, tunc vivere incipere, cùm desinendum est.

6. Quò te projicis, incautus homo? sic credis, & sic vivis? umbræ transitus est tempus tuum; punctum, vita tua, & si qnid minus punto esse potest. Vix natus, desinis esse. Siste vel unum

unum diem ; horam dumtaxat ne  
fluat inhibe, brevem moram temporis  
pone. Frustrè conaris : nam te secum  
citiùs abripiet, quām ut desinat ve-  
locissimè fluere, in tuum rerumque  
omnium exitium. Et huic momento  
æternitatem postponis, quæ finem  
non habet? ô stultitiam, ô cecitatem!  
Corpori perituro non cessas quæ ad  
ipsum pertinent comparare, & non  
est finis acquisitionis tuæ : animæ ve-  
rò quæ nunquam moritur, nulla pro-  
vides bona in futurum, ac si tua non  
foret; languet corpus; omne discri-  
men subire paratus es, ut sanetur:  
languet anima; & negligis, & non  
sentis? Quando dictum est tibi; na-  
viga, ne moriaris, & distulisti? Sume  
amarissimum pharmacum; & recu-  
fasti? Levia Deus jubet, ut vivas in  
æternum, & non vis obedire? Si tibi  
lis foret, omnis cogitatio tua, omnis  
sermocinatio circà illam occuparetur;  
nec subsidia parare cessares, ut pro te  
Judices sententiam ferrent: extremo  
autem

autem judicio imminente, è quo pen-  
det æternitas, rides, nugaris, peccas,  
in æternum periturus; Ah! define tan-  
dem insanire; & à vitiis emergens, sic  
forma quotidie animum, tamquam  
ad extremum ventum sit. Vera philo-  
sophia hæc est, quām maximè fieri po-  
test, hanc animam è corpore educere,  
& separare.

7. Hoc sit negotium tuum, hoc oti-  
um; hic labor, hæc quies, subducere te  
tempori, & immergere æternitati. Fi-  
xum semper & immobile stat, quod in  
jura transiit æternitatis. Avarus epu-  
lo aquæ stillam post tot sæcula adhuc  
petit; & perpetuo mugitu frustra ro-  
gabit. Æternitas est duratio semper  
præsens, nunquam sine suspirio, &  
horrore nominanda: est rota quæ sem-  
per volvitur: est juge, interminatum,  
sempérque inchoans principium. Se-  
ria ejus cogitatio mundi delitiis mi-  
scet absynthia; lethalique mœrore  
attonitos homines, ac veluti sideratos  
dejicit. Hæc animam rebellem domat  
& cu-

& curis inanibus indormiscentem  
excitat ad virtutem : hæc famem, &  
fitim condit : hæc omnem laborem  
facilem, jucundum omnem dolorem,  
omnem pœnam suavem, & brevem  
esse persuadet. Impleantur numericis  
notis ingentia cœli spatia, quacunque  
in immensum protenduntur. Quis  
præter Deum poterit hanc propemo-  
dum infinitam numerorum seriem  
exprimere ? Hi tamen numeri innu-  
merabiles nec initium quidem æter-  
nitatis sunt. Tot anni, sæcula la-  
bantur, quot sunt in illis unitates ;  
nondum pervenerunt ad despera-  
tissimæ æternitatis initium infeli-  
cissimi mortales, qui perpetuo infer-  
ni incendio cruciantur. Ad hanc  
considerationem si non horrescis, si  
vitam seriò non emendas, quo-  
vis faxo durior  
es.

( Q )

## CAPUT IV.

*De Gula. Ejus mala, & remedia.*

*Quæ sint indicia devictæ gulae.*

1. PRIMUM tibi certamen adversus  
gulæ vitium ineundum est, quæ  
pabulum cæteris subministrat. Morti  
corporis & animæ nos gula initiavit.  
Primi enim parentes nostri, pomi in-  
terdicti esu omnes homines, antequā  
gignerent, peremerunt. Nunc eâdem  
animatorum hostes utūtur; ut enervato  
omni vigore nos proterant & concul-  
cent. Hinc stupor, languor, & tædiū:  
hinc scurrilitas, loquacitas, dissolutio:  
hinc immunditia, rixæ, contentio-  
nes; hinc mentis hebetudo, destru-  
ctio omnium virtutū. Hinc rei fa-  
miliaris profusio: hinc egestas: hinc  
longa morborum series, & ipsa deni-  
que mors, graviori ciborum sarcinā  
accelerata. Pauci sunt infirmi, quos  
gula ad ægritudinem non adegerit.  
Nam si noxiis humoribus, ex ni-  
mio cibo, & potu congestis, careat  
corpus,

corpus, tentari quidem à morbo, sed non subigi posset. Plures occidit gula, quam gladius.

2. O vilissimam ventris servitutem ô inexplebilem cupiditatem! Modicum tibi corpus natura præbuit; vincis attamen vastissimorum, & edacissimorum animalium aviditatem. Taurus paucorum jugerum pascuis impletur; una silva plures nutrit elephantos: tibi angustus est Orbis; non sufficit ventri tuo, quicquid volat in aere, quicquid natat in undis, quicquid latet in silvis. Aspice potentum culinas, & concursantes inter tot ignes coquos: vide servorum, & ancillarum sudantem cohortem: vide stragem animalium, & natantia vino penuaria: obserua, quanta solicitude argentum ordinant pueri; quantâ arte disponunt fercula, inferunt patinas, scindunt aves; quantâ celeritate discurrunt ad ministeria. Vix credes unam esse domum, cui tot Consulum & Regnum vina promuntur: cui

mensa

mensæ tanto tumultu apparantur. Non præcipio ut subtrahas ventri alimenta. Contumax est ; non potest vinci , quotidiano indiget cibo. Verum latet hic dolus, & subtilissimus concupiscentiæ laqueus ; quo sœpe anima irretitur, obtentu necessitatis, negotium obumbrans voluptatis. Vis scire, quam parvo fames extinguatur? Te ipsum numera, metire corpus, stomachum consule. Scies , non esse necessarium , quod mensuram excedit. Naturæ pauca sufficiunt , luxuriæ nihil.

3. Fames non est ambitiosa; contenta desinere , quo desinat non quærit. Elapso momentaneo palati judicio, non suavius sapit pretiosum , quam vile. Si esuris, edendum est : si fitis, bibendum. Sed utrum panis plebejus sit, an filigineus: utrum aqua ex proximo amne excepta , an multa nive refrigerata nihil pertinet ad naturam. Hoc unum illa jubet , sedari famem , fitim extingui. Pisces è supero , inferoque

mari , à fluviis , & lacubus evocati ,  
detractæ è cœlo aves , ereptæ è silvis  
feræ , diversa vini genera , & omnia  
Apicii condimenta , infelicis luxuriæ  
tormenta sunt . Epicurus sobrium  
viētum voluptatis gratiâ commen-  
dat : nihil est enim tam lautum , quod  
nausea non reddat insipidum ; nihil  
tam insuave , quod delicatum non  
faciat fames . Vis omnem cibi , & po-  
tûs superfluam curam abjicere ? ex-  
itum specta . Citò morieris , & corpus  
istud , tanta epularum varietate nu-  
tritum , fœdis vermibus pabulum  
erit . Considera , quali convivio te  
escam præparas ; & sic carnem nutri,  
ne mentem opprimas . Cibo utere ,  
qui parabilis sit , & ubique occurrens ,  
nec patrimonio gravis , nec vale-  
tudini . Magna pars libertatis est ,  
bene moratus venter , & patiens con-  
tumeliæ . Multa quām supervacua  
essent non intelleximus , nisi cùm  
deesse cœperunt . Eget corpus ali-  
moniâ , non cupediis , aut lautitiis .

4. Non est autem quòd te laudes, si  
còntempseris superflua. Tunc lauda-  
bilis eris, cùm contempseris necessa-  
ria : cùm tibi persuaseris, sordidum  
panem ad victum, modicum vinum  
& debile, vel aquâ debilitatum , ad  
potum,fatis esse : cum didiceris, her-  
bas non tantùm pecori , sed homini  
quoque nasci. Tunc te admirabor, cū  
solam necessitatem, ac virium repa-  
rationem , Deique gloriam, in cibo  
sumendo spectabis : cùm lautiores  
epulas , & magnatum convivia con-  
tempseris : cùm invitus ad mensam  
accedes, sicq; alimenta sumes, quem-  
admodùm pharmacum ægroti : cum  
voluptatem gustus , quia tolli non  
potest, compescere & moderari stu-  
dueris : cùm tibi molestum fuerit,  
quidpiam delicatius valetudine exi-  
gente, accipere : cùm verâ denique  
mentis & corporis puritate imbutus  
fueris. Non enim in corporis atte-  
nuatione probatio abstinentiæ sita est  
sed in perfectione castitatis.

## CAPUT V.

*De Luxuria. Quàm turpe sit hoc vitium. Quàm facilis in id lapsus, & quomodo evitandus. Voluptas animi sectanda, quæ solida est.*

1. Nullum vitium isto turpius: nullum de quo magis erubescamus. Vel nudum ipsius nomen non carcere ignominia edixit Apostolus, præcipiens, ut quæ hujusmodi sunt nec nominentur in nobis. Hinc ille pudor, quo solent ingenui ac probi homines affici, si semel admissum aliquod immunditiæ peccatum aliis innotuisse suscipiuntur. Hinc lubricos adolescentiæ errores quidam in secretissimo pœnitentiæ tribunali ministro Christi abscondunt, æterna potius tormenta, cum æterno dedecore, subire post mortem eligentes, quæm imaginariam hujus vitii infamiam in hac via. Huic autem limo infixus vix emergit. Conclamata est ejus salus, quem hæc lues infecit. Quid enim possunt ad hoc humanæ

manæ vires? Nemo potest esse continens, nisi Deus det.

2. Primum itaque huius morbi remedium, servens ad Deum oratio est; ut ipse te sanet & præservet, qui solus potest. Tum impuris cogitationibus resistere, in ipso accessu oportet, eâ celeritate, quâ ignitum carbonem executis à vestimento. Væ tibi, si te semel immiseris ad aliquid quantumvis minimum in hoc genere deliberandum. Proxima ditioni est arx, cuius gubernator incipit cū hoste miscere colloquia. Omnis item præcidenda pravitatis occasio ab otio, à gula, ab omni specie impura, à malorum convictu, & societate: nec quidquam in hac lucta negligendum. Sunt etiam in justis quædam hujus vitii reliquæ, omnino extirpandæ: est latens quidam serpentis sibilus: sunt quædam affectiunculæ, quæ tametsi malæ non sint, sunt tamen principia peccatis præludentia, quibus sensim fine sensu fascinata mens, nisi statim abrumpas, adhære-

bit. Nunquam magnus eris, si hæc  
minima spreveris. Magna à parvis  
initium sumunt.

3. Ante omnia cavendū, ne te ni-  
mia tui fiducia decipiat. Quisquis non  
timuit, jam lapsus est. Quot & quales  
viri post cōfessiones, & victorias ; post  
signa & magnalia , incauto fœminæ  
aspectu , corruerunt ? Non affero hic  
Samsonis, Davidis, & Salomonis, to-  
ties decantata exempla. Sunt alia re-  
centiora , & quotidiana. Et ut desint  
aliena, habes tu ipse in te, unde eru-  
bescas; unde discas, nō altū sapere, sed  
timere. Nōne extremæ dementiæ est,  
inter tot omnium ætatum & gentiū  
documenta adhuc aliquid audere &  
nō vitare discrimē? sed hæc est semper  
humanæ pervicaciæ incredulitas, ut  
nunquam credat alios cecidisse, nisi &  
se viderit interire. Facta est mulier à  
Deo adjutrix viri ; sed dolo serpentis,  
personā sumpfit hostile. Nihil in illa,  
nisi quod feriat, quod urat, quod in-  
terficiat. Nulla est hyena, nullus basi-  
liscus,

liscus , qui cum illius voce & oculis conferri possit. Ah! fuge ejus aspectū ; fuge colloquium , quicunque tuam optas salutē. Suum morē illa retinet, semper hominem expellit è paradiso.

4. Familiare hic est, multas prætexere excusationes necessitatis, cōfudinīs, puræ intentionis: sed latitant sub specie boni ingentia mala. Inde enim profiliunt nocituræ libertates, incauta colloquia , gestus leviores, modestiæ neglectus, crebra munuscula, & quædam hilaritudines , quibus paulatim deponitur pudor , & tota demum exuitur verecundia. Crescunt hæc per intervalla; & qui rubore suffusus, ad sola mulierū vestigia horrefebat, jā vultu constanti lascivientes oculos, nudatumq; pectus intuetur ; & blādo intus operāte veneno, prius damna patitur, quā periculū senserit. Sic paulatim rationis oculus caligare incipit, postea obcæcatur. Sic anima cœlo nata affigitur humi , immemor Dei , immemor sui , donec flamma

concupiscentiæ semper duraturo incendio absorbeatur. O miseri, quorum fœdæ, & momentaneæ voluptates tam luctuoso exitu terminantur! omnes puto Sardonicis herbis saturos esse moriuntur, & rident.

s. Quid quæris, stultus homo, inops proprii consilii, alieni desertor? Voluptates? Deus cœlo æternas reposuit. Vis hujus sæculi fallaces, & excludiæternis? Ubi ratio, ubi prudentia? Cœlum intuere, & omnes ejus beatissimos cives. Olim panem cum cinere, potum cum fletu miscebant. Vidisses eos in mundo angustiis undique oppressos, fordibus obscuratos, semper lacrymis madidos, semper vigiles in oratione, extra omnem mundi lætitiam positos. Viam sibi ad cœlum equuleis, gladiis, & crucibus fecerunt. Respice infernum, & desperatam damnatorum turbam, ignibus, tenebrisque perpetuis sepultam. Hi falsa mundi gaudia, carnisque delicias & luxum olim amplexi, nunc serò cognoscunt,

quantum

quantum sibi nocuerint voluptates.  
Hæc sedulò contemplare, & si credis,  
exhorresce. Momentaneum est quod  
delectat, æternum quod cruciat.

6. Quod si etiam in hac vita placet  
voluptas ; cur non magis solida, vera,  
impolluta, immutabilis, quæ ex ani-  
mo benè composito venit, ut de tuo te  
ipsum oblectes ? Carnis voluptas mol-  
lis est, caduca, fucata ; semper mero &  
unguento madens, & timens publica-  
ri. Ejus statio fornices, popinæ, & loca  
censorem metuentia. Si foris nitet, in-  
trorsus misera est. Cùm incipit, tūm  
extinguitur, & in ipso sui usū perit.  
Voluptas verò animi tranquilla, ex-  
celsa, invicta, semper secura & stabilis,  
nec satietatem habet, nec pœniten-  
tiam. Nullus eam pudor comitatur,  
nullus sequitur mœror, nec suum un-  
quām possessorem destituít. Hac si frui  
desideras, omnes carnis illecebræ vin-  
cendæ sunt. Vera enim voluptas est,  
omnem contemnere voluptatem.

## CAPUT VI.

*De Avaritia: malitia ejus perstrin-  
gitur. Collatio pauperis, & divi-  
tis. Opum fallacia, & vanitas.*

1. HÆc est Avaritiæ pessima fraus,  
quā prænoscere debes, ne deci-  
piaris: occultat se; nec ullum reperies,  
qui se avarū confiteatur. Ille divitias  
congregat, ut sibi & liberis prospiciat:  
hic ut pauperum indigentia cōfusat:  
alius ut redimat piis operibus pecca-  
ta sua. Sed congestum aurum nemo  
istorū erogat: imò nova semper quæ-  
runtur, quæ addantur acervo; & dum  
quærendo teritur tempus, elabitur  
vita, cui opes quærebantur. Ut ægro-  
rum sitim aqua non sedat, quam siti-  
bundus placido amne fluentē videt,  
& agitat manu; nisi os admoveat, &  
gelidos hauriat latices: ita Avarus  
nullâ re satiari potest; quia menti  
eius, in qua residet avaritia, thesauri,  
& pecuniæ non possunt illabi. Ani-  
mam Dei capacem solus Deus imple-  
re potest.

2. Con-

2. Congeratur in te, Avare, quicquid omnes locupletes possederunt: ultra Salomonis opulentiam fortunatē provehat: terrā marmoribus, auro parietes, gemis laquearia abscondas. Non tantū habere tibi liceat, sed calcare divitias. Accedant statuæ, & picturæ, & quicquid ars luxui serviens elaborabit: majora cupere ab his disces. Naturalia desideria finem habent; ex falsa opinione nascentia infinita sunt. Quid refert, quantum tibi in arca, quantū in horreis lateat, si non computas acquisita, sed acquirenda? Toto eget mundo, cuius non explet mundus cupiditatem. Atque utinā considerares, quanta secum malala divitiæ afferant, quanta auferant bona! Invenires procul dubio, quam vera sit Apostoli sententia; Radix omnium malorum est cupiditas. Inde germinant fraudes, inde consurgunt bella; hinc perjuria, hinc proditiones nioriuntur. Tolle avaritiam, & non est discordia: definat avaritia, & cessat ambi-

ambitio. Hæc terram latronibus compleat, mare piratis, Urbes tumultibus domos insidiis, forum injustitiâ. Quædam nimirùm societas, penè etiam nominis, est vitiis & divitiis.

3. Confer, si placet, inter se pauperem & divitem: cerne vultum utriusque. Hic plenus sollicitudinum, tetricâ facie tristitiam animi prodit: ille serenâ fronte sincerum mentis gaudium ostendit. Hujus, inter ærumnas cor exedentes, bracteata felicitas est: illius mens, mœroris vacua, internæ pacis jucunditate perficitur. Hic quærendi cupiditate anxius, amittendi metu miserrimus, ad omnes fortunæ injurias expositus, quò plus habet plus cupit. Ille in paupertate ditissimus, optat quod satis est, nihil timens; quia nihil habet quod sibi adhæreat, quod sibi eripi possit. Quam lætos dies dicit pauper, quam placidas noctes! Dives autem, æger animi, morbum suum, quocunque pergit, secum trahit, spinis undi-

undique circumseptus. Sed lethalis  
est sopor, qui non sentit aculeos.

4. Audi, miser, cuius inexplebilis  
avaritia est. Omnibus licet locis tecta  
tua resplendeant : licet immensos pe-  
cuniarum acervos possideas : quam-  
vis ultrà mare latifundia tua exten-  
dantur ; veniet tamen, veniet dies ab  
æterno statuta, quâ hæc omnia simul  
cum vita, amaro & invito animo de-  
scres. Abibunt, peribunt hæc omnia ;  
propter quæ pereundum tibi erit.  
Tunc demum intelliges, quâm con-  
temnenda mireris ; simillimus pueris,  
quibus omne ludicum in pretio est.  
Illös reperti in littore calculi leves, &  
aliquid varietatis habentes delectat :  
tu circa auri glebas, splendidosque  
lapillos insanis carius ineptus. Non  
dico, ut divitias non habeas, si te Deus  
divitem fecit ; sed ut habeas, nulli de-  
tractas, sine cujusquam injuria partas,  
sine sordidis quæstibus, sine solici-  
tudine, & superflua cura. In domum  
illas, non in animum, recipias ; para-

tus his carere, cùm Deus voluerit.  
Ille verè locuples est, qui divitiis non  
eget. Ne expectes, ut fur, vel casus  
eripiant tibi quæ possides: occupa tu  
corum vices, & aufer tibi ipsi animo  
circa exteriora indifferenti, quidquid  
alii auferre possunt. Tuus eris, si hæc  
tua non erunt.

§. Disce à te removere pomparam,  
& cultum victumque tuum non ad  
exempla compone, sed ut Christiani  
suadent mores. Poteſt paupertas se in  
divitias convertere advocatâ frugali-  
tate. Exiguum natura desiderat, non  
efurire, non sitire, non algere. Po-  
tes habitare sine marmorario fabro;  
potes vestiri sine commercio Serum.  
An non sitim extinguet poculum, ni-  
ſi gemmeum aut crystallinum sit,  
quo simul bibas & timeas? Gladius  
non ſcindet panem, niſi ebur, &  
margaritæ in capulo niteant? Pelvis  
ſtictilis non excipiet manuum fordes?  
Nec lumen lucerna ministrabit, niſi  
ſit aurificis opus? Auro ſervit, qui ſe  
auro

auro ornari putat. Quantò utilius foret, veras amare divitias, quæ hominem meliorem faciunt; quas nulla fortunæ iniquitas nec ipsa mors auferre potest? Quid pauperiem times, integrum Regnum ferens in corde? Regnum Dei intra te est. Absit ut aliud bonum quæras. Quære bonum tuum. Nemo bonus, nisi solus Deus. Hic tibi possessio & regnum sit, in quo sunt omnia bona, omnes thesauri. Cui Deus totum est, huic mundus nihil est.

6. Quicquid nitidum, quicquid magnum in mundo appareat, inane est, fictitium est, nihil est. Quid miraris cùm vides hominem auro, & purpurâ indutum, & magnâ servorum catervâ stipatum? Pompa est. Ostenduntur hæc omnia, non possidentur: & dum placent, transeunt. Non capio hujus rei fidem à Lyceo, vel à Porticu, non à Cruce Christi non ab æterna Dei Sapientia; sed ab ipso mundo, ab ipsis vanitatum mancipiis.

Audi Amanum opibus, potentia, honoribus super omnes tunc mortales eximum. Convocat auditores, & coacto cœtu omnia nihil esse pronuntiat. Nihil, inquit, me habere puto; & caussam adjecit. Quamdiu videro Mardochæum sedentem ante fores Regias. O ludibria, ò cæcitatem! Sæpè legi, & audivi omnia nihil esse collata cum bonis, quæ virtus parit, quæ nutrit æternitas: sed vehementius de pressa sunt; coram nihil visa sunt nihil. Nihil igitur facis, si nihil spernis. Spernendum est aliquid quod in te sit quod aliquid sit. Comprimenda cupiditas, ac veluti sub vinculis habenda; ut assuescas colere paupertatem, & usum terum res ipsas metiri. Facile autem contemnes omnia, si semper cogites te moriturum.

( O )

## CAPUT VII.

*De Ira, Character irati. Effectus,  
Caussa, & remedia Iræ.*

1. **I**RASCOR iræ. Sola hæc ira justa est  
adversus monstrum rabidum &  
execrabile; adversus affectū maximè  
implacidum, & turbulentum: qui si  
semel invaserit hominem vix in eo  
humanæ naturæ vestigia relinquit.  
Ira brevis insania est, sui impotens;  
armorum, sanguinis, & suppliciorum  
avida; decoris oblita, necessitudinum  
immemor, in ipsa irruens tela, ut alteri  
noceat; ruinis simillima, quæ super  
id quod oppresserunt franguntur. Lin-  
quit decor omnis iratos. Flagrant &  
micant oculi, tumescunt venæ, horret  
capilli, quatuntur labia, strident den-  
tes, spumant ora, rabida vocis eruptio  
colla distendit. Non est ullius affectūs  
facies turbatior. Fœdatur vultus, cō-  
trahitur frons, nutat caput, vacillant  
pedes, agitantur manus, & totum  
corpus indecora jactatione huc illuc

circumfertur, Adjice minaces gestus  
complosas manus, pulsatā humum  
percussum pectus, evulsos crines, scis-  
fa vestimenta, & sanguinem ab imis  
præcordiis exæstuantem. Qualem  
putas, intra esse animum, cuius extra  
imago tam fœda est? Qualia Poeta  
infernī monstra finxere, ignibus ar-  
dentia, succincta serpentibus, dirōque  
mugitu perstrepentia; talis est irati  
habitus, turpis, cruentus, æstuans,  
cruelis, & in ferinam rabiem dege-  
nerans. Cætera vitia licet absconde-  
re, & in abdito alere: ita se profert, &  
in faciem exit, ac velut ignis omnia  
corripit: quantoque studiosius eam  
tegere conaris, eò amplius effervescit.  
Modi nescius est, nec frænum pati-  
tur, quem ira possedit.

2. Reliqua item vitia certis quibus-  
dam finibus coercentur; iræ nihil in-  
tactum, nihil est in accessum: cœlum  
ipsum petimus iracundiâ. Hinc blas-  
phemiae; hinc querimoniæ adversus  
Deum; hinc de ejus providentia mo-

tæ ab impiis controversiæ. Nec his  
dumtaxat irascimur, à quibus nos læ-  
fos existimamus ; sed futuræ etiam  
injuriæ cogitatione offendimur : &  
qui facturus esse injuriam , falsâ ple-  
rumq; imaginatione, creditur, jam fe-  
cit : adeò ingeniosi in vitiis sumus.  
Sæpe nescimus quibus irascamur, ira-  
scimur tamen : & si aliis desit, in quo  
impetus ille frangatur , contra nos  
ipsos excandescimus. Ut verò scias  
non ex sola injuria nasci hunc affe-  
ctum , iræ etiam nostræ sentiunt ra-  
biem, qui nec offendere nos possunt,  
nec contumeliâ afficere. Sic vestimen-  
ta sæpe scindimus , vasa projicimus,  
frangimus calatum, laceramus char-  
tam , cùm his uti ex animi sententia  
nō valemus. Sic in furorem sæpe nos  
agit aut versus calix, aut mensa negli-  
gentius posita, aut parum agilis puer,  
aut tracti subsellii stridor, & alia mul-  
ta, quæ iram nostram nec meruerunt,  
nec sentiunt. Sic refractarius equus  
& contumax ; sic canis oblatrans,

& perstrepen tes aviculæ ; sic impor tunus muscarū volatus, aut culicum morsus bilem concitant, & impati entiæ nostræ pœnas luunt. Vide quām demens sis. A rebus sensu carentibus, & à brutis animantibus exigis pœnas, quibus par esset tuam potius infaniam castigare.

3. quod si libeat iræ damna & effектus intueri , nulla pestis humano generi pluris stetit. Videbis cædes, & urbium clades , & totarum exitia gentium. Videbis pestilentiam manu factam , & magnam occisorū struem, fusique sanguinis rivos flumina insufficientes. Aspice nobilissimarum ci vitatum fundamenta vix notabilia ; has ira dejecit. Aspice solitudines fine habitatore desertas ; has ira ex hausit. Aspice incendia domos con cremantia , violatos fontes venenis, extintas familias ; hæc scelera ira patravit. Ferarum conventum dixeris non hominum, nisi quòd illæ inter se placidæ sunt, hi mutuâ laceratione se per-

perimunt. Accedit huic vitio hæc pernicies, quòd hominem exuit similitudine Dei, cuius opera tranquilla sunt: mentem obcæcat, ne verum videat, ne aliorum monitis obsequatur: omnes animæ facultates turbat & pervertit; cumque pessimè totum hominem afficiat, vix illi tamen ulla turpitudo inesse creditur: adeò vulgus, gloriosum existimat irasci. Sed præstat ad remedia accedere, quibus hæc prava affectio, si non tolli omnino, rationis saltem imperio subjici, & ad salutarem modum cogi possit.

4. Ante omnia optimum est primum iræ irritamentum protinus spernere, & ipsis repugnare principiis: nam si cæperit ferre transversum, difficilis ad salutem recursus est. Faciet quantum volet, non quantum permiseris. Cùm hostis portis se intulit, modum à captivo non accipit. Facilius enim est non admittere perniciosa, quàm admissa moderari. Pars superior mundi, & ordinatior, ac pro-

pinqua sideribus nec in nubē cogitur,  
nec in tempestatē impellitur, sed ca-  
ret omni tumultu: inferiora sunt quæ  
fulminant. Ita animus sublimis, quie-  
tus semper & cōpositus, ac in statione  
tranquilla collocatus, intra se mala  
premit, quibus ira cōtrahitur, & ver-  
bis suis minimū libertatis permittit:  
scit enim cùm iratus fuerit, mala non  
tolli; sed fieri graviora. Sicut aves,  
dum viscum trepidantes excutiunt,  
plumis omnibus illinunt: sic omnis  
indignatio in tormentum suum pro-  
ficit. Plus nocet ira quam injuria. Qui  
irascitur, se ab alio contemptum pu-  
tat; verus autem æstimator sui non  
vindicat, quia non sentit. Ultio con-  
fessio doloris est. Non est magnus ani-  
mus, qui repetit mordentem.

5. Auditâ voce maledicentis statim  
animadvertendum, non quid illum  
audire, sed quid te deceat loqui. Non  
tantum licere debet alienæ perversi-  
tati, ut serenitatem tuam obducat.  
Deus, qui omnia potest, tot improbos  
homi-

homines suffert : tu cæteris deterior,  
unum ferre non poteris ? Ridiculum  
est te non corrigere malitiam tuam,  
quod potes ; aliorū velle tollere, quod  
non potes. Si tot peccatorum reus es,  
quicquid pateris nihil est compara-  
tione geheñæ, quam mereris. Quis es  
tu, cuius aures lædi nefas sit ? Seipsum  
offendit, quia peccat , qui facit inju-  
riam: tibi enim quid accidit ? Id quod  
ab æterno decretum est pro tua salu-  
te. Audi quid dicat Deus : Si dimiseri-  
tis , & ego dimittam vobis. Ad hoc  
tonitruum si non expurgisceris, non  
dormis , sed mortuus es. Danda est  
alienis vitiis venia, ut tuis impetres.

6. Tollenda ex animo suspicio est,  
fallacissimum iræ incitamentum. Ille  
me parùm humanè salutavit, ille in-  
choatum sermonem citò abrupit, il-  
lius vultus aversior visus est. Nec de-  
rerunt suspicioni arguienta, & con-  
jecturæ ; cùm semper ad malū creduli-  
simus. Major injuriæ pars constat vi-  
tio interpretantis. Quare simplicitas  
necessaria

necessaria est, & benigna rerum æstimatio. Age contra te absentis causam sitq; tibi hoc vitium suspectum ; quod quæ inviti audimus , libenter credimus ; & antequam judicemus, irascimur. Dandum semper est tempus : veritatem dies aperit. De parvula summa judicaturo res tibi sine teste non probaretur ; amicum verò condemnas , antequam audias ? Rebus quæ referuntur statim fidem adhibere , imprudentis hominis est. Multi mentiuntur , ut decipient ; multi, quia decepti sunt. Qui aliquid clam dicit, penè non dicit. Quid ini quis, quām secretō credere , palam irasci ? Denique non expedit omnia videre, omnia audire. Non accipit injuriam, qui nescit.

7. Cum scis aliquem malè loqui de te , interroga conscientiam tuam, an ipse priùs de illo loquutus sis. Tum cogita, de quam multis loquaris. Faciet te moderatiorem respectus tui , si te ipsum consulueris. Nam cur alie-

næ luxuriæ non ignoscis , qui nihil  
tuæ negâsti ? cur mendacia perseque-  
ris , ipse perjurus ? cur tibi licentiam  
in alios permittis, in te non vis ? Suc-  
currat non tantum quid patiaris , sed  
quid feceris. Quicquid in alio repre-  
hendis, invenies in sinu tuo. Omnes  
mali sumus : communi vitio danda  
est venia. Et si nihil tale fecisti, at po-  
tes facere. Qui stat, videat ne cadat.

8. Quid novi fit, si inimicus nocet,  
amicus offendit, filius labitur, servus  
peccat? Hæc omnia ita consueta sunt,  
ut rosa vere, fructus æstate. Sicut pro-  
peranti per frequentia Urbis loca ali-  
cubi labi necesse est, alicubi retineri,  
alicubi respergi: ita in hoc vitæ actu  
dissipato & vago multæ incidunt  
querelæ, multa impedimenta. Cur  
indignaris à viro malo injuriam pas-  
sus ? Quod suum erat fecit. Tu vero,  
si bonus es, boni viri munus exerce:  
cura ut illum bonum facias. Hoc  
autem non fit ultione, sed patientiâ,  
& beneficiis: & si non bonum, saltem  
bene-

benevolum reddes : si neutrum , te procul dubio meliorem efficies. Ille detraxit de fama tua:graviter tibi insensus est. Quid hic tu ? Non credo. Si quid dixit , errore deceptus dixit , mente non malâ, zelo bono : prodesse voluit, aut certè læsus à me fuit. Non est injuria , pati quod prior feceris. Verè illam culpam admisi, reus sum ; æquum est justitiæ cedere. At gratis impugnor, & sine culpa. Quid inde ? Christum imitabor, & dicā cum Propheta : Obmutui , & non aperui os meum; quoniam tu fecisti. Alienâ dicta, aut facta tibi mala non erunt, et si revera mala sint, nisi male eis utaris, Talia sunt , qualis usus eorum.

9. Quæ est causa offendionis ? Opinio. Tolle damni opinionem, & nihil nocebit tibi. Nulla res attingit, aut movet animum, aut ad ipsum intrat : solus ipse se ipsum movet ; & quale tulerit iudicium , talia fiunt ea quæ accidunt. Nihil te lædet, nisi tute ipsum læseris. At malus est , inquis,

qui

qui me persequitur. Expecta: dabit alteri pœnas, quas debet tibi; & jam sibi dedit, quia peccavit. At ratione præditus est; quare non emendat se? Et tu, qui ratione præditus es, cur non corrigis impatientiam tuam? cur non vincis in bono malum? Alienæ vitia in oculis habes; à tergo tua sunt. Sed age, quisquis es, cui dulce videtur ulcisci, datur tibi optatæ ultionis facultas; cum hac tamen justissima lege, ut à majori incipias. Ordo injuriæ præscribat ultionem. Graviorem omnium hostem iram tuam habes; hæc plus te offendit: ab ista auspicare vindictam. Non sunt quærendi in platea adversarii, dum infensor domi latet. Plato iratus in servum, manum quam percussurus sustulerat, suspendit dicens: Cæderem, nisi irascerer. Priùs voluit iracundiam flagellare, quam servum; digniorem flagris existimans dominum irascentem, quam servum negligentem. Quò quisque honestior est, eò fortius iram comprimit.

10. Judices, & qui præsunt populis  
iram interdum ostendere debent, ac  
etiam exhibere; ita tamen, ut rationē  
non præveniat, sed quasi ancilla sub-  
sequatur. Corrigendus est qui peccat,  
& castigandus; sed sine ira. Si vir  
bonus irasci turpiterfactis debet, om-  
nis illi per iracundiam vita transibit.  
Quod enim momentum erit, quo nō  
videat improbanda? Deficiet, si toties  
à se iram, quoties cauſsa poscet, exe-  
gerit. Placidus itaque & æquus er-  
rantibus, talem affectum erga illos  
habebit, qualem medicus erga phre-  
neticos. Sicut non commoveris ob  
algores & fervores, qui à tēpestatibus  
suas vices obeuntibus inducuntur:  
ita nec irasci debes propter injurias,  
quas improbi homines pro sua natu-  
ra inferre solent. Ægri intemperantes  
sunt, in quibus nihil est fani. Satis a-  
cerbâ erga contumeliosum vindicta  
est, nullam petere ab eo vindictam.  
Ille lædit ut doleas; si tu non doles,  
ipſe dolebit, videns ereptam sibi con-  
tumeliæ

tumeliæ voluptatem ; adeò fructus  
injuriæ in sensu & indignatione pati-  
entis positus est. Convitia, si irascare,  
agnita videntur ; spreta exolescunt.  
At turpe est, inquis, contemni, læ-  
sumque honorem non reparare. Imò  
turpe est timere contemni : non enim  
hoc timet, nisi qui contemni dignus  
est. Non respicit sapiens, quid homi-  
nes turpe judicent, nihil illi turpe, ni-  
si peccatum. Contemnor, ait, ab ali-  
quo? Ipse viderit. Ego curabo, ne quid  
contemptu dignum agam, aut lo-  
quar. Odit me aliquis? Viderit. Ego  
omnibus ero placidus, & benignus.  
Sic invicta patientia, improborum  
malitiā superat & fatigat ; Deūmq;  
imitatur, qui ignoscit, qui patientissi-  
mus est, & scelera nostra suis benefi-  
ciis vincit. Majoris animi est, non  
agnoscere injuriam, quam  
ignoscere.

\* \* \*

\*

## CAPUT VIII.

*De Invidia, & Acedia. Utriusque  
descriptio & curatio.*

¶ **I**nvidia sui vindex prius in propria sœvit viscera, quam in proximi bona. Alia vitia ultrix pœna à tergo sequitur; huic etiam præire solet. Invidus enim alienam felicitatem suum facit tormentum, & de vicini pinguedine ipse macrescit. Simul peccat & plectitur, quem hæc pestis invasit. Cætera vitia certo alicui bono contraria sunt; hoc omnium bonorum inimicum est, omnium rerum naturam pervertit. Adversatur diuinæ bonitati, cui proprium est omnia bona sua communicare: adversatur statui Beatorum, qui aliorum felicitate, ut suâ, potiuntur: adversatur Christianæ charitati, quæ de bonis etiam inimicorum lætatur: adversatur denique legi naturæ, quæ nos omnia bona nostra aliis etiam optare jubet. Sicut oculus eo morbo affectus, quem

Oph-

Ophthalmiam Medici vocant, splendidis omnibus offenditur : ita invidus aliorum virtute, & claritate cruciatur. Invidia dicitur ; quia alterius excellentiam nimis videt.

2. Invidet Satan , sed hominibus ;  
sociorum nemini: tu verò homo cùm  
sis, hominibus invides ; quod nec Diabolus quidem facit. Hoc autem animi  
pusilli est, & proprio judicio se ad infi-  
ma abjicientis : neque enim alteri in-  
videres, nisi eum meliorem te, & su-  
periorem arbitrareris. Vis invidiâ ca-  
rere? Sperne hujus mundi fugacia bo-  
na, & dilige æterna. Amor æternita-  
tis, mors invidiæ est. Non potest mor-  
talia bona aliis invidere, qui sola sem-  
piterna concupiscit. Quis unquā Prin-  
ceps futori invidit, aut sarcinatori, ar-  
tium suarū vilia servitia ? Non se de-  
mittit ad hæc infima mens sublimio-  
ribus occupata. Nonne satis est propriis  
malis angi, quæ tā multa sunt, nisi &  
aliena bona te torqueant? Nunquā eris  
felix , si te cruciat felicior. An putas  
bonas,

bona, quæ invides, alteri erepta, ad te posse transferri? Habet proximus tuus divitias, floret scientiâ, supereminet dignitate. Hæc omnia tua erunt, si ipsum amaveris. Plurimis abundat bonis, qui amat aliena.

3. Jungo Invidiæ Acediam; quia utraq; tristitia est: illa de alieno bono, hæc de proprio. Utraque ad pusillos spectat: nam parvulum occidit Invidia; & Acedia vitium est languentis animi, bonorûmque spiritualium tædio laborantis, qui rei magnitudine ac difficultate deterritus, nihil unquā homine dignum aggrediatur. Vult, & non vult piger; semper varius & inconstans, sibi gravis, aliis molestus, & continuo sui tædio pœnæ incubans suæ. Similis est trocho, qui in orbem quidem agitatur, sed non progreditur; atq; ita per flagri vim movetur, ut tamen semper insistat. Voluisse eum aliquid deprehendes, sed non fecisse. Omnis ejus operatio insipida, & instar tepentis aquæ vomitum

provocans non hominibus tantum,  
sed & ipsi Deo. Frustra igitur salutem  
speras, nisi excusso torpore generosos  
assumas spiritus, & acrioribus stimu-  
lis ad magna te cogas. Ut avis ad vo-  
latum, ita homo nascitur ad laborem:  
& ut desint labores pro Deo assumti,  
satis cuique pœnarum imponit mun-  
dus. Quantum ille laborat, ut divi-  
tias consequatur? Quantum ille pa-  
titur, ut ad optatam perveniat digni-  
tatem? Magno vitia coluntur. Quod  
si fugacia bona tanto sudore merca-  
ris; cur non parem adhibes diligen-  
tiam, ad fœlicissimam æternitatem  
comparandam? Ah! pudeat segnem  
esse in re tanti momenti. Brevissi-  
mus labor est; merces æterna. Ni-  
hil est tam arduum & tam difficile,  
quod mens humana, Deo duce non  
vincat. Fortiter aude; & difficulta-  
tum spectra disparebunt. Quicquid  
sibi animus imperavit, obtinuit.  
Age quod potes; omnia poteris. Ad-  
juvat facientem Deus.

*De Superbia, Ambitione, & inani  
Gloria. Icon superbi. Dignitatum  
vanitas, & pericula. Tumoris  
mala, & alexipharmacæ.*

1. Superbia, ambitio, & inanis gloria cognata sunt vitia; è quibus, tanquam Oceano, omnium malorum flumina oriuntur. Nam cùm sibi profine propriam excellentiam proposuit homo, huc omnia dirigit, spreto Dei cultu, neglectâ hominum reverentiâ. Et si illi aditus ad gloriam non patet nisi per scelera; per scelera ad gloriam ibit; viamq; sibi ad prætentum decus aperiet, per dolos, & fraudes, proximiq; ruinam, & cædem. Superbus, Deo odibilis, humano generi intolerabilis, omnia studia, & opera sua ad captandam hominum laudem inflectit. Se gradu potiori dignum putat, sibique in illo maximè complacet. Majora viribus temere aggreditur omnibus negotiis

se ultrò ingerit, se ipsum impudenter extollit; cæteros aspernatur. Callide simulat humilitatem, ut à se remo- veat ambitionis suspicionem. De gradu dejectus, omnia querelis im- plet, suscitátque rixas, & odia. Erga inferiores serum se & truculentum exhibet: erga superiores assentator est, quovis mancipio timidior, & ob- sequentior. Bona, si quæ habet, non Deo, ut par est, sed sibi arroganter at- tribuit. Affectat in omnibus videri; deque rebus altissimis, quas ignorat, quasi ex propria experientia, subtili- ter differit. Aliorum facta curiosè in- quirit, temerè judicat, severè da- mnat: auget vitia, laudem imminuit. In sermone & incessu fastnm quem- dam præ se fert, aliorūmq; contem- ptum. Odit correctionem; respuit consilia, monitis non acquiescit. Bo- na sibi opinatur adesse, quibus caret: & quæ habet, multò majora sibi fin- git, quām sint. Ideò indignatur, & ad pessima quæque flagitia se dejicit,

si cæ-

si cæteris tanquam dignior non præferatur , si se & sua negligi suspicetur. Fluctuat cor ejus pérpetuis motibus ; quia cùm honor, quem cupit, in aliena sit potestate , necesse est illum turbidis affectibus continuò agitari. Initium omnis peccati est superbia.

2. Pone in statera, si sapis, & compara cum minima æternæ fœlicitatis particula, quæcumq; tibi optanda in hoc sæculo videntur, regna, imperia, Orbem denique totum ; excutiet illa suo pondere mundum universum cū pompis suis, tanquam solium , quod vento rapitur. Erige te ergo ad æterna ; & te dignum fac cœlo, cui natus es. Excute superbias tuæ excellentiæ cogitationes & te veris bonis metire. Si te Cæsar adoptâisset in filium ; quis ferret supercilium tuum ? Nunc autem Dei filius es, Christi sanguine redemptus. Cur non cogitas originem tuam ? cur te abjicis ad terrena , tuo genere prorsus indigna ? Ad cœli & siderum domi-

dominatum te vocat Pater: ad possessionem semper duraturam. Hic ingentes sume animos, hac promissione extollere, ab hoc Patre nobilitatem tuam jacta, ad ejus similitudinem mores tuos compone. Hæc est via, quæ ad veram gloriam perducit.

3. Quid sunt sceptra, quid coronæ? Fulgidæ compedes, & clara miseria, quæ si plenè hominibus nota esset, nunquam de solio litigarent. Plura essent regna, quam reges. Magna servitus est, magna fortuna. Isti, quos vulgus beatos censet, longè aliter de se sentiunt: nam gravior ipsis incubit fælicitas, quæ graves illos populo reddit. Tunc laudant otium lene, & sui juris. Tunc odio est illis fulgor, quem priùs admirabantur. Tunc attoniti & trementes de terrenorum vanitate philosophantur. Tunc mortem formidant, & tremendum Dei judicium: ante cuius conspectum nihil proderit tanto studio quæsita dignitas, tot parta sudoribus, & empta

sanguine. Sic igitur vive, ut securum te inveniat illud tribunal. Qui nunc humiliatur, tunc exultabitur.

4. Insanis, si te putas adeptâ dignitate securum, & quietum fore. Quod olim licuit, jam non licebit: minor licentia in magnis est. Quò altior fures, eò magis vitia tua apparebunt. Non latet qui in fastigio est. Si quæ tibi olim tranquillitas fuit, jam periit. Nullum tibi secretum liberum erit: nullum poteris diem ex arbitrio tuo disponere. Magni sunt ex alto casus. Frustrà requiem ibi quæris, ubi omnes periculum, & laborem, multi miserum vitæ exitum, invenerunt. Non capiunt securas dapes regiæ mēsæ. Auro & gemmis bibuntur toxica. Quot Reges proprio sanguine solium purpurârunt? Lubrica in summo statio est; pendula omnia, & præcipitio proxima. Tutiùs itur per plana. Quām magnus admirantium, & plaudentium numerus, tam magnus invidientium est. Quanti ibi insidian-

tium

tium acervi , & oppugnantium ?  
quàm intuta omnia , & suspecta ?  
Non servis fides , non amicis , non  
filio , non fratri. At humi jacentem  
domum non intrant scelera. Secu-  
rus vivit qui latet. Nullum timet,  
quem nemo timet.

5. Si equum videres , aut canem,  
inter cætera suæ speciei individua  
principatum assumere ; numquid ri-  
sum cohibere posses ? Tu verò majori  
cachinno dignus es , si super reliquos  
homines te extollis ; quòd ditior aliis,  
seu potentior sis. Quid superbis terra,  
& cinis ? Nemo efferrri potest nisi ex  
proprio bono. Quid est autem tuum  
bonum , si omnia à Deo accepisti ; nihil  
tuum nisi peccatum. Quod si omnia  
accepisti , illi redde gloriam , qui tibi  
bona sua largitus est. Numquid e-  
quus equo præfertur ; quia multum  
pabuli habet , & multum hordei ;  
quia frænum aureum , & gemma-  
ta ephippia ? Nequaquam ; sed  
qui celerior est , alium antecellit.

Ita homo, ni stultus sit, gloriam ex eo non quærit, quod est extra se. Sed melior, inquis, sum, & nobilior cæteris. Si hoc dicis, omni honore indignus es; quia nemo dignè honoratur, nisi vir bonus, qui honorem spernit & gloriā. Vera nobilitas nescit extolli; & ubi vitæ splendor est, ibi quoque modestia reperitur. Maxima sublimiū gloria est, quām maximè se submittere.

6. Cognosce conditionis tuæ imbecillitatem, metire corpusculum tuum multa reperies in te, ob quæ deprimi debeas; nihil, quo possis extolli. Noli Geometras, & Philosophos spernere: omnis terra punctus est. Quām misere desipis, si regna in punto statuis, & dividis dominationes. In parvo nemō magnus. Hæc terra, quam tumido incessu premis, mox te premet: nec amplius ex ea possidebis, quām frigidis & putrescentibus membris occupabis. I nunc, & in hoc nihilo magna & immortalia ædifica. Hic fu-  
rores tuos, hic elatā exerce insolentiā.

Dilata hic cupiditates tuas ; hic acies,  
hic bella molire. Cùm multùm insa-  
nieris, ferò tandem cognosces, quàm  
vana dignitatum nomina , quàm fal-  
laces honorum tituli fuerint. Vitre-  
um est, quicquid hic lucet : dum splen-  
det , frangitur. Magnæ arbores diu  
crescunt ; unâ horâ extirpantur,

7. Magnum superbiæ irritamentū  
præcidisti si lateas. Nemo oculis suis  
lautus est , nec paucorum quidem &  
familiarium ; sed apparatus vitio-  
rum suorū pro modo turbæ spectan-  
tis expandit. Quis eam , quam nulli  
ostenderet , induit purpuram ? Quis  
posuit secretam in auro dapem ? Quis  
sub umbra rusticæ arboris luxuriæ  
fuæ pomparam solus explicuit ? Ambi-  
tio scenam desiderat; nec ullibi poten-  
tiùs vires suas exerit, quàm inter ho-  
minum laudes. Apis si mel fecit,  
equus si cucurrit , arbor si fructum  
protulit, nihil ultra quærunt : homo  
plausum desiderat , digitóque mon-  
strarí, & dici, hic est. Sed si attentiùs

consideraveris, qui sint isti à quibus  
optas laudari; nihil faciliùs, quàm  
vulgi plausum, contemnes. Homi-  
nes vani, & mutabiles sunt; quos  
sæpè dicis insanire, qui se omni horâ  
amentiæ damnant, & sua sæpè re-  
probant consilia. Brevis vita est &  
laudantis, & ejus qui laudatur, fitque  
id in angulo terræ, quæ punctum est:  
ac ne ubi quidē omnes consentiunt;  
nec quispiam sibi ipsi. At magnum  
est laudari à posteritate: ab his nimi-  
rūm, quos neque vidisti, nec unquam  
videbis. Cur non doles, te non fuisse  
laudatum ab his, qui ætatem tuam  
antecesserunt? Sed finge, immortales  
eos fore, qui tui recordantur, tuique  
futuram immortalem memoriam:  
quid hoc tibi mortuo proderit? quid  
prodest vivo? Sæpè laudaris ubi non  
es, & cruciaris ubi es. Pretium cu-  
jusque rei in ipsa est: nec melior fit,  
si laudetur; nec deterior, si laude ca-  
reat. An sol, si desint spectatores, de-  
luce quidpiā amittit? An carebit dul-  
cedi-

cedine ficus, flos venustate, gemma nitore, nisi encomiis celebrentur? Magnum argumentum est animi ab aliori sede venientis, laudes hominum aspernari, & seipso contentum esse. Laudes perdis, si desideras: nam quid laudabile in te est? quanta est fragilitas tua, quanta miseria, quanta salutis tuæ incertitudo? Servus inutilis es, et si omnia feceris, quæ præstare teneris. Quâ verò fronte audibis dicere, te omnia fecisse quæ debes? Time igitur, ne intus non sis; quod foris diceris: & cave, ne ea laudentur in te, ob quæ ipse discipes tibi. Redde Deo, quæ ab ipso habes, esse, vivere, intelligere: nihil supererit tibi nisi peccatum. Nihil ergò cum sis, de nihilo gloriari non potes. Incipies esse aliquid, cum te nihil esse cognosces.

•S( O )S•

## CAPUT X.

*De totius corporis, sensuumq; exte-  
riorum moderatione. Quantum  
corpori indulgendum. Castigan-  
da oculorum licentia. Vestium,  
luxus damnatur.*

I. **H**Anc sanam & salubrem vitæ formam teneto, ut corpori tantum tribuas, quantum valetudini satis est. Durius tractandum ; ne animo male pareat. Indulgendum illi, non serviendum. Cibus famem sedet, potio sitim extinguat, vestis arceat frigus, domus munimentum sit adversus injurias temporum : ad alia, quæ inutilis labor, veluti ad ornementum, adjecit, subsiste pavidus, & time; his enim insidiæ adversus animam parantur. Omne honestum vile est ei, cui nimis carum est corpus, qui pro illo nimium timet. Major es, & ad majora genitus, quam ut sis vile mancipium corporis tui ; quod equidem non

non aliter respicere debes , quam ut  
vinculum animi , & libertatis. Vir  
probus & sapiens ejus curam habet :  
non, tanquam propter ipsum vivat ;  
sed, quia sine illo non potest. Corpus  
instrumentum est animæ. Quis au-  
tem artifex , neglectâ arte, in curan-  
dis instrumentis tempus terit ? He-  
betis ingenii est, circa corporis mini-  
steria occupari.

2. Quia per sensuum fenestræ mors  
in animam ingreditur ; stude illos à  
terrena vita ad cœlestem traducere :  
eosque sensim abducito à nimia ope-  
ris, quod exercent, attentione ; ne se  
avidiùs rerum terrenarum delecta-  
tionibus immergant. Servire sensus  
debent, non imperare. Oculorum in-  
primis castiganda licentia : nam cùm  
celerrimè videant , rerūmque pluri-  
marum imagines ad phantasiam , &  
inde ad mentem transmittant ; gra-  
vium peccatorum semina in appetitu  
excitant, nisi firmâ custodiâ munian-  
tur. Si exterioris oculi rectitudinem

interioris puritas comitetur, Dei vestigia ubique impressa reperies : & cum Deum in creaturis venerari diceras, ex his suaviter attolles animum ad divinæ Majestatis contemplationem. Mulier compta, elaborata luxuria est : nunquam in ea figas obtutum; quia peribis. Comœdias, chorreas, torneamenta, theatrales ludos ne species : dissipant enim mentem, & ludicris occupant curis ; ut se ad cœlum erigere nequeat. Ubi errat oculus, errat affectus.

3. Auditus, sensus est disciplinæ, per quem notio veritatis & sapientiæ, quasi per januam, mentem ingreditur. Sepi itaque aures providâ circumspetione ; ne pro veritate mendacium , pro sapientiâ stultitia in penetralia cordis irrumptant. Claude illas oblocutionibus, claude susurris, claude nugis & rumoribus, claude otiosis narrationibus ; omnique rei, quæ nihil ad animæ profectum confert. Sicut qui audivit symphoniam,

fert secum in auribus modulationem  
& illam , & dulcedinem cantūs , etiam  
cūm discessit: ita malus sermo, quam-  
vis non statim officiat, semina tamen  
in animo relinquit, quæ diutiūs hæ-  
rent, & ex intervallo recurrunt. Deū  
intūs loquentem eò frequentiūs au-  
dies , quò rariūs homines audieris.  
Omnia odoramenta arte confecta, ef-  
feminatorum sunt , & malè audien-  
tium. Ideo, rejecto omni odore, fac ut  
bonis moribus suavissimam virtu-  
tum fragrantiam redoleas. Gustum  
verò castigabis abstinentiâ, & sobrie-  
tate ; Tactum ciliciis, verberibus, du-  
riori strato, aliisque asperitatibus. Sa-  
tius est corpus affligere , & servare ;  
quàm noxiis blanditiis & ipsum &  
animam perdere in æternum.

4. Cùm ex habitu cultúque corpo-  
ris internus animi status palam fiat ;  
ea procul à te sint , quæ solent indi-  
cium esse animi pravi & perturbati.  
Qui olim sapientes inter Ethnicos di-  
cebantur nec digitum quidem sine  
ratio-

ratione exerere viro probo permise-  
runt. Tantam à te rectitudinem non  
exigo, sed opto: idq; edico, ut absti-  
neas à risu, à scurrilitate, à dissoluti-  
hominis licentiâ, à manuum gesticu-  
latione, à præpropero incessu. Ut ni-  
hil in te appareat, quod possit offendere intuentes: non sordes vestium,  
non frontis rugæ, non motus incom-  
positi, non signa contemptûs, seu ani-  
mi abalienati, non quicquid nau-  
seam, vel fastidium parit. Multa pos-  
sunt honestè fieri, quæ non possunt  
honestè videri.

5. Homo nudus creatus est & non  
erubescet; non enim poterat rubo-  
re eum afficere nuditas ignorata.  
Postquam verò peccavit, abjectâ in-  
nocentiæ chlamyde, quæ satis eum  
tegebat; externa vestis pudori velan-  
do necessaria fuit. Sed quod olim in  
pœnam irrogatum fuit, nunc in  
dignitatis prærogativam transivit.  
Quæruntur vestimenta, non quæ te-  
gant, sed quæ ornent, quæ alienis  
oculis

oculis ac libidini placeant. Index ani-  
mi vestis est. Nimia ejus accuratio, to-  
tusque vultus de speculo & capsula,  
muliebris ingenii est. Pudebit cultus  
exterioris, si cogitaveris quid eo tega-  
tur. Qui habet intus ornamenta vir-  
tutum, non querit externa. Ostentari  
virtus sine fuso gaudet: quicquid ad-  
dideris, minus est illâ. Vanus homi-  
num error est, fulgere purpurâ, mente  
fordescere. Quidam se catenis one-  
rant; sed quia aureæ sunt, infamiam  
servitutis non metuunt. Aliquos non  
ligat aurum, sed figit: nam per vulne-  
ra infigitur auribus, è quibus sëpe pa-  
trimonia pendent; & quæ olim pœ-  
narum nomina, nunc ambitionis  
sunt. Non paucos videbis inter pecti-  
nem & speculum diu occupatos, qui  
magis solliciti de capitis sui decore  
sunt, quam de salute. Ita prævalue-  
runt stultorum hominum depravata  
judicia, ut se rebus ornari putent,  
quas calcare deberent. Sit igitur vestis  
tua artis expr̄s; non ad pompam,

sed ad necessitatem, infra fastum, supra fordes, & ad vitæ conditionem temperata. Auro te licet & margaritis exornes, sine Christi decore deformis es. Hic est decor qui semper manet; qui non carnem morituram, sed teipsum intus exornat. Infana ambitione est, simum tegere auro.

## CAPUT XI.

*De custodia lingue. Quantum momenti sit, & quam difficilis. Quid in sermone servandum; quid vitandum. Qualiter toleranda vitiosa aliorum lingua.*

1. **T**anti momenti est custodire linguam, ut majori cura servanda sit; quam pupilla oculi; quia mors & vita in manibus linguæ. Qui eam prohibere nequit, urbi patenti absque murorum ambitu comparatur. Vix tamen domari potest sine speciali Dei auxilio. Domat homo leonem, domat taurum, domat ursum; &

non

non domat linguam suam. Innata est enim naturæ humanæ loquacitas; ut quod cupid & concipit, statim proloqui gestiat. Tam lingua vicina est cerebro, os phantasiæ; ut quod illa cogitat, mox derivet ad os, & in verba effluat. Docuit te natura, quām sit necessaria linguae custodia, cùm duplex ei munimentum objecerit, dentium & labiorum. Sicut autem odor unguenti, pyxidis ore non obstructo, evanescit; ita patente oris januâ, omnis animi vigor dissipatur. Malè sibi attendit, qui linguae jugiter non attendit.

7. In omni locutione cautus esto, illam comprimens immoderatam affectionem, quâ plerique impelluntur, ad sententiam vix conceptam temerè effutiendam, sine examine, & delectu. Fuge duplicitatem, & simulationem; sensusque animi, absque involucro & ambiguitate, purissimè profer. Data est tibi à Deo loquendi facultas; ut eâ res, sicuti sunt, verè &

candidè enunties. Loquuturus, ipse te consule, an ulla in te exæstuet affetio immoderata; nec quicquam linguae permittas, donec commotio cefset: alioquin plura effundes, quæ te postea dixisse pœnitabit. Facile silebis, si nulli perturbationum clamores in corde perstrepant: si fuerit in anima solitudo & serenitas. Non potest esse aliis sermoni, aliis animo color. Si mens sana est, si temperans, si composita; sermo quoque siccus ac sobrius erit. Èa vitiatâ, hic quoque afflatur. Cujus notæ quisque sit, indicium oratio est.

3. Nullus sit sermo otiosus. Sicut eligis, quo vescaris; sic elige, quod loquaris. Cibum, per os ingressurum, examinas; cur non verbum egressum, quod sæpè in domo tua graviores tragœdias excitat, quam cibus in tuo stomacho? Assuesce plurimum tecum, minimum cum aliis loqui. Viros sapientes sæpè pœnituit, locutos fuisse; nunquam vero, tacuisse.

Animalia, quæ sapientiora censentur, parùm quoque vocalia sunt. Garrulitas vitium puerorum, & mulierum est, quibus minus rationis inest. Nihil virtutis in eo est, è cujus ore non nisi vana, & inutilia prodeunt. Si Deum amares, si tuæ salutis studiosus fores, omnia colloquia tua de Deo essent, de virtute, & perfectione. Nescit amor mentiri; tegi non potest. Profunditur quisque in ea, quæ amat; & quæ latent in mente, frequentius ad linguam recurrunt. Ideò minùs libenter de rebus divinis loqueris; quia nondum è fæce vitiorum emeristi. Accedit exigua lectio, & meditatione eorum, quæ pertinent ad salutem; ut etiam loqui volentem materia deficiat. Ex abundantia cordis, os loquitur.

4. Omnis ferè sermocinatio in congressu hominum, de aliorum vita, moribus, & studiis est. Tot quisque judices habet, quot sunt capita in civitate. Vix ullus est, qui oculos domi

habeat. Cæcutimus plerique in propriis vitiis discernendis, erga aliena acutissimi. Convitia in proximum plenis valvis admittimus; laudibus vix rimæ patent. Hoc vitium quòd communiùs est, eò studiosiùs vitan-dum. Satis tibi negotii cum vitiis tu-is: ea carpe & emenda. Arcana tua, si-vè aliorum, quæ celare ex officio de-bes, nemini evulges. Plerosque conti-git in perplexas incidisse quæstiones, quod imprudenter, quibus non opor-tuit secreta crediderint. Sive uni, si-vè pluribus dixeris, idem est. Facile sermo ab uno ad alterum effluit · ab hoc ad omnes. Oritur hæc facilitas ex hoc præcipue; quòd cum plus justo protrahitur sermo, sensim irrepit dulcedo quædam confabulationis, non aliter afficiens animum quàm ebrietas: quare nullum secretum tam abditum & sacrum est, quod non erumpat. Ille tibi arcana sua aperit, tu, veluti pignore fidei accepto, tua vicissim illi communicas.

Sed

Sed tu forsitan audita retices; ille  
obvio cuique refert: & cùm omnes  
palàm ignorent, clam sciunt. Lin-  
guas diceres per omnium aures secre-  
tò volitare, donec tandem arcanum  
superfluit, & rumor fit. Quicquid  
mali sub cælo est, aut lingua peperit,  
aut promovit. Ideò verbis tuis sta-  
teram fac, & frænum ori tuo; nihil  
que loquaris, quod tacuisse melius  
sit. Laudabilior est verborum par-  
simonia, quàm pecuniæ. Qui num-  
mos prodigit, dum sibi nocet, aliis  
prodest; verborum prodigus, & sibi  
nocet, & aliis. Ad divinitatem pro-  
piùs accedit, qui multa audire scit,  
& pauca loqui.

s. Nihil linguæ inaccessum. Non  
sunt immunes á criminationibus  
principes terræ, quos extra ferri me-  
tum potentia collocavit: non viri  
sanctitate conspicui, quos censuræ  
subduxit innocentia. Ipse Christus,  
cùm inter homines degeret, linguæ  
flagellū non evasit. Ad horū exempla

erige patientiam tuam. Stimulus  
quidam virtutis est obtrectatio , &  
frænum ne à recto tramite devies.  
Nullus capitalior vitiorum hostis ,  
quam censura. Cùm quis perperam  
de te loquitur , doceris quid caveas.  
Vis venenatæ linguae morsus evade-  
re ? contemne. Nullum vulnus habe-  
bis , si tacueris , plus tribuens bono-  
rum judicio , quam criminantis info-  
lentiæ. Parùm refert , quid alii de te  
sentiant. Est intùs in anima testis  
certior , & incorruptior. Conscien-  
tiam tuam interroga , & illi crede.  
Quid turpiùs , quam ab insipientium  
sermone pendere , & propriam existi-  
mationem in aliornm judiciis repo-  
nere ; Quicquid alii de te dicant , te  
oportet bonum esse : haud aliter ,  
quam si aurum vel smaragdus dice-  
rent ; Quicquid alii dicant , me au-  
rum esse : me smaragdum oportet , &  
colorcm meum servare. Si quis dulci  
ac limpido fonti convitum faciat , an  
propterea cessabit puram aquam sca-  
turire ?

turire? Et si quis lutum injiciat, nonne statim eluet ac dissipabit? Ita nec tu tranquillum animi statum turbare debes, etsi mali te lacerent, & calumnientur. Exigua sui æstimatio est, ad omnem rumorem commoveri. Pueri os parentum feriunt, matris crines turbavit infans, momordit ubera, laceravit genas, & sputo aspergit: & nihil horum contumeliam dicimus; quia qui fecit, contemnere minimè potest. Quem itaque animalium habent parentes adversus pueros, eundem habe adversus eos, qui te calumniantur. Si te semel eò demiseris, ut injuriâ movearis, eum qui fecit honorabis. Necesse est enim, ut ab eo suspici gaudeas, à quo contumni molestè fers. Hoc autem est vitium animi contrahentis se, & descendenteris. Infelix semper eris, si te putas posse contemni.



## CAPUT XII.

*De sensibus internis. Uſus opinio-  
num. Bonis cogitationibus mens  
imbuenda. De coercendo appeti-  
tu sensitivo ejusque pravis affe-  
ctionibus. Variæ ad id prece-  
ptiones.*

1. IN hoc præcipiuus sapientiæ cardo  
vertitur, ut nulla opinio men-  
ti tuæ inseratur, quæ vel naturæ  
vel rationi inconsequens sit. Quare  
omnibus rejectis adversus phantasiæ  
motus exerceri debes, sicut Dialectici  
adversùs sophisticas captiones. Obiit  
filius. Non est hoc in nostra potestate;  
malum non est. Pater illum exhære-  
davit. Et hoc, cùm arbitrii nostri non  
sit, malum non est. At rem illam  
ægrè tulit. Hoc nostri arbitrii est; ideo  
malum. Fortiter tulit. Nostri arbi-  
trii est, & bonum. His si assueveris,  
proficies. Amicus in carcerem du-  
&us

ctus est. Quid accidit? nihil, nisi quod in carcerem ductus est. De suo autem quisque addit; male cum illo actum esse. corrige opinionem, & omnia tranquilla sunt sicut furiosum ligamus, ne cui noceat: ita coercenda phantasia, ne falsis opinionibus obruat mentem. Hæc tanquam fera indomita proripit iesē, & quocunque libuerit per summam licentiam divagatur, garrula, fugax, quietis impatiens, novitate rerum lætissima, nec agnoscens moderationem. Huic igitur studio sedulam operam navare debes, ut eam teneas & alliges, ac in uno figas; ne cogitationes tuæ, animique decreta semper ex opinione suspensa sint. Quæcunque sunt extra animum tuum, nihil pertinent ad te.

2. Quicquid se tibi cogitandum offert examina diligenter; quò tecum ipse differere possis, quæ sit ejus rei nudæ, & ab omnibus aliis separatae natura, quæ proprietates, quis finis, quæ

quæ circumstantiæ, quæ utilitas: an ad te spectet, sitque in tua potestate, necne: alioquin nullum ei accessum præbeas, eique repugna, quantum potes. Deus intimè præsens occultissima cordis tui clarissimè perspicit, nihilque tam abditum est, quod oculis ejus pervium non sit. Vide, ne coram ipso ea volvas in mente, quæ coram honesto viro loqui erubesceres. Sint cogitationes tuæ placidæ, simplices, puræ, omnisque malitiæ expertes. Tales sint, ut subito interrogatus quid cogites; possis sine pudore palam facere quod intus latet in corde. Pudeat cogitare, quod pudet loqui. Malis cogitationibus aditum obstrues, si bonis semper occuperis.

3. Nihil æquè noxiū animæ, nihil magis contrarium, quam inferior, brutalis, & sensitivus appetitus. Hic fons est omnium scelcrum, & imperfectionum: hic hostis, quem semper timere, semper impugnare debes, donec rationis imperio, quantum

tum in hac vita fieri potest, subjicitur. Nulla hic requies, nullum otium datur. Sine fine, & sine modo pugnandum; quia nec finem, nec modum adversarius habet. Latet hic intra te; immo tu ipse tibi hostis es, potentior; quam Xerxis exercitus. Custodi a te ipso animam tuam. Fortius est te invadere, quam urbes, tui portiri, quam rerum. Non exigo ut pravas affectiones omnino conteras, & ad nihilum redigas; sed ut eas regere discas. Satis praestiterit ratio, si eas compescat & moderetur. Iniqui surre Stoici, qui omnes affectus tanquam malos infamârunt. Mala non est, nec supervacua supellex naturæ. Tollit omnem virtutem, qui omnes tollit affectiones. Nullæ sunt victoriæ, ubi nullum certamen.

4. Difficilis sanè hæc lucta est, & prælium anceps: affectus enim nascentur nobiscum; & ratio multis post annis subsequitur, quando illi jam dominantur, & voluntas sine repu-

repugnantia eis paret , specie boni  
inaniter delusa : donec ratio, successu  
temporis & experientiâ , instauratis  
viribus suû agnoscat dominandi jus,  
& affectuum tyrannidi obsistere inci-  
piat, & primi quidem naturæ motus  
inemendabiles sunt; sed attendere ti-  
bi ipsi summâ vigilantiâ debes , &  
cùm primùm te perturbari animad-  
vertis, tunc ratione, quali fræno, eam  
commotionem coercere. Facilius est  
initiis resistere, quàm impetu gubern-  
nare. Brevi tempore ad magnam ani-  
mi tranquillitatem pervenies, si casus  
omnes circumspexeris, antequā eve-  
niant ; ut te paratum hostis aggredia-  
tur. Serò animus ad remedia post pe-  
ricula instruitur. Tum pauca agere, &  
loqui disce : nam si ex his, quæ pluri-  
ma loqueris & facis, ea tollas quæ ne-  
cessaria non sunt , pauciores senties  
animi perturbationes. Neque dicas ;  
hoc parum est, hoc nihil refert. Ma-  
ximum enim est, licet minimum vi-  
deatur , quod est initium virtutis &  
perfectionis.

, Homo vetus à peccatoris Adæ infecto semine trahens originem , si quasi quædam arbor consideretur, habet pro radice amorem sui, pro trunco propensionem ad malum , pro ramis perturbationes , pro foliis vitiosos habitus, pro fructibus opera, verba, & cogitationes , quæ divinæ legi aduersantur. Ne igitur rami pravorum affectionum in folia & fructus erumpant, pone securim ad radicem, & pessimum tui ipsius amorem extirpa. Si hunc sustuleris, omnem inferioris appetitus vitiosam sobolem unico ictu excidisti. Tolles autem & eradicabis , si te ipsum spreveris : si verè credideris, te unum esse ex milibus , nullâ dote singulari præditum, omnique scientiâ & virtute destitutum : si displicere hominibus, & ab illis sperni non metuas : si omni solatio, & commodo libenter careas. Servabis te , si bene oderis : perdes, si male amaveris.

## CAPUT XIII.

*De Amore.* Quæ sit ejus natura,  
quæcausse, qui effectus. De ejus-  
dem remediis. Addita quedam  
de Odio.

I. **A**MOR, complacentia boni; illa, scilicet, prima impressio, quâ afficitur appetitus, dum bonum cognitum ei placet. Hoc cohæret universus Orbis; eoque subacto, qui primum inter affectus locum tenet, facile reliqua turba debellabitur. Bonus amor illuc tendit, undè sumpsit originē: ad bonū accedit; quia à suīmo bono procedit. Discute vitam tuā, & in statera districti examinis appende cor tuum. Observa quis in eo prævaleat amor: id enim quod in lance dilectionis præponderat, hoc tibi Deus est, hoc idolum quod colis. Ideò præcipit Deus, ut eum toto corde diligeres, præoccupare cupiens tuæ mentis affectus; quia quod diligis ex toto corde, hoc tanquam Deum adoras.

2. Impellunt ad amandum, præter bonitatem & pulchritudinem sympathia quædam, & convenientia morum & animorum: modestia item exterior, industria, nobilitas, doctrina, ingenii perspicacia, & alia ejusdem generis, corporis & animi ornamenta. Ipse amor magnes amoris est; cui si accedant beneficia, jam cogitur dilectionem rependere, qui nobiliebat impendere: sunt & quædam naturaliter ad amandum provocantia; nam quibus spiritus lucidiores sunt, cor calidius, subtilior sanguis quiquè sunt facili ac miti naturâ, ad amorem sunt procliviores.

3. Magna est amoris potentia: in rem amatam transformat amantem. Quidam sui exitus amor est, quædam à se peregrinatio, quædam spontanea mors. A se abest omnis, qui amat; nihil cogitat de se, nihil providet, nihil agit: & nisi ab amato suscipiatur, nullibi est. O quam infeliciter amat, qui Deum non amat! Non enim potest in-

ama-

amato esse , qui diligit terrena , quæ  
animam satiare nequeunt ; cùm sint  
finita , & vanitati ac morti subiecta.  
Qui verò Deum diligit, in Deo est ; &  
desinens vivere in se, in eo vivit, in  
quo omnia vivunt , qui est centrum  
nostrum, & incommutabile bonum.  
Amor humanus violentus, & amarus  
est, divinus semper humilis, & tran-  
quillus : illum cruciat zelotypia , in-  
hoc nulla rivalitas est : ille timet, ne  
alius amet ; hic optat , ut omnes  
ament. Ergò si te amas, Deum ama :  
nam quod ames, prodest tibi, non illi.  
Homo mutari potest, & perire: Deum  
nunquam amittis, nisi dimittis.

4. Ut amor, quo socium fortè pro-  
sequeris , sincerus sit ; omnes ab eo  
humanas caussas ingenii, jucundita-  
tis , similitudinis remove , & illas  
dumtaxat quære , quæ in pietate &  
sanctitate consistunt. Pernicies virtu-  
tis est amor , quem Platonicum vo-  
cant ; quo à formæ corporalis aspectu  
animam erigi fingunt ad divinæ pul-  
chritu-

chritudinis considerationem. Formosæ faciei obtutus ad tangendi concupiscentiam excitat ; & quod per oculos exit , sive lumen sit , sive fluxus quidam , hominem colliquat & perdit. Melius est labi pedibus , quam oculis. Sunt autem difficillima amoris remedia : quia castigatus magis premit ; & nisi obstes principiis, ita sensim irrepit, ut te prius amare sentias, quam instituas de amando consilium. Sed si omnino initii repugnes, facilis curatio erit. Aliis quoque rebus occupada mens , quæ curas ingerant, & memoriā rei amatæ dimovent. Tū vitanda omnis admonitio dilecti corporis: quia nihil facilius recrudefecit quam amor ; qui si semel te invaserit , adeò pertinaciter vexabit, ut nō nisi lento remedio temporis, & absentiæ submoveri queat, donec, scilicet , laffus expiret. Multos curavit pudor, dū se digito signari, vulgiq; fabulam fieri doluerunt; & rei fœditatē plenam dedecore, plenā periculis, & pœni-

pœnitentiæ obnoxiam considerârunt.  
Aliis profuit attentè disquirere mala,  
& incommoda rei amatæ , quæ ejus  
decorem & amabilitatem imminue-  
rent. Demum juvabit , amorem ad  
Deum, ad virtutem, ad æterna præ-  
mia, ad ea nimirum, quæ verè amabi-  
lia sunt, convertere ; ut bonus amor  
malum pellat amorem , & mens ho-  
minis generosa vilissimo terræ amo-  
re fordescere erubescat. Mali amores,  
bonos mores inficiunt.

5. Omnia colligavit natura amato-  
riâ quâdam catenâ. Hæc cogit & co-  
pulat stellarum choreas in cœlo, volu-  
crum examina in aëre , armenta bo-  
um , in pratis , greges pecudum in  
montibus, turmas ferarum in silvis.  
Sacer autem hic nexus à solo rumpi-  
tur odio : ut enim amor ad unionem,  
ita odium ad divisionem & dissensio-  
nem tendit. Huic affectui facile sub-  
jacent ignavi, timidi, & suspiciofi qui  
undicūque damnū metuunt. Sunt &  
quidam homines ita nati, ut oderint  
omnes,

omnes, qui tanquam diræ alites tenebras quoque suas exosas habent. Si quis hujus notæ occurrerit tibi; non odio illum, sed miseratione prosequere. Sicut in palæstra caves à collusore placidè & sine ira, ita in omni vita ab eo sine odio declina, qui tibi contrarius est. Odiū verò compesces excitando animū ad amorē, per considerationē alicujus boni in eo, quod odio habetur. Nullus in te odio locus erit, si omnia in bonum interpreteris. Tum applicandum est odium ad ea, quæ verè illud merentur; quæ sunt deformitas peccati, & æterna damnatio. Si ad alia ipsum vertis, non rem quam odisti, sed te ipsum lædis, & perdis. Nam si etiā inimicos juberis diligere, quem debes odire? Abeundum est tibi extrà rerum municipium, ut inventias quem odire liceat. Extra rerum naturam malum est in quod solum justè exerceri odium potest. Quod si hominem odire debes, neminem ita ut te: nemo enim tantum tibi nocuit, quantum tu ipse.

CA-

## CAPUT XIV.

*De desiderio, & fuga. Quid desiderandum, quid fugiendum sit.*

I. **F**ELIX est qui subjectus est Deo, qui nihil impensè desiderat, qui se rebus accommodat, qui dicit: Vult me Deus incolumem esse, vult me ægrotare; vult me divitem, vel pauperem: vult me hinc migrare, vel hic morari? Ad utrumque paratus sum. Si semel dixeris: Quando illuc ibo? Quando illud habebo? miser eris. Nam si id concupiscis, quod extra te est, perpetuâ anxietate cruciaberis; &, tanquam in orbiculari machinâ, semper sequeris, nunquam assequeris. In tua potestate sunt opiniones, cogitationes, affectiones, & quælibet actiones tuæ: extra eam corpus, divitiæ, gloria, dignitates, & quicquid ipse non agis. Illa nec prohiberi ab aliquo, nec impediri possunt, hæc aliena sunt, & impedimentis obnoxia: quare ea omnino non appetes;

vel

vel ita saltem, ut scias ab aliorum arbitrio pendere, & diu tecum esse non posse ; quia sic exigit eorum conditio. Nulla res externa desiderabilis est : præterit enim figura hujus mundi. Etsi omnia votis respondeant ; quicquid habueris, dolens & invitus in morte relinques. Intro respice : intus est fons boni , semper scatulans , si semper fodias.

2. In hoc uno posita fuit quorundam veterum philosophorum sapientia , qui fortunæ imperio exempti inter ipsos corporis acerrimos cruciatus litem beatis mentibus de felicitate movebant. Nam cum terminos potestatis homini à Deo concessæ contemplarentur , sibi plane persuadebant,nihil præter affectiones & cogitationes suas ad se pertinere. Ideoq; tam absolutum in eas imperium hujus meditationis usu acquirebant, atq; ita animi motus regebant, ut, nō sine aliqua ratione, se solos divites, solos potentes , solos felices jactarent.

Affidua

Affidua autem exercitatio necessaria est, ut res extrà te positas, tanquam nihil ad te spectantes, spernere discas. Id si fueris assequutus, nunquam dolabis externa tibi deesse: Sicut non doles, quod rex Tartarorum non sis, aut quod alis careas ad volandum. Quæ extra nos, nihil ad nos.

3. Hoc fræno coercenda sunt desideria, quibus si modum non imponas, nunquam explebitur inexplebilis animus; & quicquid illi congesseris, non erit finis cupiditatis, sed gradus, & irritatio. Nullus humor sufficit ei, cuius viscera ardenti æstu laborat: non enim sitis illa, sed morbus est. Ita accidit illis, qui desideria sua non ad rationem revocant, cuius certi sunt fines; sed ad vitium & luxum, quorum immensum est, & incomprehensibile arbitrium. Nulla incommoda tenties, nec quidpiam tibi deerit quod desideres, si te intra naturalem modum continebis: si modum excesceris, etiam in summis opibus pau-

pauper eris. Cupiditati nihil est satis,  
naturæ pauca sufficiunt.

4. Memento sic in vita versandum  
esse, ut in convivio. Si quæ epulæ cir-  
cumferantur, & ad te pervenerint,  
manu modestè partem accipito. Si te  
prætereat qui fert, ne eum detine. Si  
nondum pervenerit; ne longè appe-  
titum extendas, sed expecta donec  
accedat. Sic erga divitias, erga digni-  
tates, & reliqua quæ extra sunt, si af-  
fectus fueris; dignus eris Sanctorum  
convivio; eaque animi securitate  
fruēris, quæ te omnibus casibus su-  
periorem faciet. Quod si ea quæ ob-  
lata fuerint despexeris, & recusave-  
ris; non solùm conviva Sanctorum,  
sed consors eris felicitatis eorum,  
cámque incipes prægustare in terra,  
quâ illi in cœlo perfruuntur. Arbi-  
trio tuo potes te beatum facere; si  
nihil desideres, quod extra te sit.  
Quis est beatns? qui habet quicquid  
vult. Habet autem quicquid vult,  
qui non vult nisi quod potest.

5. Multa fugimus, & abominamur tanquam noxia, & adversa. quæ revera utilia sunt. Fit enim plerumque, ut spiritui plurimum profint, quæ appetitui adversantur. Quæ nocent, docent. Mors, exilium, paupertas, ignominia, labor, ægritudo, & cætera ejusdem generis, quæ in tua potestate non sunt, nec mala sunt, nec pertinent ad te. His itaq; non fugam, non abominationem opponere debes, sed conceptæ de illis opinionis neglectum. Hæc omnia Socrates larvas apposite nuncupabat. Nam ut pueris larvæ incutiunt metum, cum nihil in illis præter externam speciem horribile sit; ita in rebus contingit; quas non ut sunt, sed ut apparent, apprehendere soles. Mors quid est? Larva. Vide quam dulcis fuerit non solùm sanctis, & eximiâ virtute præditis viris; sed Socrati, & aliis sapientibus Ethniciis. Quid igitur terribile est in morte? Opinio. Timor mortis est horribilis, non ipsa mors.

Idem

Idem in aliis rebus, quas soles abominari, deprehendes. Corrige opinionem, & nihil invenies, quod debeas abominari, præter peccatum.

## CAPUT XV.

*De Gaudio, & Tristitia. Qualiter vir bonus gaudere debeat. Non tristatur qui omnia prævidet.*

*Varia doloris antidota.*

I, Ita gaudere debes, ut in gaudio tuo modestia eluceat; neque animus ita dissolvatur, quin possis liberè, si opus sit, à lætitia ad mærorem transfire. Christus Dominus optimus rerum æstimator non ridentes beatos vocat, sed eos qui lugent. Valde enim dedecet Christianum hominem, qui se æterna sectari profitetur, inter tot pericula mentis & corporis, inter tot justissimas tristitiae cauſas, stultorum more risu gestire, & de rebus perituriis exultare. Fugit terrena voluptas; & quæ nos gaudia vocamus, sæpe initia tristitiae sunt.

Verum gaudium non nisi ex virtutum conscientia nascitur. Non potest gaudere nisi justus, fortis, & temperans. Ut nunquam desit animo tuo lætitia, fac ut tibi domi nascatur. Nasceretur autem, si intra te ipsum fuerit. Cæteræ hilaritates leves sunt: non implent pectus; nec semper gaudet, qui ridet. Res severa est verum gaudium: oritur ex bona conscientia, & honestis consiliis, & rectis actionibus; ex contemptu voluptatum, & placido illibatæ vitæ tenore. Hæc est vera virtutis lex: ut verè gaudeas, diu lugendum.

2. Tristitia malum præsens vel re ipsa, vel apprehensione, cum quadam perturbatione & inquietudine, execratur. Solemus autem ut plurimum non rebus, sed rerum opinionibus cruciari. Noli res indagare quales sint, non servitia, non agros, non nummos non negotia: considera potius, quæ tua de illis opinio sit. Quòd dedecore afficiaris, quòd spolieris pecuniâ, quòd

quòd vapules, arbitrii tui non est : at rectè de his sentire , non ea esse mala sed sæpe utilia; penes te est. Nunquam dolebis, si à præsenti molestia avulsam cogitationem illuc converteris , ubi vera sunt gaudia. Viro bono nihil accidit mali : non quia non sentit sed quia vincit. Respicit enim omnem adversitatem, ut occasionem exercendi patientiam , ut instrumentum divinæ gratiæ , ut viam ad gloriam in æternum duraturam. Potest vir bonus miser dici, esse non potest.

3. Quicquid fieri potest, quasi futurum prospice. Sic omnium malorum impetum molles: quæ ad præparatos nihil afferunt novi ; securis, & omnia prospera expectantibus , gravia eveniunt. Quid erit, si rerum tuarum di midium auferat casus? quid si omnia ? quid si ruat domus, comburantur se getes, deserant amici? quid si fama periclitetur, & de gradu per calumniam dejiciaris ? Morbus, captivitas, ruina, ignis ; nihil horum sapienti repenti-

num est. Futuras secum commentantur miserias ; & dolorem , quem alii diù sustinendo , ipse diù meditando lenit. Cuius accidere potest. quod alicui accidit. Quæ sunt divitiæ, quas non fames à tergo, & mendicitas sequuntur ? Quæ dignitas , quam non sordes comitantur , & extrema contemptio ? Quod regnum , cui non sit paratum excidium ? Nonne gladio carnificis regiam cervicem abscissam, idque jussu subditorum, inaudito exemplo , hæc ætas vidit ? Nec magnis ista intervallis divisa sunt : horæ momentum interest inter opes & egestatem, inter aulam & caulam, inter folium & securim. Scito ergò, omnem conditionem versabilem esse; & quicquid in ullum incurrit, in te quoque incurrere posse. Adversā fortunam facile sustinet, qui semper exspectat.

5. Non se exerit virtus, cùm secundo cursu vita procedit. Tunc apparet quanta sit, cùm, quid possit, patientia ostendit. Spectaculum, inquit Apostolus,

stolus , facti sumus Deo, Angelis, & hominibus. Ecce autem spectaculum dignum , ad quod respiciat intentus operi suo Deus. Ecce par Deo dignum , vir fortis cum adversitate compositus, de se ipso, & de omni calamitate triumphans. Tranquillum mare, & ventus obsequens, artem gubernatoris non ostendunt. Qui non est tentatus, quid scit ? Dicit aliquis infelicem me, cui hoc acciderit. Imò felicem te ; quia licuit tibi te experiri. Potuit enim tale quidpiam cuique accidere ; sed non erat cujusque similem casum sine dolore excipere. Ne itaque in sinistris eventibus te submiseris : contrà potius figure stabilem gradum ; & quicquid oneris suprà cecidit, sustine. Nam primo impetu fracto, nihil in his horribile esse videbis, præter opinionē. Quæ à natura vim habēt, eandem servant in omnibus : sed paupertatē, ignominia cōtumelias & cætera quæ mala vulgus nuncupat, multi patienter ferunt

multi nec sentiunt quidem non ergò naturale est, in his mœrore consumi; sed à perversa opinione procedit. Quid tibi ipsi mentiris? Levem omnē calamitatem ferendo facere potes. Levis est omnis dolor, si nihil ei opinio adjecerit. Noli mala tua facere tibi per impatientiam graviora. Tam misser quisque est, quam se ipse existimat.

s. Omnis ægritudo, morā tandem decrescit; & licet contumacissimum dolorem tempus adimit, & enervat. Vifne igitur diem operiri, quo luctus te invito definat; an ipse illi finem imponere? Cur non id consilio præripis, quod allatura est diuturnitas? Quamvis ipse custodias mœrorem tuum, custodienti tamen elabitur. nulla enim res citius in odium venit, quam tristitia: quæ dum recens est, consolatore invenit; inveterata deridetur. Quòd si dolore calamitas vincitur, eat omnis inter luctus dies, noctem sine somno mœstitia consumat, ingerrantur pectori manus, & sese omni  
fævi-

sævitiae genere profecturus dolor exerceat. Sed si lacrymæ inutiles sunt si nullo fletu adversitas mitigatur; disce te ipsum regere, & omni adversitati invictâ constantiâ obfiste. Turpis est navigii rector, cui gubernacula fluctus eripuit, qui fluctuantem navim tempestati permisit. At ille vel in naufragio laudandus, quem obruit mare clavum tementem, & undis reluctantem.

## CAPUT XVI.

*De Spe, & Desperatione. Quomodo utramque moderari oporteat.*

I. SPes vana, & mēdax, & verè somnium vigilantis est, nisi in Deo collocetur, cuius solo nutu omnis difficultas vinci potest. Quid rei futuræ exspectatione cruciaris, & in longinqua cogitationes extendis? Nihil sperabis, si nihil cupies, si omnia terrena despicies. Nemo sperat quæ contemnit. Licet te nunquam sperata decepterint, licet non ex diffīcili petatur quod speras; quamdiu te spes aliqua

proritat, sollicitus eris, & incertus tui,  
ac in ancipiti positus. Ut pedibus  
loca invia, & prærupta non petis;  
ita nec animo ea speranda, quæ in  
tua potestate non sunt. Omne misera-  
riæ momentum hoc est; defuisse vo-  
luntati quod speravit.

1. Sæpè admonendus est animus  
ut quæcunque extra te, & circa te  
sunt, aspiciat ut peritura, tenuique  
filo pendentia. Quid oblivisceris cō-  
ditionis tuæ? Mortalis natus es: nihil  
tibi de hodierna die promittitur, ni-  
hil de hac hora. Instat à tergo mors:  
quicquid habes mutuò accepisti.  
Usus fructus tuus est, cuius tempora  
summus omnium Arbiter tempe-  
rat. Ad ejus nutum, omnia sine que-  
rela reddenda sunt. Pessimi est debi-  
toris, creditori convitum facere.  
Nihil est ergò sub sole, quod debeas,  
aut possis sperare. Illa tantum vera  
est spes, quæ de vero, & summo  
bono rite concipitur

3. Desperationem cauſſant inertia.

ab-

abjectio animi, nimia difficultatum  
apprehensio, vitiosa sui diffidentia,  
viriumq; & industriæ defectus. Vin-  
citur, excitando animum eorum  
exemplo, qui etiam in gravioribus  
angustiis constituti, omnia obstan-  
tia generosè superârunt. Incipe, &  
propelle te ipsum: quia Deus fa-  
cientes adjuvat; & quod arduum  
videbatur, facillimum fit. si falsa de  
illo opinio deponatur. Quicquid ac-  
cidit tibi, id omne ab æterno desti-  
natum est. Illud autem aut ita evenit  
ut naturâ comparatus es ferre; aut  
secus: si primum; ne despera, sed  
fer: si aliter; nec tunc quidem de-  
sperandum: quicquid enim illud est,  
citò finē & ipsum habebit, & tibi im-  
ponet. Leve est, quod ferre potes: bre-  
ve, quod non potes. Sed memineris,  
in te situm esse, multa facere tolera-  
bilia, si ea, ut utilia, & convenientia,  
apprehenderis. Calamitas, virtu-  
tis occasio est

## CAPUT XVII.

*De Timore. Quām vanus sit, & qua ratione vincatur. Audacia vitanda. Quædam iterum de Ira.*

I. **M**agna pars mortalium, cùm nec sit quicquam mali, nec pro certo futurum sit; æstuat tamen, & discurrit, sibiq; infortunium vel fingit, vel auget. Non tot reperit cruciatus humana crudelitas, quot patitur animus, futuri anxius; qui solicitus est, ne bona præsentia amittat, aut mala imminentia eveniant. Multa mala, quæ non essent, sunt, quia timemus. Quid prodest tibi ante tempus cruciati, & inani providentiâ occurrere ærumnis tuis? An ideo oportet te jam miserum esse, quia quandoque futurus es? Stultum est, dare se referentibus; nullisque apparentibus signis, quæ malum prænuntient, falsis terreri imaginibus. Sæpe fallaci conjecturâ deceptus, verbum dubiæ significationis detorques in pejus.

Sæpe

Sæpe potentis offensam majorem putas, quam revera sit; & cogitas, non quantum iratus sit ille, sed quantum liceat irato. Vani autem sunt hi metus; & ideo magis perturbant, quia vani sunt. Vera enim modum suum habent: quicquid ex incerto venit, conjecturæ & licentiæ paventis animi traditur. Parùm differt patiaris adversa, an expectes; nisi quod modus est dolendi, non est timendi. Doles quantum scis accidisse; times quantum potest accidere.

2. Si vis omnem timorem exuere, quicquid vereris ne eveniat, eventurum propone, & illud malum tecum metire, metumque tuum taxa: intelleges profecto, non re ipsâ, sed opinione magnum esse quod metuis. Num potest aliquid tibi durius accidere, quam ut immittaris in exilium, ut duca ris in carcerem? Num quid corpori ultrà timendum, quam ne uratur? excute hæc & redige ad verum, timorem tuum: multos invenies, etiam infide-

## 110 MANU D U C T I O

les qui hæc omnia contempserunt: Stephanus inter lapides pacato animo Deum precatur: Laurentius in flaminis exultat, & insultat tyranno: se ultro projicit in succensū rogum Appollonia Virgo. Ridet ferreis malleis contusus in pila Anaxarchus: Socrates cicutæ poculum gaudens exhaurit, & Critiæ propinat. Quid ignes metuis, & turbam carnificum circa te frementium? sub ista pompa, quæ stultos territat, latet mors, quam tot pueri, tot puellæ læto animo amplexi sunt. Deme rebus tumultum, deme personam redde singulis faciem suam: nihil in illis terribile esse videbis, præter ipsū timorem. Id nobis evenit grandioribus pueris, quod parvulis solet. Hi quos amant, quibus assueverunt, cum quibus ludunt, si personatos vident, expavescunt. Tu verò pueris deterior, ad tantam ineptiam pervcnisti, ut non solùm dolore, sed doloris larvâ & panico terrore vexeris.

3. Abduc animum à privatâ caus-

sâ ad communem. Dic, mortale tibi  
& fragile corpusculum esse, multis-  
que morbis, ac tandem morti ob-  
noxium. Dic tibi ipsi: Jam pridem  
sciebam multa mihi adversa immi-  
nere. Quid nunc ergo timeo? Æ-  
grotabo? Proderit ad animæ salu-  
tem corporis ægritudo. Ad pauper-  
tatem redigar? Tutior mihi & tran-  
quillior vita erit. Opes amittam? &  
cum illis curas multas, periculum-  
que perpetuum. Ignominiâ afficiar?  
Si justa, ejus caussam execrabor: si in-  
justa, meâ me conscientiâ consolabor.  
Repulsam speratæ rei patiar? Nec Re-  
ges quidem omnia quæ cupiunt asse-  
quuntur. In exilium mittar? Spon-  
tè ibo, eritque peregrinatio. Cæcus  
fiam? Multis cupiditatibus via in-  
cidetur. Male de me loquentur ho-  
mines? Facient quod mereor, quod  
solent. Moriar? Hac conditione in-  
travi, ut exirem. Sed peregrè mo-  
riar? Nulla terra est aliena non ha-  
benti hic permanentem civitatem.

Moriar ante diem? Nemo nisi amens  
queritur, ante tempus absolvi vincu-  
lis, & carcere relaxari. Mors, exilium,  
Iuctus non sunt supplicia metuenda;  
sed tributa nostræ mortalitatis. Stul-  
tū est ea timere, quæ vitare nō potes.

4. Fuge audaciam, nihilque temere  
ultra vires aude: nemo enim celerius  
opprimitur, quam qui nimium præ-  
sumit. Exiguæ sunt vires nostræ sine  
Dei ope, à quo omnis sufficientia, om-  
ne robur emanat. Oritur audacia  
propriæ virtutis nimia existimatio-  
ne, à contemptu adversariorū, à præ-  
cipiti ingenio, rebusq; gerendis mi-  
nus exercitato. Plus metuit, qui pru-  
dentior est: nā vires proprias metitur,  
solerter prospiciens quid valeant, aut  
nequeant. Audaces, cum graviora, quā  
antè conceperant, experiuntur peri-  
cula; effuso primo impetu subsidunt  
& torpescunt, ferò agnoscentes, quam  
sint incertæ hominum providentiae  
quam vanæ cogitationes. Initium est  
futuræ calamitatis incauta securitas

5. Nunquam tui dominabitur ira,  
si opinionem existimatæ injuriæ tol-  
las. Tu ipse dux flagitorum tibi es,  
& incentor erimus : tu mala om-  
nia tibi struis. Quid caussam tuarum  
perturbationum in alios derivas , si  
tu te impellis & præcipitas ? Nemo  
læditur nisi à se ipso. Quod dicunt  
pueris nutrices, Si non plores, accipi-  
es; id tu rectius dices animo tuo effe-  
vescēti. Noli irasci, noli urgere & cla-  
mare ; rectius fiet quod volebas. Dies  
quosdam institue , quibus proponas  
in iram nunquam incidere quacunq;  
ex caussâ : tum per unum vel duos  
menses eâdem ratione te experire; in-  
venies successu temporis te adeò pro-  
fecisse, ut ad risum te provocent, quæ  
priùs iratum è statu mentis dejicie-  
bant. Placidi mores nemini eorum,  
cum quibus vivitur, ita sunt grati, &  
jucundi, ut ei ipsi , qui prædictus illis  
est. Hoc boni habet pacatus animus;  
semper gaudet , semper trium-  
phat,

## CAPUT XVIII.

*De Potentiis animæ rationalis.*

*Continendus intellectus à curiositate. Cui potissimum scientias incumbendum. Quād malum sit, aliorum mores disquirere.*

*Aliorum judicia spernenda. De voluntatis abnegatione.*

1. **D**ata est tibi à Deo intelligendi facultas, ut ipsum agnosceres, & cognoscendo amares; sed per peccatum duplici vulnera fauciata est, ignorantia & cæcitate. Nam & in notione veritatis erras; & quid sit facendum, vel fugiendum, plerumque ignoras. Quantâ ergo diligentia vel urbs in grassantis pestilentiae metu, vel arx ab hostili exercitu obfessa custoditur, ne quis non planè cognitus intus obrepatur; tantâ est curâ, multoque majori vigilandum, ne intellectus malæ rei, sibi à sensibus

bus objectæ , aditum patefaciat. Rerum enim species sensus objiciunt , intellectus admittit, & ad judicium defert ; hoc voluntati proponit. Sed sensus offerunt bona & mala : mentis est , vel admittere , vel excludere.

2. In primis continendus est intellectus à curiositate. Cur per inania distrahis mentem , solidæ sapientiæ & Deo natam ? Res frugi, sapientia est. Sicut qui gustat aconitum, ut qualitatem ejus scrutetur, priùs perit, quām saporem sentiat ; sic qui ea rimantur, quæ ad se non spectant, priùs se ipsos pessimum dant, quām cognoverint quod quærebant. Scire quod non prodest, proximum est ignorantiae. Qui vere sapiens esse cupit, non opinioni discit, sed vitae: nec quærerit in scientia oblectamentum animi , sed remedium: Nōsse gaudes stellarum vires? Inepties postquam sciveris, si ignores infirmitatem tuam. Vis ornatè & eleganter loqui ? Satiùs est, si discas tacere. Scire

nova cupis? Quid magis novum, quā renovare te ipsum? Hoc disce. Errores alienos libet confutare? Cur non corrigis tuos? Juvat percurrere historias, & scire aliorum facta. Benè, si interim non ignores, quæ à te sunt facienda. Placita litigantium concordare delectat? Cur non & tuos affectus tumultuantes? Nisi quæreres supervacula, facile invenires necessaria. Scientia autem necessaria illa est, quæ te bonum potius, quam doctum facit.

3. Quid in iis quæstionibus te tortures & maceras, quas subtilius sæpè est contempsisse, quam solvere? Cur pertinaci studio laboras, ut ea diccas, quæ forent dedisca, si scires? sed ut aliarum rerum, sic quoque literarum intemperantia nos vexat. Nullus librorum est finis. Instruuntur Bibliothecæ ad spectaculum potius & ornatum, quam ad usum legentium. Vix librorum editorum indices totâ vitâ legere poteris, quamvis multos vixeris annos. Inter hos multi sunt

noxii & perniciosi: multi indigni, qui legantur: multi vani & imperiti; quos cùm diu perlegeris, nihil scies. Plures quidem à limine salutare tibi permittitur, ne aliquid in ipsis latere judices magni & secreti boni; sed paucis, & cum delectu, insistendum. Paucis ad bonam mentem libris, & literis indigemus.

4. O inanes mortalium cogitationes! Impallescimus chartis, & per innumeratas artes ac scientias ingenium extendimus, quasi nobis multa sæcula vivendum sit: vitæ verò sempiternæ curam negligimus, quæ non scientiis, sed virtutibus comparatur. Quid prodest acta externorum Regum inquirere; & quæ passi invicem, ausiq; sunt populi, magnis voluminibus describere? Quantò satius foret, tua mala extinguere, quam aliena posteris tradere? docet te Geometria metiri latifundia: doceat potius, quomodo quod tibi sufficiat, metiaris. Numerare docet Arithmetica, & avari-

tiæ comodare digitos : doceat potius ea spernere & læto animo amittere, quæ tantâ solicitudine computantur. Monstrat Musica, quomodo voces inter se consonet : ostendat potius, quomodo secum mens concordet; nec disparem reddant sonum sensus, & ratio. Monstrat, qui sint modi hilares, qui flebiles : ostendat, inter prospera non extolli, inter adversa nō emittere flebilem vocem. Non damno harum rerum cognitionem ; sed hæc & alia utiliter scies, postquam sciveris te ipsum, & novissima tua. Nihil scis, quāvis omnia scias , si te ipsum ignoras.

5. Infame vitium ac sordidissimum est, aliena facta observare, mores disquirere, & omnia temerè interpretari. Quis enim es tu, qui alienum judicas servum ? Dominò suo stat, aut cadit. Ipse est, qui judicat omnes, qui omne sibi judicium reservavit. Quā audaciâ divinum tribunal præsumis invadere ? Attende tibi , & latebras conscientiæ tuæ perscrutare. Vide

ibi mala quæ insunt, bona quæ desunt  
& noli oculos ad aliorum vitam con-  
vertere. Satis uberem malorum copi-  
am in te reperies, quam acriori censu-  
râ perstringas. Vix quidpiam justè  
fit, quod non possit pravum inge-  
nium in malum detorquere. Ipfis  
Evangeliis abutuntut hæretici: Chri-  
sti actiones calumniabantur Heb-  
ræi. Ut corpora melancholica & ma-  
li humoris, quicquid cibi sumperint  
in bilem vertunt; sic anima male dis-  
posita quicquid videt, quicquid au-  
dit, perperam interpretatur. Bonavel  
mala intentio sæpè res bonas vel ma-  
las facit: hæc autem soli Deo nota est,  
qui scrutatur renes, & corda. Quod si  
factum alienum nullâ potest ratione  
defendi; quid ad te? Non erubescis, fœ-  
dissima quæq; quasi è latibulis educe-  
re, ac publicè spectanda proferre? Cur  
non te ipsum observas, qui cæteris  
deterior es? In te exerce maledicentiā  
tuam: de te ipso tecū detrahe: accusa  
pravitatē tuam, & te ipsum dijudica

Dei

Dei enim judicium evades, si tui judex severus fueris.

6. Ut ingeniosi in notandis aliorum factis sumus, inde nobis prudētiæ famam perquirentes; ita facile suspicamur, alios de nobis male sentire, vel loqui; Hoc vitium ut repellas, tempe-randa primò cupiditas est, quâ ab hominibus æstimari desideras. Tū dan-da est, opera, ut vel ipsam cogitatio-nem abjicias sciendi quid alii de te sentiant, vel loquātur; cum sæpè con-tingat, eos nec quidem de te cogitare, quos fingis perperam de te loqui, & te ob-servare. Dic tibi cum Apostolo: Si hominibus placerem, Christi servus non essem. Dic ad alios: Mihi pro mi-nimo est, ut à vobis judicer, aut ab humano die. Talis reverà es, qualis es apud Deum. Sensus & loquela homi-num nihil adjicit bonitati tuæ; nihil detrahit de malitia. Melius est, bo-num esse, quàm videri.

7. Nihil tuæ voluntati contrarium eveniet, si eam penitus abnegaveris,

& transfuderis in divinam. Sic mentis solidâ pace, sic verâ tranquillitate perfruēris. Vives ut vōles, si quid velle debeas, didiceris. Debes autem velle, quod Deus vult. Hæc est unica virtutæ hujus felicitas, velle, ut, quæ fiunt, ita fiant, sicut vult Deus, non ut voluimus ipsi. Dicit te Deus ad finem, ad quē ab æterno destinatus es, per suavia & aspera, per prospera & adversa. Obsequere divinæ providentiæ, & sequere alacriter: nam etsi repugnaveris, sequeris nihilominus, & impius eris. Dicit volentem Deus, nolentem trahit.

## CAPUT XIX.

*De statu proficiuntium. Varia profectus adjumenta temporis æstimatione, & usus. Dei præsentia necessaria.*

1. **S**i bonus esse cupis; primūm credito, te malum esse. Nunquā proficies, si proficiendi deposueris appetitū. Nolle proficere deficere est. Perse-

vera igitur, ut cœpisti; & quantum  
potes propera, quò citius frui emen-  
dato animo, & composito possis. Ar-  
gumentum animi in melius trans-  
lati est, si vitia tua vides, quæ adhuc  
ignorabas. Sic ægris gratulari sole-  
mus, cùm se ægros esse senserunt. No-  
li facile tibi credere; sed excute te, &  
observa, tuique profectus experimen-  
tum cape animi firmitate, & cupidi-  
tatum diminutione. In proficien-  
tium classe te esse existimabis, cùm in  
te ipsum maximam habueris poté-  
statem. Inæstimabile bonum est, se  
possidere, & unū esse. Vir probus sem-  
per idem, improbus semper aliis est.

2. Potes, si vis, unâ die ad culmen  
sanctitatis pervenire, si toto corde a-  
versus à creaturis, ad Deū converta-  
ris. An verò vitam intùs cum Deo a-  
gas, ex his signis deprehendes. Si tibi  
displaceant rès transitoriæ, si placeat  
solitudo, si cures quod perfectius est,  
si opiniones & iudicia hominū sper-  
nas. Magnum verò adjumentum ad

om-

omnem virtutem, præbebit tibi vitæ & Passionis Christi assidua meditatio. Ipse est liber vitæ, in quo solo, velut in divite ac instructissima bibliotheca, reperies, quidquid pertinet ad salutē, et si omnes libri cum suis auctoribus interirent. Non tamen sufficit Christum scire & meditari, nisi etiam imiteris; atq; ita vivas, sicut ipse docuit verbo, & exemplo. Nisi ad regulam, prava non corriges.

3. Præclare à quodam dictum est; eos qui proficere velint, ita vivere debere, ut perpetuò currentur. Multa enim sunt jugiter observanda, quæ ad arcem virtutis properanti moram injiciunt. Cum nimirum amore inordinato vel te ipsum, vel aliquam creaturam prosequeris: cum rebus externis ita afficeris, ut si eas auferri, vel amitti contingat, iniquo animo laturus sis: cum propriis commodis nimirum studes in cibo, potu, colloquiis, evagationibus: cum temporalibus te nimirū imergis, tuoq; judicio ac

voluntati pertinaciter adhæres: cùm  
motus internos minimè observas,  
Deumque intùs loquentem per secre-  
tas inspirationes, audire contemnis.  
Hæc sunt præcipua impedimenta te  
in via detinentia; quæ ut removeas  
sedulò vigilabis, & te operi viriliter  
accingis. Animet virtus quicquid a-  
gis; animet finis perfectissimus, cum  
promptitudine & alacritate; animet  
pura intentio: atque ita operi insiste,  
ut prænotioni, quam habes de ejusdē  
perfectione, penitùs adæquetur. Non  
consistit profectus in multitudine e-  
xercitorum; sed in his, quæ quoti-  
die fiunt, perfectè obeundis. Non e-  
nim in facto laus est; sed in modo,  
quo res fit.

4. Volant dies, festinat tempus; &  
quod præteritum est, nemo tibi resti-  
tuere potest. Non vivis, sed viaturus  
es: semper enim vita tua spestat in  
crastinum. Sic elabitur tibi vita, dum  
vitæ instrumenta conqueriris: & inte-  
rim senectus venit; venit mors, in  
quam

quam incidis imparatus. Sicut iter facientes, quos mutua decipit confabulatio, se priùs ad metam pervenisse, quām appropinquāsse cognoscunt: ita hoc vitæ iter affiduum, quod vigilans & dormiens eodem gradu peragis, tibi occupato & distracto non nisi in fine apparebit. Quid igitur cunctaris, quid cessas: Pretium temporis pone, utere eo celeriter: æstima hunc diem, imò hanc horam; ejus enim justitia irreparabilis est. Prædia tua à nemine patieris occupari: si exigua definibus contentio sit, ad lites & ad arma discurris: vitam verò & tempus tibi eripi à quocunque permittis, ejus rei profusissimus, cuius folius avaritia honesta est. Computa ætatem tuam, revoca ad calculum præteritos annos: quamvis centesimum excedas, videbis te pauciores habere, quām numeras. Quantum enim ex his diripuerunt somnus, gula, lites, amici, & otiosa discursatio? adjice quod sine usu jacuit quod nihil agenti, aliudq; agenti

agenti elapsum est , te non sentiente  
 quid perderes : intelliges, quām exi-  
 guum tibi de tuo relictum sit , & te  
 īmaturum mori fateberis. Sæpè que-  
 reris de transactis diebus , quos male  
 perdidisti : cur non eniteris sic præ-  
 sens tempus transfigere , ut eo elapso  
 dicere possis: Non video, quo pacto il-  
 lud melius potuerim collocare ? Sin-  
 guli tantūm dies , & hi per momenta  
 præsentes sunt. Cur hodiernum per-  
 dis, quod tuum est ; & futurum dispo-  
 nis , quod tuum non est ? Maximum  
 vivendi impedimentum est dilatio.  
**Vive hodie ; cras vivere serum est.**

s. Deum semper in omni cogita-  
 tione , verbo , & opere , quocunque  
 alio fine excluso , respice : & unicam  
 ejus voluntatem sectare. Nunquām à  
 recto tramite deviat , qui Deum sibi  
 viæ ductorem proponit. Bono loco  
 res tuæ erunt , si omnia quæcunque  
 facis ad Dei gloriam dirigas ; atque  
 ita singula facias , ac si ipse spectet ,  
 qui videt omnia , omnia sustentat ,  
 omni-

omnibus providet. Ejus obtutum nunquam effugies : interest enim nō verbis tautū & factis , sed intimis tuis. Cūm fores obduxeris , & tenebras iutūs feceris , nē putas te solūm esse; tecum Deus est, qui secretum tuum facere sanctius debet , cui nihil clausum est. In ipso vivimus, movemur , & sumus, coram illo comedere & bibe : cum illo ambula , cum eo tracta negotia tua, ad ipsum erige vitam tuam. Fac te dignum, in quem oculos figat, quem semper amabiliter spectet. Magna tibi necessitas indicta est probitatis, cūm ante oculos agis Judicis cuncta cernentis. Sic vive, ac si nemo in mundo sit, præter te solum & Deum. Quicquid ejus providentia de te disposuerit, libens amplectere , sive prosperum illud fuerit , sive adversum. Deum quærvis : hac, an illā viā ad ipsum pervenias, quid resert? Atque utinam aliquandò pervenias!

## CAPUT XX.

*De bono solitudinis. Fugienda ma-  
lorum societas. Mundi vitia  
quot & quæ sint. Studium pro-  
ficientis. Acquisitio virtutum.  
Signa quedam obtentæ virtutis.*

1. *In*gens argumentum est composi-  
tæ mētis, & à pravis affectionibus  
emundatæ, secum posse consistere. Si-  
cut Deus, se solo beatus in se semper  
moratur; ita ad Dei felicitatē proximè  
accedes, si tecum manere didiceris. Et  
quidem si volueris, nunquām eris so-  
litarius, si nunquām à Christo separe-  
ris. *Quod si* loquendi te corripit ca-  
coethes, tecum loquere; sed cave,  
ne cum malo homine loquaris. Vis  
autem scire, quid tecū colloqui pos-  
sis? Idquod homines de aliis liben-  
tissimè faciunt: de te apud te male  
loquere. Produc vitia tua, & casti-  
ga quicquid in te animadversione  
dignum repereris. Nunquam deerit  
ali-

aliquid vitium, cui curatio adhibenda sit. absconde te in otio; sed & otium tuum absconde. Gloriari solitudine, iners ambitio est. Corporali autem solitudini internam junge ; ut grata tibi atque utilis sit. Subduc te vanis occupationibus ; nec ab hominibus tantum, sed à rebus etiam secede, quæ ad te non spectant. Esto liber ab omni creatura, & à corde tuo earum imagines exclude. Abjice omnes cœducarum rerum solicitudines, omnes cogitationū ineptias; & in abdito cordis recessu tibi soli, & Deo attende: In hoc mentis silentio, in hac rerum omnium oblivione & nuditate, vera cordis requies, vera tranquilitas sita est. Huc fuge, h̄ic abscondere, huc semper intendere: ibi enim reperitur Deus, ubi omnes creaturæ deseruntur.

2. Si vis bonus esse, fuge malorum consortium. Nihil tam damnosum bonis moribus, quam se populo committere. Nunquam mores, quos intulisti, referes. Animus tener & parum tenax

tenax recti, vitiorum impetum, tam ne  
magno comitatu venientium ferre nis-  
non potest. Facile transfitur ad plures.  
Convictor delicatus paullatim ener-  
vat & emollit : vicinus dives cupi-  
ditatem irritat. Unico exemplo lu-  
xuriæ, seu avaritiæ, perire potes. Tra-  
hunt in pravum parentes, trahunt  
socii, trahunt servi. Plena omnia  
periculis, plena sunt laqueis. Statim  
ac editi in lucem sumus, in omni cō-  
tinuò pravitate, & in summâ opinio-  
num perversitate versamur. Vix ul-  
lus in mundo est, qui non aliquod vi-  
tium aut comendet, aut imprimat,  
aut nescienti allinat. Continebis te  
aliquando inter domesticos lares, ex-  
tra forum & commercium hominum  
proh quam suavi & optata fugâ! Om-  
nia intus serena, omnia tranquilla, si-  
ne nube & vento. Accedit casu qui te  
evocet; sequeris. Coniungunt se alii,  
fit corona, venitur ad turbam, pec-  
catur multiplici excessu ; & qui bo-  
nus exieras, pessimus regredieris. Vul-

am nera autem animæ nou deprehendis,  
erre nisi iterum solitarius? Recede ergò in  
res. te ipsum, quantum potes? ne suis er-  
roribus mentem imbuat omnis un-  
pi. dique ad vitia consentiens multitu-  
do. Lætior est animus. qui in pau-  
ciora distinguitur.

3. Crede te paullisper in celsi mon-  
tis verticem subduci: speculare inde  
miserrimam mundi faciem. Hinc dis-  
ces ipsum odiſſe, & ab eo in solitu-  
dinem elongari. Cernes itinera à la-  
tronibus claudi, maria à prædonibus  
obsideri, fremere undique bella, &  
humano cruore madescere campos,  
abruptoq; fræno vitia ubique & sce-  
lera dominari. Videbis in occulto pe-  
netrali ab impudicis ea fieri, quæ  
nec ipsis quidem possunt placere qui  
faciunt. Invenies tam indigna, tam  
indecora; ut nemo dubitaturus sit eos  
insanire, si cum paucioribus insani-  
rent: sed sanitatis patrocinium est, in-  
sanientium turba. Inter leges ipsas de-  
linquitur; nec tutę illiē est innocentia  
ubi

ubi defenditur. Perit innocens, absolvitur reus: minusque criminis, quam  
absolutione peccatur. Nullus legum  
metus est : quod enim potest redimi,  
non timetur. Amaræ sunt obloquen-  
tium linguae, subdola ora laudantium  
indè fævit odium, hinc decipit men-  
dax officium. Alius vino madet, alius  
torpet inertiâ. Illum insatiabilis ava-  
ritia tenet ; hunc defatigat ex alienis  
judiciis suspensa semper ambitio. Re-  
spice forum multitudine resertum:  
tantundem istic vitiorum esse fateberis,  
quot hominum . peccant omnes in-  
juriis in proximum ; in Deum con-  
temptu, in res abusu: omnia in suum  
congregant judicium, omnium rei. Et  
quomodo tutum servare vestigium,  
vel ad te recurrere poteris , inter tot  
vitia omni ex parte urgentia, quæ re-  
surgere cupientem, & in altum attol-  
lere oculos, premunt, & mergunt? in-  
noxium aliquem esse, ubi regnat no-  
centium agmina, difficile est : nam si  
te imputare non poterunt, saltem im-  
pedient,

pedient. Una est firma tranquillitas, tot te malis excerpere, & in eam recessere stationem, è qua possis mundi lucem ab omni contagio liber intueri. Insuperabilis est animus, qui externa deseruit, & sibi soli vacans arce suâ se vendicat. Huic mundus carcer est, & solitudo paradisus.

4. Vanum est ab hominibus sedere, nisi cogas animum intentum sibi esse, & virtutum exercitationi folerter incubere. Nullum homini bonum est, si defit virtus; nulla quies, nulla felicitas nisi ex virtute. Triæ sunt, quæ sibi mutuo in universo respondent. Inter omnia, & super omnia Deus; inter sensibilia lux, inter animi perfectiones virtus. Deus est lux & virtus omniū: lux, virtus mundi & imago Dei: virtus, lux animi, per quam filii Dei nominamur & sumus. Ad hanc purgato animo accedere debes, si ad optatum perfectionis culmen pervenire desideras virtus enim perfectio hominis est, instauratrix

innocentiæ, omni plena jucunditate. Est supplementum naturæ, ad bonum supernaturale ex se ineptæ. Est facilitas boni operis, quâ recte vivimus, quâ velut cæci illuminamur, quâ peccatis resistimus, quâ meritis cumulamur, quâ vitam æternam promeremur. In hoc studio necessarium tibi primò est, cuiusque virtutis naturam & actus præscire; quia nemo amat quod ignorat. Tum ab actu & exercitatione nunquam cessandum: & si desint occasionses, milites imitari oportet, qui in mediâ pace sine hoste decurrunt, fictisque velitationibus se ad vera certamina parant. Finge tibi ingentia quæque scelerata objici: puta te contumeliis proscindi, omnia quæ possides à te violenter auferri; & sic patientiam exerce, ac si res vera ageretur. Non trepidabis in ipso re, si ante rem te ita exercueris. Magnos ad pugnam spiritus adfert miles, qui sanguinem sæpè fudit.

§. Virtutum habitus non nisi longâ exercitatione comparantur. An verò aliquā ex illis obtinueris, ex his indiciis dignosces. Si nimirum vitia virtuti opposita extincta sentias, aut magnâ ex parte compressa. Si pravarum affectionum motus sub fræno rationis legem pati, ac menti parere facile cōpellas. Si actus virtutis absqne difficultate, imò etiam cum delectatione exerceas. Si tepidorum dicta contemnas, plenâque spiritûs libertate ad ea præstanta te exeras, quæ displicant imperfectis. Si pravos actus, ad quos anteà per habitum inclinabar, connaturali quodam fastidio abomineris. Si neque per somnium re aliqua turpi delectari, aut quidpiam injustum approbare videaris. Si ea satagas imitari, quæ in aliis laudas & admiraris; atque ab illis abstineas, quæ reprehendis. Si nullam culpam exiguum putas; omnemque imperfectionem, quantum vis minimam, studiose vites, & observes.

Si cùm vides vel audis, æquales tuos,  
divitiis aut dignitatibus florere; nec  
invideas, nec perturberis. Si errores  
tuos ingenuè fatearis, cupiens ab om-  
nibus corrigi & reprehendi. Si con-  
scientiæ testimonio contentus, bona  
opera in te ipso serves, & abscondas:  
recte enim facti, fecisse præmium est.  
Si studio denique virtutis sine inter-  
missione incumbas: nam vera virtus  
nunquā torpet, sed semper in actu est.

## C A P U T XXI.

*De virtutibus Theologicis. Fides o-  
peribus comprobanda. In solo  
Deo ponenda fiducia. Motiva  
amoris erga Deum Amor proxi-  
mi beneficiis ostenditur. Horta-  
tio ad eleemosynam.*

1. **B**asis cæterarum virtutum, & to-  
tius Christianæ vitæ fundamen-  
tū est fides; sine quâ nemo potest pla-  
cere Deo. Hæc est sapientia, quæ do-  
muit orbein; cui firmiter adhærēdum  
omni

omni disquisitione & curiositate re-  
jecta. Crede autem, & operare: quia fi-  
des sine operibus mortua est. Sermo  
tuus, & professio tua jactitant fidem:  
cave ne vita & mores prædicent infi-  
delitatem. Credis Evangelium: cur nō  
obedis Evangelio? Credis vitam æter-  
nam: cur brevissimum tempus inter-  
minabili præfers æternitati? Quid  
prodest credere vera & bona, si tu fal-  
sus es, & mala operaris? Vix fieri po-  
test, ut benè credat, qui malè vivit: ille  
enim verè credit, qui exercet operan-  
do quod credit.

2. Cūm certissimum sit, Dei provi-  
dentiâ omnia disponi, & gubernari,  
adecò ut nec passer de cœlo, nec foli-  
um ex arbore cadat absque ejus nutu  
& voluntate; ipsi te totum trade ex-  
celso animo, & ingenti fiduciâ, nihil  
dubitans, quin opportunum ad res  
omnes auxilium sis habiturus. Scito,  
omnia humana consilia atque præsi-  
dia fallacia, & incerta esse; tēq; regi &  
agi absq; ulla anxietate à Deo finas.

Et si res accidant inopinatæ , quibus  
actionum tuarum & consiliorum to-  
ta series turbari & præcidi videatur  
vel morbis , vel falsis criminationi-  
bus , aliisque casibus gravioribus ; ne  
despondeas animum , sed spe divinâ  
munitus , ejus te regimini subjice : nā  
per hos casus , per hæc discrimina , ad  
illum finem te divina sapientia per-  
ducit , quem tibi ab æterno destina-  
vit . Non sentit malum præsens , qui  
futura sperat bona . Tantum potest  
homo , tantum habet , quantum spe-  
rat , & credit .

3. Charitas omnium virtutum for-  
ma & Regina , & Deum respicit , &  
proximum . Et Deus quidem ex toto  
corde , ex tota anima , ex totis viribus ,  
super omnia amabilia diligendus est ,  
pure propter se , & suā infinitam bo-  
nitatem . Quod es , quod vivis , quod  
moveris , quod sentis , quod intelligis ,  
Dei gratia est . Ipse te à servitute dia-  
boli redemit : ipse animam tuam in-  
numeris prærogativis nobilitavit :  
ipse

ipse tibi vitam æternam, nullis præcedentibus meritis, præparavit. Cœlum, terra, aer, aqua, & omnia quæ in eis sunt, magnis vocibus quotidie clamant, ut summo eum amore prosequaris, à quo propter te creata sunt. Cur per multa vagaris, quærendo bona animæ tuæ? Ama unum bonum, quod omne bonum. Quære simplex bonum, quod est summum bonum, quo nihil majus, nihil amabilius potest excogitari. Solus amor est, quo mutuam Creatori vicem, quamvis non ex æquo, rependere potes. Amor autē non est otiosus; non quærit quæ sua sunt: operatur magna, si est. Nulla amori impervia difficultas. Verus amator mori potest, vinci non potest.

4. Natura nobis amorem indidit mutuum, & sociabiles fecit: omnes enim homines magni corporis membra sumus, ad eandem fidem & gloriæ vocati. Non amat Deum, qui non diligit fratrem suum. Actus vero dilectionis erga proximū sunt, beneficia

omnibus conferre, omnibus prodeesse,  
omnes obsequio & amore prævenire.  
Beneficia autem læto animo & prom-  
pto indigentibus conferes, nullâ in-  
tercedente morâ, nisi in accipientis  
verecundiâ. Sufficiat ad remedium,  
tristius quidpiam passis, quod eorum  
indigentiam scias. Moleustum verbum  
& onerosum est. Rogo: Si amici deside-  
rium occupas, & antecedis, antequā  
rogeris; multiplicas munus tuum.  
Non tulit gratis, qui, cùm rogâsse, ac-  
cepit. Si prævenire non potuisti, plu-  
ra rogantis verba intercide, ne roga-  
tus videaris; tēq; daturum, ipsâ festi-  
natione approba, etiam si non fuisses  
interpellatus. Tum bona verba bonis  
rebus adjice; nec quidquam triste mi-  
sceas beneficio, non mœstitudinem, non  
tarditatem, non exprobrationem, nō  
deniq; jactantiam. res ipsa te silente  
loquetur; & qui videt in abscondito,  
reddet tibi.

5. Inter actus Christianæ beneficen-  
tiæ præcipuum tenet locum eleemo-  
syna;

fyna; quâ fides probatur, redimuntur peccata, emitur cœlum. Cave ergo, ne despicias pauperem; qui cùm sibi egenus sit, te facere divitem potest. Pecatis tuis venundatus es, redime te pecuniâ tuâ: fac de instrumento avaritiæ, subsidium misericordiæ. Histrio te ad risum provocans, plenus à te recedit; Christus offerens regnum cœlorū, nihil accipiet? Tributa Principi vel invitus solvis, et si ex agris nihil percepferis; Christo Regi ex eo, quod superabundat, frustum panis denegabis? Cave, ne parcens pecuniis tuis, reus sis sanguinis fratris tui. Si non pavisti, occidisti. Cogitas, quām benè alii post te vivant; non cogitas, quām male tu moriaris. Satius est deesse aliquid hæreditibus tuis de patrimonio, quām tibi de salute. Inspice rationes tuas. Vide, quid in æterna patria, quid hic possideas. Ex omnibus rebus tuis, id solum in morte reperies, quod per manus pauperum in cœlum præmisisti. Argue infidelitatem tuam. In-

vadere domum hostis potest, cœlum  
non potest.

## CAPUT XXII.

*De prudentia. Ejus necessitas, &  
difficultas. Officium viri pru-  
dentis*

1. **U**T architectis nullum opus re*et*  
procedit sine linea, & libella  
ita nec nobis sine prudentia. Hæc  
norma cæterarum virtutum est, recta  
ratio agendorum, oculus animæ, &  
ars vivendi. Non potest esse jucunda  
vita, à qua absit prudentia. Hanc ar-  
tem difficillimam esse omnes faten-  
tur. Sed & obscura est. Oritur ex eo  
difficultas; quod intrà consideratio-  
nis suæ ambitum res omnes tam  
universas, quam singulares comple-  
ctatur: ac deinde, quod nullus sit cer-  
tus status rerum humanarum; quæ  
cùm sint variæ semper & contin-  
gentes, atque à diversis pendeant  
circumstantiis, non est cujusque  
ingenii, certam in illis statuere nor-

mam,

mam & quæ non raro repugnantia sunt, certo quodam temperamento conjungere, & miscere. Obscuritatem verò adfert caligo illa, quâ rerum gerendarum caussæ iuvolvuntur. Apparent quidem earum fastigia; sed latent fundamenta. Latet etiam divinum decretum, de prospero vel infelici rerum eventu: undè fit, ut paucorum sit ista virtus. Pauci possunt quid magis expeditat in quovis negotio prævidere.

2. Prudentiam gignunt usus, & memoria. Res enim singulares, quas illa regit, notæ homini fiunt per usum, & experientiam. Tutus eris, si tuo, & alieno credideris experimento; nec altiori rei te impones, in qua tibi tremendum, & undè caderendum sit. Ut verò omnia prudenter disponas, inspicere primum debes te ipsum; deinde negotia quæ aggredieris; tum eos, quorum caussa, vel cum quibus agendum est. Et te ipsum quidem accuratè æstimabis,

ne

ne plus quam potes tibi posse videaris. Aliquis eloquentiae fiduciâ pro lapsus est: quidam patrimonio suo plu imperavit quam ferre queat: aliis infirmum corpus laborioso oppressi officio. Æstimanda sunt posteâ qua aggredieris; & vires tuæ cum rebus agendis comparandæ. Opprimunt onera, quæ ferente majora sunt. His quoq; admovenda manus, quorum finem aut facere, aut certè sperare possis. Hominum deinde delectus habendus est, an digni sint, quibus partem vitae tuæ impendas: eorum mores examinandi; ne tibi noceas, dum aliis prodesse studies. Denique considerandum est, utrum natura tua rebus hujusmodi agendis idonea sit: & eò inclinandu, quod te vis ingenii desert. Reluctante naturâ irritus labor est.

3. Vir prudens nihil aggreditur, quamdiu aliquâ perturbatione agitatur: non enim potest verum & honestum discernere concussa mens, & pravae affectionis præstigiis delusa. Multum

tum idem prudentiæ adversatur præcipitatio, quæ in graves ac inextricabiles casus plerosque induxit. Quare prudens nil temere agit, propriumq; judicium alieno consilio subjicit. Timidæ sunt hominū cogitationes, incertæ providentiæ, rerum exitus dubii, fallaces experientiæ. Ibi salus, ubi multa consilia. Spectat quoq; ad prudentem, rem denudare; & acute introspicere, sine fuso & integumentis, quæ decipere incautos solent. Sepone pecuniam, famam, dignitatem: intus rem ipsam scrutare: quære quid sit, nō quid vocetur. Stultum est, simulacris & umbris falli. Tum debes veluti ex specula quicquid evenire potest explorare; ne stultum illud quandoque dicendum sit. Non putabam, Ad id longa consultatio adhibenda, maturū que judicium, & subtile examen; ne parua aliqua circumstantia actionem vitiet, ne prudentia degeneret in astutiam & calliditatem, & ne in tanta veri ac fucati boni vicinia vitium pro-

virtute amplectaris. Peractâ denique electione, omnem præcide moram statimque exequere quod decrevisti. Nullus cunctationi locus est in bono consilio; quod non potest laudari, nisi peractum.

## CAPUT XXIII.

*De Iustitia, & Religione. Actum  
utriusque. Quid sit pænitentia  
& in quo consistat.*

i. **J**ustitia suprema virtus, aliis natūrā sibi, quicquid habet transfundit in proximos, nihil petens ex se nisi usum sui. Hæc homines à multis injuriis avertit, & mundum universum in pace constituit. Hæc tacita quædam naturæ conventio est, & vinculum societatis humanæ; nequidquam sine illa laudabile esse potest. Vir justus neminem lædit, alienum non vendicat, omnibus prodest bene de omnibus sentit & loquitur, dat unicuiq; quod suū est, non impedit alterius bonū. Si præsit, justa præcipit,

cipit, omnibus patet, propriisq; utilitatibus subditorum comoda præfert: pœnis vitia coërcet, præmia bonis largitur, & sic omnes continet in officio. Si subsit, servat concordiam, legibus paret, & iussis majorum, suoq; statu contentus officia & dignitates non appetit, nec se rebus ingerit. quæ ad se non spectant. Gratis autem justitiam colit; quia justæ actionis nullū majus præmium existimat, quā justum esse.

2. Religio, moralium virtutum præstantissima, Deum immediate respicit, ejusq; cultum & honorem. Primus autem cultus est, ipsum credere & cognoscere: deinde, reddere illi maiestatem suam, reddere bonitatem. Parum est nosse Deum, quod & dæmones faciunt, qui oderunt: amor insuper & cultus exigitur, his ex rebus constans; quæ utinam tam bene implerentur, quā sciuntur! Scis, Deum illum esse, qui præsidet mundo, qui humani generis tutelam gerit, qui universa moderatur. Ipsum solum

potentem solum bonum , solū altissimum confiteris: ab eo tanquā à summo bono, & tuo ultimo fine , perpetuam beatitudinem expectas. Cur non igitur, ut par est, eum colis? cur non summas ei exhibes veneratiouem ? Cui vilissimā terræ glebulam ei præfers ? Vana est religio tua , nisi factis comprobetur Vis verè religiosus esse Ambula coram Deo, & esto perfectus. Satis eum colit, qui imitatur. Vera religio te Deo religat, Deum tibi. Custodi eam illibatam à negligentia, ab erroribus, à peccatis. Stultitia magna est fidem linguâ , moribus infidelitatem prædicare. Hujus notæ homines irriti olim celeberimus inter Ethnicos Philosophus , dicens; Nihil gloriosius esse Christianis, cùm loquuntur: nihil miserabilius, cum operantur.

3. Divini juris læsi reparatrix est pœnitentia ; quæ ad peccati detestationem inclinat, cum efficaci volupitate, Deo per illud offenso, satisfacienti. Hæc est enim pœnitentia , præterita

rita peccata detestari, expiare; nec amplius in ea consentire. Præterit quod delectat; restat quod arguit, quod torquet, quod damnat. Quid prodest transactam fœditatē abscondere? Nemo nocens se judice absolvitur. Tribunal quoddam à natura in ipsa mente humana constitutum est, ubi unusquisq; sui sceleris accusator est, & testis, & judex. Hic coge animum & sensus tuos quotidie adesse, ad reddendam rationem. Dic apud te caussam; & quantum potes, te ipsum coargue. Totum diem tecum scrutare; omnia dicta & facta tua, atq; ipsasmet cogitationes remetire, nihil abscondens, nihil transiens. Si agnoscis iniquitatem tuam, ignoscit Deus: si sataris, mederis. Quid refert, neminem scire vitium tuum, cum tu scias? An utilius tibi existimas, damnatum latere, quam palam absolvi? Ubi cumq; lateas, conscientia tecum est; non potes eam effugere. Miserrimus es, si hanc aspernaris.

4. In tria tempora vita dividitur, quod est, quod fuit, & quod futurum est. Præsens, "momentaneum est, ante desinens quām veniat: futurum nondum est: at præteriti dies aderunt omnes, cùm jusserris, & ad arbitrium tuum se inspici patientur. Nō timeas memoriam tuam; ne erubescas te in præteritum retorquere, erroresque tuos tibi exprobrare. Quod frequētiūs id feceris, eò citius emendaberis. Ipse de te vindictam sume nec ea iterum admittas, quæ fecisse te plangis. Plerique liberati à naufragio, exinde repudium & navi & mari dicunt, Deique beneficium periculi memoriā honorant. Hanc bonam solitudinem in te esse cupio; ne item experiri velis, quod semel timuisti, grande periculum evasisti: ne te iterum discrimini exponas. Toties pepercit Deus, quoties deliquisti: cave, ne dcirco deteriorias; quia Deus bonus est. Quid facturus sis, cogitas aliquando: cur non potiūs, quid feceris?

ceris? Nam consilium futuri ex præterito venit. Multi ad sapientiam pervenirent, nisi jam putarent se pervenisse. Nisi te quotidie emendes, quotidie deterior eris.

## CAPUT XXIV.

*De Pietate, & Observantia. Obedientia commendatur, itemque Gratitudo. Quomodo accipendum, & reddendum sit beneficium.*

¶ Nullâ vi verborū exprimi potest, quam laudabile opus sit, posse hominem dicere; Parentibus meis cessi, & parvi semper: eorum imperio, sive æquum, sive durum fuerit, obsequenter & submissum me præbui: bonum patriæ civem me semper exhibui: fratribus, & consanguineis bene facere nunquam cessavi: omnes vincere beneficiis conatus sum. Hæc sunt nimirum Pietatis officia, quibus debitum tribuimus

cultum patriæ parentibus, fratribus,  
& aliis sanguine conjunctis. Quod  
vero pietas erga cognatos, id præstat  
observantia erga Prælatos, Principes,  
Præceptores, & alios qui aliquo modo  
nos antecedunt dignitate, sapientiâ,  
ætate, religione & sanctitate. Solemus  
enim coram illis assurgere, caput ape-  
rire, viâ decedere, equo aut vehiculo  
desilire, ad genua provolvi, manus  
aut vestes osculari, aliqua honoris si-  
gna pro more patriæ exhibere. Hæc  
autem omnia profuso ac reverenti  
animo præstabis, si præcesserit in in-  
tellectu magna sublimitatis illorum  
æstimatio. Nam hinc orietur in vo-  
luntate fuga quædam & metus, quo  
perculsus nimiam cum illis familia-  
ritatem declinabis, atque ab eorum  
magnitudine in tuam quodammodo  
resilies parvitatem. Omnis potestas à  
Deo est. Quicquid præstiteris majori-  
bus tuis, infra debitum honorem erit,  
si Deum in illis consideraveris.

2. Ut ex primi parentis inobedien-  
tiâ

tiâ omnis calamitas exorta est, sic per obedientiam filii Dei , ad felicitatem reducti sumus , si & nos obedientiam servaverimus. Obedientia rerum omnium perfectio est , earumq; cum suo principio firmissima connexio. A Deo enim in Deum admirabili circulo cuncta deducit. Hanc Christus præ cæteris virtutibus commendavit, qui ne eam perderet, perdidit vitam. Hæc melior dicitur esse quam victimæ ; quia per eam propria voluntas mactatur. Suscipiendum est autem superioris edictum , velut emissâ divinitus vox , nullâ quæfirâ præcepti cauissâ vel motivo. Nescit judicare, qui perfectè didicit obedire. Moneat superior , jubeat lex , dicat quid me velit facere nō discutio, non dispu-to, non excuso; sed simpliciter & velociter pareo, paratus ad omnia, seu facilia seu ardua , pari gaudio & prōptitudine exequenda. Unum est , in quo refractarius & contumax esse potes , si quis nimirum à bono te re-

trahat, & adversus Dei legem impel-  
lat. Cætera omnia constanter & sine  
murmure exequi debes.

3. Gratitudo debitum respicit ob  
acceptum beneficium. Nihil autem  
magis præstandum , quām beneficii  
æstimatio ; si non ex rei magnitudi-  
ne , saltem ex animo , & affectu do-  
nantis. Tum jugis benefacti memo-  
ria necessaria est , quæ semper animo  
hæreat. Gratiam referre nequit , nisi  
qui meminit : & qui meminit , jam  
refert. Hoc non exigit opes , non ope-  
ram , non felicitatem ; in promptu  
omnibus est. Ut desint vires , nun-  
quam deerit voluntas , quā rependere  
etiam Regibus potes. Cum ab aliquo  
accipis beneficium , hilaris accipe , &  
gaudium profitere , quod sit danti  
manifestum ; ut muneris sui fructum  
capiat. Justa lætitiæ cauſſa est , lætum  
amicum videre , justior , fecisse. Qui  
gratè beneficium accepit , qui libenter  
& benignè , primam ejus pensionem  
solvit. Nunquam voluit gratus esse ,  
qui

qui beneficium tam longe projecit,  
ut extra conspectum sit. Qui illud extollit,  
qui se negat gratiam referre  
posse, jam reddidit. Qui fastidiosè accipit &  
negligenter, parvi facere illud  
videtur. Qui vix indicat se sensisse,  
vix labia dederit, ingratior est, quam  
si taceret. Vir bonus, dum accipit  
beneficium, de reddendo statim cogitat.  
Quid enim tam contra officium,  
quam non reddere quod accepteris? Nec mensurâ pari, sed uberiori  
reddendum; sicut terra, suscepta se-  
mina majori cumulo restituit. Cave  
tamen, ne in gratiæ relatione nimi-  
um festines. Quidam, cum aliquod  
munusculum missum est illis, aliud  
subinde intempestive remittunt, &  
se nihil debere testantur. Rejiciendi  
hoc genus est cum munus munere  
subito expungis.

\*(o)\*

## CAPUT XXV.

*De Veritate ejusque usu. Simplicitas laudatur. Actus fidelitatis*

1. IN omni sermone, gestu, & scriptura, aliisq; signis externis veritas sit. Non decet Christianum hominem labium mendax. Muliebre vitium & plebejum est, aliud pectore claudere, aliud ore proferre. Vir generosus res simpliciter enuntiat pro ut sunt: non exaggerat, non amplificat, non decipit, non simulat, verborumque ambages & involucra devitat. Simplicia verba veritas simplex amat vult nuda videri; quia innocens est. Qui verò mentitur aut fallit, rem duplici sermone obscurat, ut lateat. Odit lucem qui male loquitur, sicut qui male agit. Cave itaque, ne ut vestitum, sic sententiam habeas, aliam domesticam, aliam forensem: ne in fronte ostentatio sit, intus veritas occultetur. Ab hoc vitio abhorret ipsa natura. Pueros vide, nondum ratione uententes.

tentes. Mendacium inter prima probra objiciunt ; & quamvis levitate quâdam assumant, tamen insitâ judicij rectitudine damnât. Quia in re Dei providentiam admirari oportet, quæ virtutes animo inserit , sine quibus vita & societas stare non possunt. Omnium autem perniciosissimū est mendacium vitæ. Nam si omnem sermonis falsitatem abominaris , tanquam sublimi animo indignam ; cur ipse mendacium esse , & vivere non formidas ? Magna res est , unum hominem agere.

2. Simplicitas , parum hominibus cognita virtus , tantæ est dignitatis, ut eâ Deus magnoperè delectetur: nam cum simplicibus sermocinario ejus. Simplex enim ille & integerrimus cum sit , simplices esse vult animas, quæ ad se conveniunt. Est autem simplex , qui in varia non abit : qui sine duplicitate & hypocrisi talem se exhibuit , qualis interius est : qui proprios defectus, cum fert occasio, can-didè

didè & sincerè fatetur: qui malitiâ parvulus est, & omnem politicam agendi rationem detestatur: qui non exclusâ prudentiæ circumspectione, fidem in omnibus esse arbitratur, malum de nemine suspicatur: qui stultus apud homines videri non refugit, ut sit sapiens apud Deum: qui ab omni multiplicitate alienus, simplici intentione Deo placendi, cuncta operatur. Quid turbaris erga plurima, infelix astutia? Unum est necessarium; ut ad eum pervenias, qui unus & simplicissimus est. Nunquam pertinges ad metam, si dupli graderis viâ.

3. Fidelitas, inter maxima & præcipua humani generis bona, colenda est: hac enim sublatâ, tollitur usus commerciorum, dissolvitur amicitia, fœdera dissociantur, universa Respublica perturbatur. Rara tamen & ista est, ac fere mundo incognita virtus. Passim accusant humanam perfidiam tot ad contractus adhibiti testes, tot stipulationum firmamenta, tot

inter-

interpositæ industriæ: quæ nihilominus vix sufficiunt, ut firma maneant pacta & conventa. Adeò plerique sordidi sunt, ut sanctior sit illis quæstus, quam fides. O turpem humano generi, publicæ fraudis ac nequitia confessionem! Nemini credimus sine teste, sine spointore: & tutius in tabulis, quam in animi sacrario, fidem custodiri arbitramur. Cæterum vir fidelis quodcunque opus promissum constanter exequitur, commissa sibi secreta nemini pandit, datam fidem etiam hostibus servat, ipsamque regnis ac vitæ præfert. Tardè quidem promittit, quia celeri sponsioni celerem incumbere pœnitentiam novit sed si semel spopondit, non fallit, non violat, nisi forte rerum status mutetur, aut peccandi periculum incidat. Neminem obligat promissio, quæ non potest sine scelere adimpleri.

## CAPUT XXVI.

*De Amicitia. Quibus officiis sit  
colenda. Praecepta quædam ad  
mutuam conversationem perti-  
nentia.*

1. **N**ihil magis ad humanam vitam  
necessarium, quam amicitia; ni-  
hil commodius, nihil jucundius. Ea  
est mutua duorum benevolentia, in  
virtute fundata, & bonorum com-  
municationi conjuncta. Quantum  
hoc bonum est, ubi præparata sunt  
pectora, in quæ tutò secretum omne  
descendat; quorum conscientiam mi-  
nùs quam tuam timeas; quorum ser-  
mo solitudinem leniat, scientia  
consilium expediat, hilaritas tristitia  
dissipet, conspectus ipse delectet? Quid  
dulcius, quam hominem habere, cui  
confiteri non timeas, si quid delique-  
ris; cujus vel solus occursus proposit  
tibi? Minuta quædam animalia cùm  
mordent non sentiuntur; adeo tenuis  
est illis & fallens in periculum vis;  
tumor

tumor indicat morsum; idem tibi eveniet in boni amici conversatione: non deprehendes, quemadmodum, & quando tibi proficit; profuisse deprehendes. Vera autem esse amicitia nequit, nisi reciprocus interveniat amor sed amare principalius est, quam amari; atque ideo benevolentia profundamente statuitur, redamatio connotatur. Vera item amicitia est, & Christi glutino copulata, quam non sola corporalis praesentia, non mendax obsequium, non fallax adulatio, sed Dei timor, & divinarum studia literarum conciliant. Solida in malo amicitia esse non potest.

2. In eligendo amico magna cautio adhibenda, juxta illud quod vulgus ait; multos falsis modios simul edendos esse, ut amicitiae munus expletum sit. Sunt autem quatuor in eo probanda, cum quo inire amicitiam cupis. Fides, res difficillima, cuius sola fere umbra in terris reperitur; ut te & tua ei tutò committas. Inten-

tio

tio; ut amicitia finem honestum habeat, & res divina non transeat in turpitudinem. Discretio; ut scias quid præstandum illi, quid ab eo petendum. Patientia; ut paratus sit animus, quæcunque adversa pro amico sustinere. Hæc cum in illo probaveris, explorare insuper debes, prioribus amicis quomodò usus fit: nam talem in te futurum sperabis, quam cæteris se præbuit, Fidus amicus vivus thesaurus est, magnâ servandus curâ; magno, si pereat, fletu lugendus. Beatus es, si talem habes, qui te diligat, non tuas opes, non mensam, non ingenium: qui errantem corrigat, cadentem sublevet, currentem adhortetur! Similem illi non invenies. quacunque cœli ambitus patet. multi sunt, qui dicuntur amici! eorum, qui verè sint, paucissimi numerantur. Nemo alterum gratis amat. Qui se spestat, qui res externas sibi pro fine proposuit, verus amicus non est. Tamdiu te diligit, quam diu utilis ei fueris.

Subla-

Sublatâ mensâ deficiet; atque ut cœpit, desinet. Vera amicitia ibi maximè deest, ubi creditur abundare.

3. Sicut medicus, carissimum sibi ægrotantem curaturus, nec ferro, nec igni parcit; ita erga amicum correctione indigentem te gerere debes, liberrimè, audacter, constanter, nihil negligendo, aut dissimulando, Damnable est obsequium, per quod vitia soventur. Sit autem admonitio secreta, adsit ei omnis suavitas, careat omni verborum acerbitate. An aliquis tibi in amicitiam recipiendus sit, diù delibera: cùm placuerit fieri, toto illum pectore admitte; tam liberè cum eo loquere, quam tecum. Ita quidem vivere debes, ut nihil illi committas. nisi quod inimico committere possis: sed quia interveniunt quædā, quæ consuetudo fecit arcana, omnes curas cum amico, omnes cogitationes misce. Quidā quæ solis amicis committenda sunt, obviis narrant, & in quaslibet aures quicquid urit exone-

exonerant: alii etiam carissimorum conscientiam reformidant, & intrapectus omne secretum premunt, nec sibi quidem credituri, si fieri posset. Utrumq; vitium est, & omnibus credere, & nulli, sed alterum honestius, alterum tutius. Quod si cupis sine periculo cum omnibus loqui, id facile assequeris; non occultando, quæ feceris, sed nihil faciendo, quod velis occultum esse.

4. Affinis amicitiae est affabilitas, quæ humanam conversationem moderatur; in qua servanda modestia est, servandum silentium. Multa decet audire virum probum, pauca loqui. Vitiosum est, velle potius sciri, quam scire; cognosci, quam alios cognoscere; proprias merces inutiliter prodigere, quam sibi alienas comparare. Assuefcere oportet eorum cum quibus vivis verbis & moribus incompositis: & quia multi multa loquuntur falsa, inepta, puerilia, nihilque ad rem pertinentia, hæc prudenter dissimulabis.

Animi objecti , ac muliebris est, cum  
iis dumtaxat versari velle, qui cedant  
applaudāt, & adulentur. De te rebusq;  
tuis parcus loquere: tuæ sententiæ ne  
pertinaciter inhæreas , & à verbis e-  
latis abstine, quæ auctoritatem & ma-  
gisterium sapient. Cùm quidpiam  
contra decorum occurrit tibi, in te re-  
gressus te ipsū interroga, an & tu tali  
vitio labores : tum ex omnibus quæ  
audis & vides, aliquid semper ad tuū  
profectum excerpte. Benè tecum agi-  
tur, si ex alieno peccato tuū emendas.

5. Cum tibi aliquid occurrit insoli-  
tum, inopinatum, & ab usu tuæ pa-  
triæ abhorrens , ne id continuò re-  
prehendas : nam levis animi indicū  
est, aliena mirari, & ridere, & suo ser-  
vire municipio. Res æstimandæ pro-  
ut sunt, non ut videntur. Vulgus om-  
nia æstimat ex novitate , difficultate,  
artificio, raritate, pompâ, rumore, &  
extrinseco apparatu: sapiens intrinse-  
cum rei pretiūm, & honestatem respi-  
cit; eāq; omnia spernit, quæ plebs in-  
fana

sana admiratur. Quicquid acciderit,  
penes te est, ut fructum ex eo capias.  
Noli te coarctare, & limitare proven-  
tum tuum. Licet tibi personam ob-  
ducere, & actores fabulæ imitari. Illi  
dum flent, non dolent ; dum emunt,  
non possident ; jubent sine imperio ,  
objurgantur sine vindicta , objurgant  
sine ira : agunt, scilicet , alienam vi-  
tam. Utinam & tu sic in aliorum so-  
cietate te geras , sine affectu , & pro-  
prietate ! Magnum theatrum mun-  
dus est , in quo tot histriones , quot  
homines sunt. Cura autem, ut, quan-  
tum fieri potest , spectator sis , non  
actor fabulæ. Qui spectaculum sui in  
scena exhibent , laborant ; qui  
spectant , rident & dele-  
ctantur.



*De Liberalitate. Quid sit, & quæliter exercenda. Quomodo differat à Magnificentia.*

1. **N**ON VOCO LIBERALEM, PECUNIÆ SUÆ IRATUM; QUI NEC DARE FCIT, NEC SERVARE, QUI NON DONAT SED PROJICIT. LIBERALIS EST, QUI RECTÈ DAT & RATIONABILITER, & PRO MODO FACULTATUM, QUANTUM DECET, IMPENDIT, QUANDÒ & QUIBUS OPORTET, NON SUUM SED ALIENUM SPECTANS EMOLUMENTUM. PORRÒ LIBERALITAS VIRTUS EST BENEFICIORUM ERGATRIX, QUÆ CIRCÀ PECUNIARUM LARGITIONEM & ACCEPTIONE VERSATUR: SED LARGITIO PRINCIPALITER INTENDITUR; QUIA PRÆSTANTIÙS EST DARE, QUAM ACCIPERE. SUFFICIT AUTEM VOLUNTAS, CÙM TRIBUENDI FACULTAS DEEST: IMD HÆC MAXIME ATTENDITUR, UT NON SOLÙM PROFIS SED VELIS PRODESSÆ. NEMO FLUMINIBUS, AUT MARI GRATIAS AGIT, QUOD NAVIGIA PATIANTUR: NEQ; ARBORIBUS, QUOD FRUCTUS FERANT: NEC VENTO, QUOD

quod secundus aspiret: nam licet hæc omnia beneficia sint, illis tamen deest benefaciendi voluntas. Quod vero alicui donandum est, pretium à celeritate sortitur. Sunt nonnulli, qui dum aliquid donant, gratiā omnem corrupti, avertendo vultum, obducendo frontem, & in alterum diem differendo. Sic amicum dilatione lassant, torquent exspectatione: cumque proprium sit libenter donantis citare, qui diu noluit, non ex animo largitus est. Properat omnis benignitas; & jucundum est munus, quod obviari venit.

2. Non potest quisquam beatè degere, qui se tantum intuetur, qui omnia ad utilitatem suam convertit: alteri vivas oportet, si tibi vivere optas. Quid tanquam tuo parcis? Procuratores. Omnia ista, quæ ferreis claustris custodis, quæ ex alieno sanguine rapta tuo defendis, tua non sunt. Depositia apud te fuerunt, & jam ad alium dominum spectant. Aut hostis illa,

aut

aut hostilis animi successor invadet.  
 Quæris, quomodo facias tua? Donando. Quid est hoc, quo te divitem putas? Domuncula, pecunia, agellus. si donaveris proximo, beneficium erit, virtus erit, tecum in æternum manebit. Tunc pretiosa est pecunia, cum usu largiendi desinit possideri.

3. Quia tenui impensâ fieri magna non possunt, ut mediocres sumptus liberalitas regit; ita splendidos & magnos magnificentia. Hæ duæ virtutes, cætera similes, hoc discrepant; quod illa etiam in parvis, hæc non nisi in magnis & luculentis appareat. Cui res angusta domi est, liberalis esse potest: laudem verò magnificentiae ille solus assequitur, cuius opulentia spectabilis est. Hæc propriè in operis admirabilitate conspicitur. Si quis enim magni pretii gemmam in usum rei divinæ largiatur, eximiè potius liberalis quam magnificus dicendus erit: sed si pretio gemmæ sacrarium, templum, aut aliud splendidum ac

## MO MANUDUCTIO.

mirabile opus extruxerit; magnificus nuncupabitur. Operum verò nomine, in quæ magni sumptus conserri possunt, ea intelliguntur, quæ pertinent ad publicam hilaritatem, & ad quædam hominis officia splendide præstanta in his decori ratio habenda est, respectu operantis, & facultatum. Non est magnificus, qui plura quam habeat profundit: qui ære alieno se & suos gravat; ut magnificantiae laudem consequatur. Verè liberalis & magnificus ille est, qui quod donat & expendit, detrahit sibi.

## CAPUT XXVIII.

*De Fortitudine. Quæ sint ejus officia. Mortem à viro forti contemnendam esse.*

1. **M**olles sunt hominum animi, debilique natura; quam idcirco fortitudine armare oportet, ne periculis deterriti ab honestate recedamus. Duplex ejus officium est: unum, idque

idque præcipuum , labores atque  
pericula sustinere : alterum , eadem  
aggredi, cum oportet. Vir fortis non  
se temere malis ingerit , sed adveni-  
entia constanter fert: non appetit for-  
midabilia ; sed spernit : ibi extollitur  
ubi cæteri deprimuntur : ibi stat, ubi  
alii jacent: non illum subigit dedecus,  
non repulsa, non exiliū, non injuriæ:  
non eum carcer , non tormenta, non  
ipsa mors exterrit: omnem luctum,  
omnem ægritudinē, omnes molestias  
magnitudine suâ elidit: non se minis  
aut precibus à recto detorqueri per-  
mittit : non despontet animum, et si  
plura bene cœptis obsistant impedi-  
menta: non cedit oneri, nec officio se-  
mel suscepto jactatur; sed persistit, do-  
nec perficiat : stat rectus sub quolibet  
pondere : nulla illum vis , nulla  
potentia , nullus terror minorem  
facit : periculis undique imminen-  
tibus non allidit virtutem , nec ab-  
scundit. Quò tendat , semper at-  
tendit, non quid patiatur.

2. Sicut secundo navigans vento variis se subsidiis munit, quibus tempestatem excipiat: sic utile erit tibi, donec prospera est fortuna, querere praesidia, quibus adversam fortiter feras. Finge tibi jam advenisse, quicquid sinistri contingere potest, orbitatem, naufragium, exilium, vulnera, tormenta, morbos, calumniam, contumeliam: atque ita te compara, ac si jam in discrimine versareris; ut hoc quasi praeludio excitatus, dicere possis in omni eventu: Hæc jam animo percepi, jam prævidi, & contempsi. Ab æterno constitutum est quid gaudias, quid fleas: & quamvis magnæ varietate singulorum vita distingueatur; summa in unum venit. Acepimus peritura perituri. Quid dignaris? quid quereris? etsi omnia tua pereant, nihil perit de tuo. Satius est dare, quod repetit Deus, quam cogi ad solvendum. Virum sapienter etiam in tormentis beatum fore ipsum met Epicurus edocuit. In Phalarid

inqui:

inquit, tauro si fuerit, dicet: Quām  
suave est hoc, quām hoc non curo!  
Magnum quidem effatum; sed nobis  
non incredibile, apud quos extant  
tot Martyrum exempla, quorum in  
pœnis constantia, in flammis alacritas  
tanta fuit, ut nullo modo sentire tor-  
menta viderentur. Volenti, & Deum  
amanti omnes pœnæ delitiæ sunt.

3. Nullibi clarius fortitudinis præ-  
stantia elucet, quām in mortis discri-  
mine. Difficile est animum perducere  
ad contemptum vitæ; cuius amore  
ita plerique tenentur, ut nihil eâ feli-  
cius, nihil pretiosius æstiment. Sed si  
sapiens es, ut te esse oportet, desines  
inter mala numerare mortem, quæ  
finis malorum est, & initium vitæ. Æ-  
quo animo exire debes, redditurus.  
Mors invictam necessitatem habet;  
eam timere dementis est: dubia enim  
sunt quæ metuuntut, certa expectan-  
tur. Considera, nec pueros, nec men-  
te lapsos timere mortem. Turpissi-  
mum est autem, si eam tibi securita-

tem ratio non præstat, ad quām stultitia perducit. Cum exceptione mortis data est vita: vivere noluit, qui mori non vult.

3. Gratificata est nobis natura, cum ad certum tempus usuram spectaculorum suorum concessit: jam exacto tempore discedendum est. Quis sapiens ad extremum spiritum redactus, si rursus ei vita concederetur, vellet iterum materni uteri ergastulum subire, resumere amentiam infantiæ, metus puerilitatis, juveututis pericula, curas virilitatis, labores senectutis? Nemo tam feliciter vixit, cui placeret iterum nasci. Attende igitur quò properes, & à quibus discedas. Posses vitæ hūjus extum non timere si alterjus ingressum sperares. Hæc est cauſsa timoris tui; quia inanis bonorum es, quorum incipis in fine vitæ desiderio laborare. Alioquin non trepidares in limine æternæ felicitatis. Viro justo suppli- cium effet nasci, nisi mors sequeretur.

Nemo mortem lætus excipit, nisi qui ad illam se diù composuit. Effice eam tibi assiduâ cogitatione familiarem; ut venientem alacri animo excipias. Ut satis vixeris non dies faciunt, non anni; sed animus exire gestiens, & ad originem suam revolare. Diu vixit, qui benè moritur. Benè moritur, qui benè vixit. Vis mortem tibi tranquillam parare? Assuefce ex alio cuncta despicere. Non potest mortem timere, qui jam plura sibi eripuit quam rapiat mors. Vis tibi vitam jucundam facere? Omnem pro illa sollicitudinem depone: ad omne genus mortis paratus esto; sive gladius vitam, sive febris abrumpat, nihil tua intersit: vitam sic institue, ut liceat tibi quotidiè dicere, Vixi. Ille securus vivit, & lætus moritur, qui se singulis diebus effert; cui concessum est vivere, vitâ peractâ. Non potes benè vivere, nisi quotidiè moriaris.

## CAPUT XXIX.

*De Magnanimitate. Viri magnanimi descriptio.*

1. **M**AGNUM ALIQUID IPSO NOMINE SONAT MAGNANIMITAS, EXCELSA VIRTUS; CUIUS ROBUSTISSIMA VIS EST, SEMPERQUE TENDENS AD MAGNA. SINE HAC IRRITUS CADET OMNIS CONATUS REQUIARUM VIRTUTUM: NAM CUM MULTÆ IN EARUM EXERCITATIONE OCCURRANT DIFFICULTATES, ADVERSÙS EAS MENS ERIGI, & CONTRÀ AUDENTIOR ÍRE DEBET: NEC PRIÙS ABSISTERE, QUAM PERRUPTIS INTERPOSITIS OBICIBUS, AD BONI SIBI PROPOSITI ADEPTIONEM GENEROSÈ PERTINGAT. HOC PRÆSTAT HOMINI MAGNANIMITAS; QUÆ AD MAGNA & HEROICA OPERA SEMPER INCLINAT, DEIQUE OPE SUBNIXA, SECURE AC PROMPTÈ RES QUASQUE DIFFICILES AGREDITUR. AUDENDUM EST ALIQUID, SI VIS ALIQUID ESSE. NON POTEST PARVO RES MAGNA CONSTARE. MAGNA RES EST HOMO CUM VERÈ EST HOMO.

2. MAGNUS ANIMUS AD MAGNA SEMPER

per aspirat, eaque omnia velut minuta contemnit, quæ pro maximis vulgus optat. Opera quidem efficit, quæ multo honore sint digna; sed ipsum honorem, & denegatum non ambit, & spernit oblatum, nisi aliter exigant Dei honor, & obedientia. Nihil ad ostentationem, omnia ad conscientiam refert: rectèque facti non populi sermone mercedem, sed ex facto petit. In edito stat semper, excelsus, insuperabilis, par sibi in omni rerum statu: nec locis altioribus se ingerit, contentus magnitudine suâ. Super omnia eminet omnium dominus; & ideo nulli se submittit, neminem rogat; qui extra se nullâ re indiget. Nihil est quod ipsum terreat, aut incurvet. Se profert, & spectari vult non vanitatis studio; sed attento gradu, in quo degit, & Dei donis, quibus res fulget. Stat tamen cum his inconcussa humilitas summa coram Deo; quia omnia bona sua omnemque gloriam in ipsum refundit, pro certo sciens,

se ex se ipso nihil habere , nihil posse,  
nihil esse. Hoc est virtutis fines ag-  
noscere , de se suisque rebus humili-  
mē sentire; iisdem tamen habitos ho-  
nores salvâ modestiâ non repudiare.  
Sequi debet gloria , non appeti.

3. Excipit adverso pectore omnia  
adversantium tela, nihil reluctans; ut  
ad summum virtutis fastigium per-  
veniat. Cum viris mediocribus &  
insunis modestum se ac moderatum  
exhibit: coram Principibus & opu-  
lentis nec se projicit , nec adulatur,  
nec eorum potentiam suam opprimi  
sinit libertatem. Quae odio vel amo-  
re digna sunt aperte odit , aperte  
amat : quæque palam dici vel fieri  
debent , libere loquitur & operatur;  
quia nihil timet aut sperat. facit  
eadem quæ cæteri hominum , sed  
non eodem modo: atque ideo uti-  
tur dissimulatione in vulgus , nec se  
facile populo miscet. Non meminit  
injuriarum ; & in his quæ necessariò  
perferenda sunt, nec querulus , nec  
sup-

supplex est. Paucos laudat, nec ipse laudari optat; sed facere laude digna. Non vivit alterius nutu, nisi amici & Superioris: neque facilè admiratur; quia nihil illi magnum, vel novum videtur. In omni casu, se ipso tutus, nullis rerum movetur eventibus. Motum habet tardum, vocem gravem, orationem stabilem ac sedatam: non enim festinat, qui paucis rebus studet; nec vehementer contendit, qui se ipso contentus est.

## CAPUT XXX.

*De Patientia. Ejus occasiones, & effectus. Indicia veræ Patientiæ. Ad omnia mala ferenda parænesis, & documenta. Necessitas Perseverantiæ.*

i. PATIENTIA est virtus, quâ mala hujus saeculi æquo animo sustinemus. Quia verò hæc mala plurima sunt: varia fortitur nomina, pro varietate malorum, in quibus sustinendis ver-

versatur. Patientia propriè dicitur, cùm injurias fortiter excipit. Æquanimitas, cùm in ferendâ jacturâ bonorum exteriorum occupatur: Longanimitas, cùm pectus munit aduersus rei exspectatæ dilationem: Constantia, cum firmat voluntatem ad alia, quæcunque mala, propria & aliena, privata & publica, tolerâda. Nulla est virtus, cujus exercendæ crebriores incident occassiones. Tot enim irruunt malorum agmina, tot nos obſident adversarii; ut rectè dictum sit, Militiam esse vitam hominis super terram. Nullum penè momentum labitur, quo strenue dimicandum nō sit. Ut desint externi hostes, fatis sibi quisque infestus est. Ex nobis, & in nobis naſcuntur, quæ nos cruciant & exercent. A fletu auſpicamur vitam rudes ad omnia, niſi ad lacrymas. Hoc primum discimus; huic rei incumbimus usque ad mortem. Inventi plures ſunt, qui non riferint: nemo, qui nunquam fleverit. Patientia itaque neceſ-

necessaria est; ut pectus muniat, spiritum roboret, virtutes perficiat. Nemo potest cognoscere quantum valeat, nisi tribulationibus exerceatur. Non est sapiens, qui non est patiens.

2. Malè est homini qui nunquā adversam fortunam expertus est. Ajunt Medici, nihil magis metuendū, quam nimis bonam habitudinem; sed & nautis nimia malacia suspecta est. Si te verberat & lacerat calamitas, non est sævitia sed certamen. Nisi dimices, nō vinces: nisi viceris, non triumphabis. Quod si oportuit Christum pati, & ita intrare in gloriam suam; tu præsumes alienæ felicitatis particeps fieri absq; ulla tribulatione; Erras toto cœlo, si aliam tibi viam fingis, quā migres ad Cœlū. Virtutis sacramenta hæc sunt; bona facere, & mala pati. Indicia verò jam adeptæ patientiæ sunt, aliena mala æquanimiter ferre, inter flagella Dei non murmurare, eorum qui mala inferunt consortium non fugere, inter contumelias ab odio custodiri, divinæ

voluntati quæcūq; nos angunt adscribere, in malis silere, mala inferentes diligere, illatas injurias soli Deo conqueri, seque illi paratum ad omnes ærumnas offerre cum gaudio & gratiarum actione. Denique verè patiens esse dignoscitur, qui erga proximi imperfectiones impatiens non est.

3. In bonorum cxtornorum jacturâ magnum solatium est, infidam eorum conditionem perpendere. Quicquid possides, quicquid amas, naturalem retinet fugacitatem: apud te est, tuum non est. Noli tibi imaginariæ stabilitatis desiderio illudere. Nihil firmum infirmo, nihil fragili æternum, præter virtutem. Hoc unum contingit immortale mortalibus: cætera suam mortem secum ferunt. Ergò quæcumque habes, eo loco pone, ut magnum sit inter te, & illa intervallo. Viro bono nihil eripitur; quia nihil possidet tanquam suum. Cur gemis amisso nummulo, elato filio, succensâ domo: perditâ autem modestiâ,

destiā, verecundiā, fortitudine, non ploras? Atqui hæc bona tua sunt, & tui juris: illa nec bona, nec tua sunt. Si doles, cùm ea amittis; te dignum, qui amitteres, ostendis. Nihil te amisisse putas, si nihil inordinate diligeres. Externa sapientem non angunt, quia non tangunt.

4. Opus aliquod aggressurus, omnia ejus adjuncta considera: plura invenies, quibus turbari mens tua poterit, si non fuerint prævisa. Puerum vocas? fieri potest, ut præsto non sit, vel ut nihil agat ex animi tui sententia. Ad aliquem iturus es? fieri potest, ut inclusus sit, ut occludantur tibi fores, ut ille te negligat. Hæc prævide, & omnia secunda titi accident. Ille me hodie non admisit, cùm alios admitteret: sermonem meum averfatus est: me in imo collocavit: querelæ sunt nauseantis animi, in quas felices & delicati ac imprudentes incidunt. Non hæc observat, qui his nō afficitur; qui scit,

hæc omnia vitæ hujus tributa esse.  
 Optimum autem est pati, quod emen-  
 dare non potes. Si cuius malitiâ vel  
 impudentiâ offenderis? cogita, an fieri  
 possit, ut nulli sint in mundo impro-  
 bi & impudentes. Quod si hoc fieri ne-  
 quit; quid accidit novi, si vir malus &  
 impudens more suo malè agit? vide,  
 ne potius tu arguendus sis, qui non  
 prævideris hunc ita peccaturum.  
 Semper sibi constituit mundus: vicia  
 sunt, ubi sunt homines.

§. Cùm aliquâ afficeris pœnâ; atten-  
 de, non quid patiaris, sed quid feceris.  
 Si verum tibi dixeris, acrioribus fla-  
 gellis te dignum fateberis. Deus est,  
 quo auctore cuncta proveniunt. Ipse  
 te castigat, ut sanet, ut exerceat, ut in-  
 duret, & sibi præparet. Futuris malis  
 reservat eos, quibus indulgere vide-  
 tur. Unde possum scire, quantū animi  
 tibi sit adversus paupertatem, si divi-  
 tiis affluis? Unde dignoscam, quantū  
 habeas constantiæ adversus ignomi-  
 niam & odium populi si inter plau-  
 fene-

senescis? Audivi te, cùm alios in tribulationibus consolareris: opto te ipsum, & tibi ipsi imperantem, ne doleas. Si medico urenti, & membra secanti & gratias habes, & mercedem persolvis; cur Dei medicinæ non acquiescis? Amentia est, putare damna, quæ sunt remedia. Si paupertas, si ægritudo, & cætera, quæ mala vocas, possent tecum verbis contendere, insultarent tibi, & dicerent: Quid mihi, homo, adversaris? Num aliquo bono meâ culpâ privaris? Prudentiâ ne, an justitiâ, an fortitudine? An nō licet mecum læto animo esse? Bona erunt, quæ mala putas, si super ea inconcusfus eminueris. magnum malum est, malum ferre non posse.

6. In alienis casibus potes aliquando constantiam dissimulare, nunquā autem in propriis. Sit tibi fletus communis cum miseris, non fletūs caussa. Descende, & inclina te afflictis; ut ippos erigas. Nemo jacentem levabit, nisi se inflectat. Quia verò res omnes

duplex manubrium habent, tolerabile unum, alterum intolerabile; si quis tibi injuriam fecerit, non eâ parte ipsum prehende, quâ facit injuriam: hæc est enim ansa, quâ ferri non potest. Sed cogita, illum eodem Christi sanguine redemptum esse, ad eandem gloriam vocatum: sic eumprehendes, quâ parte tolerabilis est. Et quia amicitia valdè exili voce prædicta est, ad liberas reprehensiones; veritatem ab adversario audire semper studeas. Hic perpetuò vigilans, res tuas infensus explorat: teque faciliùs mala tua, quam ipsum fallent. Traducet te per vicos & plateas, animiq; tui morbum vel latenter, vel neglegētum, ipse iratus commonstrabit. Ab hoc capere utilitatem fatage, & consule saluti tuæ. Attentiùs se ipsum circumspicit, qui paratum sibi novit censorem, & adversarium.

7. Perseverantia virtutum omnium corona, & consummatio est. Inchoantibus præmium promittitur,  
sed

sed datur perseverantibus. Ideò ante omnia hoc cura, ut constes tibi. Nihil tam utile est, quod in transitu propositum retrò relaberis, si ad ulteriora non contendis: & si incipis stare, descendis. Constitue, quid velis, & in eo usque ad exitum persevera. Inconstantis animi est, novas quotidiè exercitationes assumere, novas subinde sibi quærere sedes. Non alibi sis oportet, sed aliis. Planta, quæ sæpiùs transfertur, tandem arescit: & remediorum crebra mutatio impedit sanitatem. Si Apostolus, vas electionis, non attendens quid antè fecisset, sed quid facere deberet; nequaquam se comprehendisse arbitrabatur; quid tibi faciendum erit, cui optabile foret, ut posses in fine tuo illius principio comparari? Ardor literarum nulla ætate extinguitur: divitiarum amor insatiabilis est expleri nescit honorum cupido. Res finem habituræ, sine fine quæruntur: divinam verò sapientiā, si vel leviter degustaveris continuò te ad perfectionē

188 MANUDUCTIO.  
invitat, qui dixit; Estote perfecti, sicut  
Pater vester cœlestis perfectus est.  
Hæc meta tibi proponitur; ut locum  
semper superesse facias incremento  
virtutis tuæ.

### CAPUT XXXI.

*De Temperantia. Quantum illi con-  
ferat Verecundia? De abstinen-  
tia, & Castitate.*

1. **T**Emperantia voluptatibus impe-  
rat, quæ ex gustu & tactu perci-  
piuntur: adscititas & superfluas odit  
& abigit; necessariis obsequitur, quan-  
tum recta ratio permittit. Ejus regu-  
la infallibilis est, solam necessitatem  
in his, quæ ad corpus spectant, pro  
mensura habere: nec unquam ad vo-  
luptates, propter ipsas, accedere. Hac  
virtute efficitur, ne ex homine in ju-  
mentum labaris. Ad eam plurimum  
confert Verecundia, frænum pravo-  
rum motuum, bonæ indolis index,  
cūtis puritatis, testis innocentiae. Si  
mentem tuam illa possideat; docebit  
te

te omnem timere turpitudinem, ab omni actu illico abstinere, Dei præsentiam venerari, te ipsum ubique revereri, eamque semper diligere intelligibilem pulchritudinem, quæ in operibus temperantiæ maximè elucet. Porrò tunc verecundum te esse dignosces, cùm vel ad ipsum intemperantiæ nomen expavesces; cùm te parietes tui tegent, non abscondent: quos plerique circumdatos sibi credunt, non ut tutius vivant sed ut peccent occultius. Quid autem prodest, recondere te, & oculos hominum auresque vitare? Tecum semper est Deus, qui ubique te videt: tecum conscientia, quæ ubique te accusat.

2. Usum cibi & potiis, Abstinentia & Sobrietas; quæ verò ad tactum pertinent, Castitas & Pudicitia moderantur. Et in usu quidem ciborum, difficillimum est, extra metas necessitatis non abripi. Venter præcepta non audit: poscit, appellat, & quotidianum tributum exigit. Sed quam parvo di-

mitti possit, quam modicâ stipe contentus sit, nemo recogitat. Cogimus vitiis servire naturam; famemque & sitim, quæ naturalibus remediis facile sedari possunt, variis eduliis & potionibus irritamus. Castitas quoque ardua est inter tot libidinis incentiva nisi ea compescat timor Dei, occasionum fuga, sensuum custodia, & maxima sui ipsius reverentia. Qui seipsum non veretur, nec alios vereri poterit. Vis castus esse? contine oculos; ne invitus ames, quæ incautè a/sexist. Quid fugacem & falsam creaturæ pulchritudinem admiraris? Expecta pauplisper, & jam non erit. Serenam frontem squalentes arabunt rugæ, mæsta teget nubes oculorum faces, dentium ebur scaber obducet situs. Fuge etiam pravorum consortium, omnem molitiem vita, carnem jejuniis doma, & durius tracta. Perit, qui nimiùm est amans sui sepulchri.

## CAPUT XXXII.

*De Mansuetudine, & Clementia.  
Vtriusque officia, & præstantia.*

1. **U**T iræ impetum mitiges, necesa-  
ria est mansuetudo; ne citrà vel  
ultrà recti limites hac in parte defle-  
ctas. Telum naturæ est ira; quo uti-  
licet, cum peccantes arguere & casti-  
gare ex officio teneris: cùm dictat  
prudentia, tuam vel alienam injuri-  
am debito modo repellendam esse;  
ne crescat ex impunitate reproborum  
licentia. Crudelis est tam, qui nulli; quā  
qui omnibus ignoscit. Cū vero, iustitia  
exigente, puniendi sunt rei, mansuetu-  
dinis & clementiæ memor esto. De-  
scende ad pœnas tanquam invitus; &  
talis esto erga peccantes, qualis exti-  
tit erga te Deus. Sicut ille te sustinuit,  
ut meliorem ficeret: ita illos sustine,  
ut corrigantur. Despicis Medicum, si  
desperas ægrotum. Tam facilis est  
ægri sanitas, quanta Medici sapientia  
& benignitas. Vir mitis, iracundus &  
pellex

pelago velut scopulus supereminet, fluctusque impingentes dissolvit; nec pœnâ semper, sed sæpius pœnitentiâ contentus est. Clamat coacto cœtu humani generis, Salvator mundi, venite omnes, & discite à me: non curare infirmos, non leprosos mundare, non cæcis lumen, aut mortuis vitam reddere. Sed quid? Discite, inquit, à me, quia mitis sum. Ad hoc redegissem videtur omnes thesauros sapientiæ & scientiæ suæ; ut ab eo discamus mites esse. Tanta mansuetudinis præstantia est.

3. Ut mansuetudo iram, sic clementia punitionem moderatur. Illa ad omnes, hæc ad Principes & Superiores pertinet, ejus enim munus est, mitiorem pœnam quam jura exigant irrogare: non ex timore, lucro, amicitia, aliōve motivo; sed ex animi lenitate. Non opus est, latera montium abscindere, & in arduo collis vertice arces constituere: salvum Principem in aperto clementia præstabit. Hæc est

est munimentū inexpugnabile, quæ tutum reddit imperium. Malus Princeps invisus est; quia timetur: & timeri vult; quia invisus est. Quem verò metuunt subditi, oderunt; & quem quisque odit, periisse cupit. Vitæ Regum dominus est, quisquis suam contempsit. Frustra se potentiâ munit, qui septus suorum benevolentiâ non est. Turpia sunt Principi multa supplicia, sicut Medico multa funera. Si Rex continet vim suam, si omnes injrias & offensiones superne despicit, si quosdam alienæ iræ, neminem impendit suæ; tunc verè se Regem ostendit. Magni animi est, placidum esse atque tranquillum.

## CAPUT XXXIII.

*De Modestia. Munus duplex Studiositatis, quæ regula in usu Entrapeliae servanda?*

I. **M**odestia reliquas animi dotes mirabiliter exornat. Hæc forma honestatis est, & frænum vitiorum.

rum. Quamvis serinone taceas, habitu & gestu te prodis. Argumentum virtutis ex minimis licet capere. Vultus, risus, incessus, & flexus oculorum sæpè hominem ostendunt, qualis sit. Sic vive, ut omnes cognoscant, te ad consortiū Angelorum pertinere. Serva decorum in motu omnium membrorum, in gestu, voce, & aspectu; ne quid in his effeminatum & molle sit ne quid rusticum aut durum. Vera modestia ab animo in corpus, & ex interna morum gravitate in superficiem emanat; ut quasi suppellectilem suam mens foris inspiciat. Vir modestus vivum Dei simulacrum est: nam solus ejus aspectus intuentes componit. At hoc quam bonum est, videri & prodesse! spectat quoque ad modestiam, tui statūs conditionem in vestibus, suppellectili, ornatu domis, & multitudine servorum, non excedere. Animi tui impedimenta hæc sunt; quibus non tu, sed quæ sunt extra te, exornantur. Cur igitur gaudes

malo

malo tuo? cur inania miraris, & impeditorum multitudine gloria-  
ris? Hanc servorum cohortem, quæ latus tuum cingit, rectè dixeris hosti-  
lem exercitum, à qua sati s cavere nō potes. Quid agas nosse volunt, non quid præcipias. Nihil humilius eorum ingressu, nihil progressu insolentius, odiosius egressu.

2. Studio sitatis duo sunt munera: alterum, sciendi appetitum, qui plenumque justo major esse solet, temperare & moderari: alterum, torporem excutere, animique industriam ad necessaria ediscenda excitare. Curiosum homini ingenium dedit natura; artisque suæ ac pulchritudinis conscientia, nos operum suorum spectatores genuit, peritura fructum sui, si tam magna, tam clara, tam subtiliter ducta solitudini ostenderet. Sed abutimur naturæ bono, ea curiose investigantes, quæ utilius ignorarentur. Non ille sapit, qui scit multa; sed qui sapit, quod facit ad rem. Ea primum di-

scenda

scenda, quæ pertinent ad salutem: cætera quo minus legas non deterreo, dummodò quicquid legeris ad mores referas. Cave autem ne lectio multorum librorum habeat aliquid vagum & instabile. Certis ingeniis immorari oportet & innutrirī, si velis aliquid trahere, quod in animo fideliter sedeat. Lectio varia delectat, certa prodest.

3. Danda est aliquando remissio animo, & assiduo labori quies intermiscenda: non enim durabile est, quod caret alternâ requie. Legum conditores dies aliquot instituerunt, quibus ad hilaritatem publicè homines cogerentur, viresque reciperent paullulum resoluti & remissi. Animi verò relaxationem plurimæ actiones constituunt. Inambulatio, scilicet, in loco amœno, & aperto; ut cœlo libero attollat se mens, & membra vegetentur: suburbana ac rusticana secessio, procul ab urbitim nidore & tumultu: aucupium & venatio, quæ statum tu-

um non dedeceant; & piscatio, quæ innocentior est: læta studia & mitiora, musicusque concentus, & ludus aliquis honestus: joci demum innoxii & urbanitates, à quibus absit omnis injuria & indecentia. Sunt quidam nimium severi, osores hominum, suisque tenebris incubantes, à quibus hilaris sermo nunquam potest extorqueri. Alii jocis semper diti, rebus seriis nunquam se applicant, nunquam se populo subducunt. Miscenda autem ista & alternanda sunt: nam solitudo desiderium hominum faciet, frequentia tui; eritque altera alterius remedium. Odium item laboris, sanabit remissio; tedium remissionis, labor. Sunt & nonnulli, qui vires suas dispensare nescientes, immoderatum in se imperium exercent. Modus illis deest. Nec intermittere studia sciunt, nec repetere. Cùm se ad laborem concitant, junguntur dies noctibus; nec desinunt, nisi deficiant. Rursus cùm se in lusus dimit-

dimittunt, se ita resolvunt, ut ad priorem consuetudinem vix retrahi possint. Sic igitur dandum animo intervallum, ut remittatur, non resolvatur. Ad hoc necessaria est Eutrapelia, quæ certos fines præscribat, quos prætergredi nefas sit. Optima quæque mala fiunt, cùm quis modum excedit.

## CAPUT XXXIV.

*De Humilitate. In quo consistat? De cognitione sui. Veri humilis characterismus.*

i. A Christo venit humilitas. Ipse eam verbo promulgavit, docuit exemplo. Hæc, post virtutes Theologicas & intellectuales, inter cæteras primatum habet: removet enim superbiā, quæ est origo omnium malorum. Hæc nos amabiles Deo reddit; quia cum humilibus sermocinatio ejus. Sine hac, quæ virtutum fundamentum est, quicquid in spirituali ædificio super extruitur nec solidum erit nec stabile. Quamvis autem ipso nomi-

nomine quidpiam vile & exiguum  
præ se ferre videatur ; virtus tamen  
magnorum est : quoniam est virtus  
perfectorum , animumque erigit ad  
altiora. Illustria aggreditur sine tu-  
moris periculo, ardua sine metu diffi-  
cultatis; excelsa, strenua, magnanima,  
eodem semper tenore subsistens. Non  
consistit humilitas , ut vulgus putat,  
in mera sui despiciētiā & abjectione  
sed in ea moderata gloriæ & honoris  
appetitione , quæ & excessum devi-  
tet, & à defectu recedat. Appetit hu-  
milis gloriam , tanquam stipendium  
virtutis , animo directè in actionem  
intento ; non propter ostentationem  
sed ob solam virtutem , & quantum  
ipsa depositit. Illegitimus est omnis  
honor, quem virtus non parit. Quia  
verò humilis, quâ pollet mentis per-  
spicaciā, æquius sui æstimator est, om-  
nem propè honorem meritō adversa-  
tur: tum, quia novit, quâm sit exigu-  
um, quod ipse de suo consert ad opera  
virtutis: tum quia timet, ne ex debiti  
hono-

honoris appetitu ad indebitum captandum prolabatur. Tutius est aspernari honorem; quem qui recusat amplificat; qui spernit, auget.

2. Ideò humilis non es; quia te ipsum non cognoscis. Nulla est regio tam remota, de qua faciliùs credas falsa narranti. Quid est homo? Imbecille corpus & fragile, suâpte narurâ inerme, alienæ opis indigens, & ad omnem temporum contumeliam projectum. Massa luti, fœdum animal, ad omnia mala proclive, adeò perverso, & de pravato sensu, ut terrena cœlestibus, caduca æternis præferat. Vniversa vanitas, omnis homo vivens. Nulli animali vita fragilior, nulli rabies acrior, nulli confusior pavor, nulli major libido. Unde igitur tibi superbia, miserabilis creatura, & omnium infelicissima? Attende miseriam tuam, considera probra & dedecora tua, si qua in te supereft rationis scintilla Tunc perfectè humilis eris, cùm te ipsum nôsse didiceris.

3. Verus humilis se prorsus despiciit; neque humilis, sed vilos vult reputari: honorem sibi debitum in Deum refert, & in omnibus de se diffidit: gaudet contemptu sui, hoc solo superbis, quod laudes spernit. Se ipsum considerat juxta ea quae ex se habet; alios vero secundum ea, quae habent ex Deo; & sic aliis se conferens, se omnibus deteriorem arbitratur: hoc est enim ingenium humilitatis, propria mala aliorum bonis comparare; ex quo vel quilibet perfectissimus potest sine mendacio se ceteris imperfectiorem existimare. Adhaec verus humilis omni obedientia se subdit majori, propria desideria non perficit, defectus suos libenter detegit, omnem injuriam patienter sustinet, abjectiora quaeque cum gaudio amplectitur, omnem fugit singularitatem, abstinet a multiloquio, latere desiderat & nesciri: infra se omnia ponit; se infra omnia, seque totum intra nihilum claudit. Verecundus est & circumspet-

cum spectus : non loquitur, nisi cogat  
necessitas , idque modestè & sine risu,  
flere potius optans quam ridere. Cor-  
dis humilitatem corpore ostendit, de-  
fixis in terram oculis, gravi & mode-  
sto incessu, cernuo vultu, ad instar rei,  
qui jam debeat tremendo Dei judicio  
præsentari. Confcius flagitorum quæ  
commisit , incertusque de gratia , &  
dubius de salute, non audet oculos in  
cœlum attollere; sed cum Publicano à  
longè stans , ferventi oratione pecca-  
torum veniam deprecatur. omnia  
deniq; opera sua veretur, omnia ter-  
ræ bona despicit, omnem calcat mū-  
di pomparam : totum enim mundum  
nihil putat, qui se credit nihil esse.

## CAPUT XXXV.

*De statu perfectorum. Imago viri  
perfecti. Finis vitæ perfectæ, unio  
cum Deo.*

1. PErfectus ille dicitur, cui nihil de-  
est. Quid autem potest illi deesse,  
qui purgatus à peccatis, emundatus  
vitios,

vitiis, ac virtutibus exornatus, Deo suo intimè adhæret, & unus cum eo efficitur spiritus in æternum? Hic est apex Christianæ perfectionis; hic finis ultimus, ad quem tendere debes, cùm quælibet res tunc perfecta censeatur, cumfini suo copulatur, finis autē tuus Deus sit; tunc demum te perfici necesse est, cum perfectè Deo adhærens ad eum redis, à quo existi. Perfectus autem sine speciali Dei auxilio nemo est. Et quia pauci inter mortales ad singularem Dei illapsum recipientem mentis apicem disponunt; ideo paucorum perfectio est. Paucos singula secula protulerunt.

2. Virum perfectum illum esse dices, quem videris interritum periculis, intactum cupiditatibus, inter adversa felicem, in ignominia beatum, in mediis tempestatibus placidum, quicquid cæteri timent optantque, ridentem, omnia tanquam minora transiunt, nullo bono nisi suo intentem, semper liberum, sibi semper

CON-

constantem, sui semper similem, eretum, excelsum, vacuum sui, & plenum Deo : cui bona sua nulla vis executit, qui mala in bonum vertit, qui nulla re frustratur, nullo læditur casu: qui pretia rebus non ex opinione, sed ex natura imponit: qui super omnia eminens, toti mundo se infert, & in omnes ejus actus contemplationem suam extendit, semper tranquillus & inconcussus : qui majore sui parte illic perpetuò commoratur, unde descendit. Sicut radii solis, quāvis terram contingant, illic tamen sunt, unde mittuntur ; sic vir perfectus nobiscum quidem conversatur, sed optimâ sui parte abest, & fini suo semper adhæret. Talis est animus ejus , qualis mundi status supra lunam: semper illic serenum est. Rerum defectus ignorat, varium animum nescit, omnia sæcula illi serviunt, æqualiter tanquam sol univetsa perlustrat, atque omni multiplicitate rejectâ in simplicissima unitate quiescit.

Nihil optat, nihil quærit extra se, non habens necesse longius arcessere felicitatem, quam corde inclusam gerit. soli Deo operatur, soli Deo vivit, semper abire paratus. Hanc amissim adhibe vitæ tuæ: & intelliges, quām procul absis à perfectione.

3. Res ista major altiorque est, quām ut possis ad eam pertingere, nisi ille te sursum trahat, qui dixit; Sine me nihil potestis facere. Sed & præviæ dispositiones necessariæ sunt. Finis vitæ perfectæ, intima cum Deo unio est: & quia ille habitat lucem inaccessibilem, ad eum nunquam accedes, nisi tenebras creaturarum á te expellas. Non potest homo divinæ consors naturæ fieri, nisi se ipsum, & omnia creata, mente & affectu transcendat. Omnis vel minima cuicunque rei adhæsio echineidi, exiguo pisiculo, similis est; qui si navim mordeat, eam fistit & detinet in medio cursu. Non aliter plerisque animabus contingit, quæ velut naves, cælestibus

stibus divitiis onustæ, beatæ unio-  
nis portum feliciter attingerent,  
nisi aliqua vitiosa affectione detine-  
rentur. Deus unus & simplicissimus  
est · nunquam poterit anima unio-  
ni apta esse, nisi una & simpli-  
cissima efficiatur.

## O. A. M. D. G.



## INDEX.

CAP. I. *De fine ultimo hominis.*

Quàmmalum sit, ab eo deflectere.  
Quibus mediis, & quo ordine ad  
ipsum perveniantur? fol. i

CAP. II. *Cupientibenè vivere, mo-  
rum instructor eligendus est.*  
Qualis hic esse debeat? Officia di-  
scipuli.

CAP. III. *De purgatione à peccatis.*

Exuendus erga illa affectus, &  
vitia extirpanda. Nullum effica-  
cius

cius vitiorum remedium, quam  
mortis, & aeternitatis considera-  
tio.

13

CAP. IV. De Gula. Ejus mala, &  
remedia. Quae sint indicia devi-  
tiae gulae?

23

CAP. V. De Luxuria. Quam turpe  
sit hoc vitium. Quam facilis in id  
lapsus, & quomodo evitandus.  
Voluptas animi sectanda, quae so-  
lida est.

28

CAP. VI. De Avaritia: malitia ej-  
us perstringitur. Collatio pauperis,  
& divitis. Opum fallacia, & va-  
nitas.

34

CAP. VII. De Ira, Character irrat.  
Effectus, Causa, & remedialia Irae. 41

CAP. VIII. De Invidia, & Acedia.  
Utriusq; descriptio & curatio. 54

CAP. IX. De Superbia, Ambitione,  
& inani Gloria. Icon superbi.

Dignitatum vanitas, & pericula.

Tumoris mala, & alexipharm. 58

CAP. X. De totius corporis, sensu-  
umq; exteriorum moderatione.

Quantum corpori indulgendum?

Castiganda oculorum licentia.

Vestium luxus damnatur. 68

CAP. XI. De custodia linguae. Quā-  
ti momenti fit, & quām difficilis?

Quid in sermone servandum;  
quid vitandum? Qualiter tole-  
randa vitiosa aliorum lingua? 74

CAP. XII. De sensibus internis.

Usus opinionum. Bonis cogitatio-  
nibus mens imbuenda De coer-  
cendo appetitu sensitivo ejusque  
pravis affectionibus. Variæ ad id  
præceptiones. 82

CAP. XIII. De Amore. Quæ sit ejus  
natura, quæ cauſæ, qui effectus?  
De ejusdem remedii. Addita  
quædam de Odio. 88

CAP. XIV. De desiderio, & fuga.

Quid desiderandum, quid fugiendum sit? 94

CAP. XV. De Gaudio, & Tristitia.

Qualiter vir bonus gaudere debet? Nō tristatur qui omnia prævidet. Varia doloris anidota. 99

CAP. XVI. De Spe, & Desperatione.

Quomodo utramque moderari oporteat? 105

CAP. XVII. De Timore. Quām vanus fit, & qua ratione vincatur?

Audacia vitanda. Quādam iterum de Ira. 108

CAP. XVIII. De Potentiis animæ rationalis. Continendus intellectus à curiositate. Cui potissimum scientie incumbendū? Quām malūsit, aliorum usores disquirere. Aliorum judicia spernenda. De voluntatis abnegatione. 114

CAP. XIX. De statu proficiētum.

Varia profectus adjumenta tem-  
poris aestimatio, & usus. Dei præ-  
sentia necessaria. 131

CAP. XX. De bono solitudinis. Fugiē-  
da malorum societas. Mundi vi-  
tia quot & quae sint? Studium pro-  
ficientis. Acquisitio virtutum. Si-  
gna quædam obtentæ virtutis. 128

CAP. XXI. De virtutibus Theolo-  
gicis Fides operibus comprobanda.  
In solo Deo ponenda fiducia. Mo-  
tiva amoris erga Deum. Amor  
proximi beneficiis ostenditur.  
Hortatio ad eleemosynam. 136

CAP. XXII. De prudentia. Ejus  
necessitas, & difficultas. officium  
viri prudentis. 142

CAP. XXIII. De Iustitia, & Reli-  
gione. Actus utriusq;. Quid sit  
pænitentia, & in quo consistat? 146

CAP.

CAP. XXIV. De Pietate, & Obser-  
vantia. Obedientia commendata-  
tur, itēmq; Gratitudo. Quomo-  
dò accipendum, & reddendum  
sit beneficium? 151

CAP. XXV. De Veritate ejusq; usu.  
Simplicitas laudatur. Actus fide-  
litatis. 156

CAP. XXVI. De Amicitia. Quibus  
officiis sit colenda? Præcepta que-  
dam ad mutuam conversationem  
pertinentia. 160

CAP. XXVII. De Liberalitate. Quid  
sit, & qualiter exercēda. Quomo-  
dò differat à Magnificentia? 167

CAP. XXVIII. De Fortitudine. quæ  
sint ejus officia? Mortem à viro  
forti contemnendam esse. 170

CAP. XXIX. De Magnanimitate.  
Viri magnanimi descriptio. 176

CAP. XXX. De Patientia. Ejus  
occa-

occasiones, & effectus. Indicia vera  
Patientiae. Ad omnia mala feren-  
da parænesis, & documenta. Ne-  
cessitas Perseverantie. 179

CAP. XXXI. De Temperatia. Quā-  
tum illi conferat Verecundia. De  
abstinentia, & Castitate. 788

CAP. XXXII. De Mansuetudine,  
& Clementia. Vtriusque officia, &  
præstantia. 190

CAP. XXXIII. De Modestia. Mu-  
nus duplex studiositatis. Quæ re-  
gula in usu Eutrapelia servanda  
193


CAP. XXXIV. De Humilitate? In  
quo consistat. De cognitione sui.  
Veri humilis characterismus. 198

CAP. XXXV. De statu perfectarum.  
Imago viri perfecti. Finis vita  
perfectæ, unio cum Deo. 202

E I N I S.

\* 231027





BB

